

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR SECOND SITTING ON WEDNESDAY, THE 8th FEBRUARY, 2023
(Time 10:30 AM to 1:00 PM and 2:00 PM to 4:00 PM)

OBITUARY

1. **PU ZORAMTHANGA**, Hon'ble Chief Minister to make obituary references on the demise of the following dignitaries :
 - 1) **Pu Lalhmingthanga**, Former Deputy Chief Minister, Mizoram.
 - 2) **Pu R. Khawpuithanga**, Former Member of Legislative Assembly.
 - 3) **Pu Lalrinmawia**, Former Member of Legislative Assembly.

QUESTIONS

2. **Questions** entered in separate list to be asked and oral answers given.

ELECTION OF DEPUTY SPEAKER

3. **Members** to elect Deputy Speaker.

LAYING OF PAPERS

4. **PU R. LALZIRLIANA**, Minister to lay on the Table of the House a copy of each of the following :
 - i) Joint Electricity Regulatory Commission for Manipur and Mizoram (Fees, Fines and Charges) (Second Amendment) Regulations, 2020.
 - ii) Joint Electricity Regulatory Commission for Manipur and Mizoram (Intra-State Essential Reliability Services Operations) Regulations, 2020.
 - iii) Notification on appointment of Er. H. Thanthianga, Assistant Chief (Engineering) of Joint Electricity Regulatory Commission for Manipur and Mizoram to the post of Electricity Ombudsman.

- iv) Joint Electricity Regulatory Commission for Manipur and Mizoram (Recruitment, Control and Service Conditions of Officers and Staff) (First Amendment) Regulations, 2021.
 - v) Joint Electricity Regulatory Commission for Manipur and Mizoram (Electricity Supply Code) (Fourteenth Amendment) Regulations, 2021.
 - vi) Joint Electricity Regulatory Commission for Manipur and Mizoram (Electricity Supply Code) (Fifteenth Amendment) Regulations, 2021.
 - vii) Joint Electricity Regulatory Commission for Manipur and Mizoram (Electricity Supply Code) (Sixteenth Amendment) Regulation, 2022.
 - viii) Joint Electricity Regulatory Commission for Manipur and Mizoram (Electricity Supply Code) (Seventeenth Amendments) Regulation, 2022.
 - ix) Joint Electricity Regulatory Commission for Manipur and Mizoram (Metering for Grid Connected Renewable Energy) (Second Amendments) Regulation, 2022.
 - x) Joint Electricity Regulatory Commission for Manipur and Mizoram (Renewable Purchase Obligation and its Compliance) (First Amendment) Regulations, 2022.
5. **ER. LALRINAWMA**, Minister to lay on the Table of the House a copy of The Mizoram Licensing and Regulation of Private Veterinary Hospitals and Clinics Rules, 2022.

DISCUSSION ON MOTION OF THANKS

6. Discussion on Motion of Thanks on the Address of the Governor.

LALHMAHRUAIA ZOTE
Commissioner & Secretary

SPEAKER : *Chuvangin, tuman mihringte chhuang suh se, engkim in ta a ni vek si a.* - I Korinth 3:21

OBITUARY:

Vawiinah hian kan ram hruaitu zahawm tak tak lo ni tawh thin te, helai hmuna ram tana thahnemngai taka hna lo thawk tawh thin te sunna kan nei dawn a. Kan sun tur te chu –

1. Pu Lalhmingthanga, former Dy. Chief Minister,
2. Pu R. Khawpuithanga, former Member of Legislative Assembly leh,
3. Pu Lalrinmawia, former Member of Legislative Assembly te anni a. Kan House Leader zahawm tak Chief Minister ni bawk, Pu Zoramthanga, sunna hun hmang turin i lo sawm ang u.

PU ZORAMTHANGA, CHIEF MINISTER: Pu Speaker, kan hotu zahawm tak tak leh kan House member-te, hruaitu pawimawh tak tak lo ni tawh, hun lo taka kan chan tak te pathum ngawt mai vawiinah sun an ngai ta a. Chungte chu an chanchin kan sawi diah diah ang a.

A hmasa berin Pu Lalhmingthanga, Ex-Dy. Chief Minister, Mizoram hi November Ni 2, 2022 (Nilaini) zanlai dar 12:40 ah an chenna in Khatla-ah kum 82 mi niin a boral a.

Pu Lalhmingthanga hi Pu Hrangbuanga leh Pi Lalziki Sailo te fa upa ber niin, June Ni 9, 1940 ah Vanhne khuaah a piang a, pianpui unau hmeichhia pali a nei a. Pi Rothuami d/o Thangruma nen October Ni 24, 1968 ah Shillong-ah an innei a, fapa 2 leh fanu 4 an nei a. Tin, Baptist Kohhran Upa atan Ni 28.11.1989 ah nemngheh a ni.

Zirna lamah chuan Mizoram ah bul a tan a, matric chu kum 1960-ah Govt. High School, Shillong atanghin a pass a. IA (Intermediate of Art) leh BA hi St. Anthony's College, Shillong atangin a pass bawk a. Guwahati University-ah MA (Eng) final year a exam dawn laiin Mizoram a buai ta a, chhungkaw harsatna avangin a chhunzawm ta lo a. A hnuah Post Graduate Training College, Shillong atangin BT (Bachelor of Teaching) a zo leh a ni.

Pu Lalhmingthanga hian lehkha zir chungin Assam Civil Secretariat, AG Office, Shillong bakah Mizo Modern H/S, Nongrim Hills, Shillong ah Headmaster hna 1966-1972 chung a thawk a ni. Kum 1972, May thla atangin Lunglei-ah in bengbelin, PWD hnuaiah a in register a, contractor leh supplier hna a thawk a.

Ram rawngbawlina lamah chuan kum 1975 ah People's Conference (PC) Party din anih khan Sub-Headquater Lunglei ah President hmasa berah thlantlin a ni a. Kum 1978, 2nd Mizoram Legislative Assembly (UT) ah Lunglei Town Constituency atangin

PC party ticket in MLA atan thlantlin niin Cabinet Minister a ni a. Amaherawhchu, hun reilo te hnuah sorkar a tluchhia a, kum 1979, 3rd Mizoram Legislative Assembly general election-ah PC party ticket bawkin MLA atan thlantlin a ni leh a, Finance Minister niin Revenue, PWD, P&E, etc. department te a enkawl a ni. A hun chhung hian P&E leh PHE te hi PWD hnuai atangin department puitlingah hlankai a ni. Kum 1984, 4th Legislative Assembly-ah a vawi thumna atan a bial ngai atangin PC party ticket bawkin thlantlin a ni leh a ni.

Pu Lalhmingthanga hi Mizoram State kan nih hnu pawhin MLA atan thlantlin zui niin, kum 1993, 3rd Mizoram State Legislative Assembly-ah independent ticket in Aizawl North-I atangin MLA atan thlantlin a ni a. Hemi tum hian Congress leh Independent (Mizoram Janata Dal) te thawk hovin sorkarah Cabinet Minister niin, December Ni 8, 1993 - June, 1994 chhung hian heng department - Finance, SAD, PHE leh Excise & Taxation te a enkawl a ni. Kum 1998, 4th Mizoram Legislative Assembly-ah Aizawl East-I constituency atangin Mizoram People's Conference (MPC) ticket in hneh taka thlantlin a ni leh a. Hemi tum hian MNF leh MPC te an thawk ho a, Dy. Chief Minister a ni. Chhan hrang hrang avangin December Ni 9, 1999 ah Dy. Chief Minister hna chu a chawlhsan a, Leader of Opposition-in a awm ta a ni. A hnu kum 2003, 5th Mizoram Legislative Assembly-ah Lunglei South Constituency atangin MPC ticket in thlantlin a ni leh bawk a ni.

Pu Lalhmingthanga hi Minister a ni emaw, Opposition Leader a ni emaw, Opposition Bench lamah a thu emaw ram leh hnam tan a ngaihtuahna zawng zawng senga ram rawngbawltu a ni thin a. Assembly House chhung leh pawnah pawh debator leh parliamentarian ropui tak niin, UT hun laiin vawi 3, State-ah vawi 3 thlantlin a ni. A boral ni thleng hian MNF Party-ah Adviser a ni bawk a ni.

Pu Lalhmingthanga hi a kum upat hnuin hrisel lohna hrang hrangin a tlak buak ve a, Delhi leh Aizawl Hospital-ah te enkawl a ni thin a. November Ni 2, 2022 (Nilaini) zanlai 12:40 khan chatuan ram min lo pansan ta a ni.

A dawt lehah chuan, Pu R. Khawpuithanga, Ex-MLA, Mizoram hi December Ni 15, 2022 (Ningani) zing lam dar 9:05-ah Trinity Hospital, Aizawl-ah kum 81 mi niin a boral a.

Pu Hrangchhunga leh Pi Vanbawihhi te fa niin, March Ni 1, 1941-ah Mualcheng kuaah a piang a. An unau hi mipa 5 leh hmeichhia 4 anni. Pi Ngurchhingi d/o Kailuaia nen January Ni 12, 1965 ah North Mualcheng-ah an innei a, fa pahnih - mipa leh hmeichhia an nei a. Tlangnuam Presbyterian Kohhran Upa atan October Ni 14, 1979-ah nemngheh a ni.

Zirna lamah chuan - Primary School Mualcheng-ah a zovin, Middle School chu N. Vanlaiphaiah a zo a ni. Kum 1961-ah Gandhi Memorial High School, Champhai atangin matric tha takin a pass a, PU pawh private-in tha takin a zo bawk a ni.

Pu R. Khawpuithanga hi Mizoram a buai lai khan hun eng emaw chen a rammu ve a. Kum 1975-ah Tihar Jail (Delhi)-ah a tang a, India leh MNF sorkar palaite inremna an neih hnu pawhin MNF-ah mi hmingtha zingah a tel chho zel a. Tlangnuam Veng, Aizawl ah Village Council President hna term 2 chhung (1988-1993) a chelh a. Kum 2003, 5th Mizoram Legislative Assembly-ah Aizawl South-II bial atangin MNF ticket-a thlantlin a ni a, MNF sorkar term hnihna ah khan khan Minister of State tlukupui, Political Adviser to Chief Minister hna a chelh a, PWD portfolio-ah Chief Minister a pui bawk a ni. A boral ni thleng hian MNF Gen. Headquarters-ah Political Affairs Committee Member a ni.

Pu R. Khawpuithanga hi November Ni 30, 2022 khan a khua a sik a, Trinity Hospital-ah hruai nghal niin ICU-ah dahluh nghal a ni a. Doctor leh nurse ten theih tawp chhuaha an enkawl lai mekin December Ni 15, 2022 (Ningani) zing lam dar 9:05-ah chatuan ram min pansan ta a ni.

Tichuan, Pu Lalrinmawia, Ex-MLA, Mizoram hi January Ni 26, 2023 (Ningani) zing dar 9:10 ah khan kum 75 mi niin a boral a.

Pu Lalrinmawia hi Pu Lalruanga leh Pi Hualzingi te fa pasarih zinga a naupang ber dawttu niin, December Ni 28, 1947 khan Darngawn khuaah a piang a, an unau hi mipa pali leh hmeichhe pathum an ni. Pi Chawngzikpuii d/o VL Sanga, Bungkawn, Aizawl nen Ni 13.10.1990-ah an innei a, fapa pahnih leh fanu pahnih an nei a ni.

Zirna lamah chuan Primary leh Middle School hi Khawzawl-ah kalin, Pawl 7 leh 8 chu Champhai-ah, Pawl 9 leh 10 chu Republic High School, Aizawl ah a kal a ni. Tichuan, Mizoram a lo buai tak avangin, ram leh hnam tana theihtawp chhuah turin lehkha zir zawm lovin a rammu ve ta a ni.

Kum 1966-ah MNF underground zawmin Sergeant rank pek a ni a, clerk hna a chelh a ni. Tin, inbiakpawhna lamah a thawh hlawk hle a, mi train chhuah pawh nei nual a, a train chhuah te chu Mizoram sorkar a lo din hnuah pawh thawktu tangkai an ni chhonzawm hlawm a ni.

Remna neih hnuah Mizo National Youth Front (MNYF) ah President hmasa ber a ni a, Kum 1987, First Mizoram State Legislative Assembly General Election-ah khan North Vanlaiphai bial atangin MNF ticket-in thlantlin a ni a. Mawhphurhna hrang hrang, block hruaitu nihna thlengin a chelh a, a boral lai hian MNF General Headquarters-ah National Core Committee member a ni mek a ni.

February Ni 24, 2022 ah khan hritlang khawsik vanga doctor a inentir chu Trinity Hospital-ah admit a ni a, investigation te tiin chuap cancer nia rinhlelh a ni a. Chumi tichiang tur chuan Max Hospital, Delhi-a kal turin refer a ni a, Delhi-ah chuan chuap cancer a nih an lo nemnghet ta a ni. Delhi-ah hian thla 8 chhung (March - October) an zuk awm a. November, 2022 atanga ama chenna in Aizawl-a a inenkawl mek lain, Ni 26.1.2023 zing dar 9:10-ah chatuan ram min pansan ta a ni.

Pu Speaker, heng kan sun tak mi pathum an chanchin ka han sawite kha, wawiin obituary-a ka rawn thlen, kan mi uiawm tak tak te chu anni e. Ka lawm e.

SPEAKER : Awle, opposition group member atangtein sawi duh kan awm em? Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e.

Wawiinah kan ram tana an hun tha zawng zawng hmangtute - Pu Lalhmingthanga, Pu R. Khawpuithanga leh Pu Lalrinmawia sunna hun kan hmang tur hi paw ka ti hle a.

A hmasa berin, Pu Lalhmingthanga hi a mimal tak pawha ka hriat chian a ni a, an hunlai, rambuai thim chhah laia kan ram tana thahnemngai taka hna lo thawk thin a ni a. *Mi-bik* a nihna, he House zahawm takah vawi 6 lai mai thlantlin a ni thei hi mi pangngai aia a ropuina a ni. Tin, sorkar an chan laia, Minister anih lai te, Dy. Chief Minister a nih lai te pawha a hnathawhnaa hmingchhiatna nei lova a hun hmangral thei anih avangin a ropui ka ti a.

Tin, politics-a a luh hma hian Lunglei-ah naupangte kan ni a, chanchinbu te a siam a, chanchinbu a siamah hian Napoleon-a thawnthu hi a let thin a, a ngaihnaawm kan ti em em thin a, chung atang te chuan keini pawhin Napoleon-a chanchin te kan lo hriat phah ve a. A inah typing school a din a, wawiinah pawh mi pangngai ang taka type te kan thiam theihna hi amah vang a ni. Khang hunlaia typing school Lunglei-ah din hmasa, ‘dinna chang hria a ni’ tih kha wawiinah ka rawn sawi duh a. A bik takin kan family tan hian a pawimawh zual a, kan chhiat, kan thatah min rawn thlamuantu niin, kan damloh ni khua te pawhin kan inah a upat hnu thleng khan tawngtaina rawn nei thin anih hi kan chhungkaw tan pawh a hlu leh zual em em a ni.

MLA kum 2003-ah kan rawn ni ve a, Pu Speaker, helaiah naupang tein inthlahrung takin House-ah kan han thu a, ani, Pu Lalhmingthanga kha senior tawh, experience nei tawh a ni a. Kan zamna deuh te, kan harsatnaah te mi fuih kha a peih em em a. Kan thusawi ve thin te leh zawhna kan han siam ve te pawh hi Session pawnah, ‘i ti tha lutuk, i zawt tha lutuk’ te min han ti a, khang khan confidence min pe a, politics-

a kan rawn luh tirha he House pawh ka tlangnel phahna hi ‘Pu Lalhmingthanga a ni’ tih hi vawiinah hian tawitein ka rawn sawi duh a.

Tin, Pu R. Khawpuithanga hi kum 2003-ah MLA kan ni ho a, anni kha ruling lamah a awm a, keini opposition bench-ah kan thu a. Chuti chungin harsatna kan neih, ani kha CM office-ah awmin opposition kan nih thliar hrang lovin CM office-a kan bial tana harsatna kan neihte phur takin min tihpui thin a ni. Vawiinah sunna hun kan hmang hi a pawl ka ti.

Pu Speaker, vawiina Pu Lalhmingthanga te, Pu R. Khawpuithanga te leh Pu Lalrinmawia te, an hun tha zawng zawng kan ram tana hnathawktute vawiina sunna hun kan hmang hi a pawl ka ti a. An chhungkhat laina, an nupui fanau zawng zawngte Pathianin awmpuiin malsawm zel turin duhsakna kan hlan e. Ka lawm e.

SPEAKER : Member zahawm tak Pu Lalduhoma ka sawm leh e.

PU LALDUHOMA : Pu Speaker, kan legislature party lam atang hian han din ve duh te pawh an awmin ka hria a, churang chuan tawitein kei chuan ka han sawi ang a.

Pu Lalhmingthanga hi political party pakhat kan lo awm dun tawh thin bakah helai House-ah ngei hian kum 5 chhung insi rialin kan thu dun a. Finance lamah a contribution a sang a, Finance Minister anih lai tein kan ramah sum leh paiah harsatna lian lutuk kan tawh lo niin ka hria a. Tin, power kan intodelhna tura mi tui, hma tam tak lo chhawp, vawiin thlenga kan bawhzui tur min chhawpchuah saktu a ni.

Thil mak deuh mai pakhat chu, an inah ralnaah ka va kalin an nuin min lo hrilh chu, “party tin maiin in rawn ta neih vek mai hi kan lawm a ni” a ti a. Amah hi political party hrang hrangin ‘kan ta, kan hruaitu’ kan tih theih dinhmuna ding a nihna hi a danglamna leh a hlut zualna a ni a. Tin, a hlaphuah “Kar a hla” tih hi love song a ni tak nain, pastor-te tan pawha sak pawl lo niin ka hria a, a hla hi a tha a ni. Mizo love song zingah chuan sak lar pawl leh mite pawhina an hlut niin ka hria a, thu leh hlaah miril tak a ni.

Pu R. Khawpuithanga hi kan ngaihthlak tak ang khan, politics hi a chunglam atanga rawn zuan mai a ni lo a, a bulthum, a lei rut local level atanga rawn chhir chhuaka dinhmun sang tak rawn kai thei, mi hawihhawm, mi pawl sawilo, inngaitlawm tak, thuawih thei tak leh kohhran upa tha tak a ni. Presbyterian upa zingah hian an chhuan pawl zingah a lang pha ve a, a uiawm hle a ni.

Tin, Pu Lalrinmawia hi ramhnuaiia kan awm laiin kan khawsa tlang thin a, Zaingen thlawhlai thlamah te kan riak ho thin a. A kalna apiangah guitar hi a ak reng

mai a, zana hian a raltit lai pawh hian a zai leh luah luah thin a, chutianga lo inhrawn ve hrep tawh kan ni a. Ani pawh hi mi kawm nuam leh zaidam, pa tha tak mai a ni a.

An zavai hian mi uiawm tak vek an ni a, an kalsan tak an chhungte ‘Pathian thlamuanna in chenchilh se’ tiin duksakna ka hlan a ni e.

SPEAKER : Member zahawm tak Pu Vanlalhlana ka sawm e. *Zawhna & Chhanna* hun kha a la zel tih kan hre bawk dawn nia.

PU VANLALHLANA : Pu Lalrinmawia chanchinte kan House Leader leh kan Opposition Group Leader-ten an sawi tawh a. Han sawi ve kher ka duhna chhan chu, Pu Hminga nen hian kan inzui nasa em em a, party khatah kan awm a, ani President a ni a, General Secretary-te ka ni thin a. Tin, Fourth Assembly-ah khan kan legislature party leader a ni a, kei Secretary ka ni a, chutiang chuan kan inzui a. Vawiinah hian a chanchin tawite tal a sawi hi ba niin ka inhria a. Hun min pe a ka lawm khawp mai.

Kan hriat angin Pu Hminga kha mizo ah chuan palian pawl tak a ni a, inchei thiam a ni. Tin, saptawng a thiam tha hle a, a chhiar zau a, a hriatrengna pawh a tha a, a thil hriatte ngaihnawm taka sawichhuak thiam anih lehzeln a kha a talent dawn danglam tak a ni. Legislator kan neih tawh zingah chuan a tha ber pawl niin ka hria a, ruling leh opposition party atang tein he House hi a lo mawi tawh thin a ni. Mizoram Road Communication *Master Plan* a buatsaih pawh a hlawhtling chho mek zel a.

Vawiinah hian Pu Hminga chungchangah thil pahnih chauh sawi ka duh a. *Pakhatnaah* chuan – 1996 khan Delhi-ah United Front sorkar a lo ding a, Prime Minister chu Deve Gowda a ni a, Guwahati-ah khuan North East Regional Party Conference a awm a, chumi hmang tur chuan Gowda pawh hi a lo kal a ni. Mizoram atangin Pu Lalhmingthanga leh Prof. JV Hluna he khawmpui hmang tur hian an kal bawk a. Chutah chuan, Pu Hminga hian Pu Gowda hnenah, “North East-a insurgency tihreh nana tha ber tur chu ruahmanna hranpa, pawisa a hranpaa dah a ni” tiin advice a pe a, an sawiho a, tha takin an inthen a. Delhi-a Gowda hawthlak hnu chuan NLCPR hi a lo piang ta nawlh mai a ni. Chuvangin, he thil hi keini chuan, “Pu Hminga’n Deve Gowda a advice avanga he thil hi lo piang a ni” tih hi kan pawm dan a ni.

Tin, 1993-ah khan kan hriat tawh angin Coalition Ministry - MJD leh Congress party-in an din a, chutah chuan Minister pawimawh tak dinhmun cabinet-ah a chang a. 1994-ah khan KC Pant Mizoram-ah Central Finance Commission atangin a lo zin a. Chutah chuan Mizoram sorkar-in a lo hmuahnaah khan, thlawhtheihna tumhmun chungchang Pu Lalhmingthanga hian a lo sawipui a. Mizoram hi India ramah airport nei lo awmchhun kan nih thu te a lo hrih a. Tin, Mizoram-ah airport siamna tur remchang tak mai kan neih thu te hrihlin, damdawi in tlang atangin Lengpui hmun chu a kawhhmuh a ni. Pu KC Pant pawh hminin, Delhi-a a hawthlak hnuah chuan 40 crore,

Lengpui Airport siamna tur hi a rawn pe nghal a ni. Chu chu Congress ministry lai a ni a, Pu Lalhmingthanga pawh Congress ministry-ah Cabinet Minister a nih laia thil thelng a ni.

Chuvangin, Mizoram hmasawwna hnukpui lianah hian Pu Lalhmingthnaga hi a inrawlh thin a ni. Power Minister niin Mizoram-ah power kan neih theihna turin nasa takin hma a la bawka ni tih te kan hria a. Vawiinah hetiang mi ropui mizo mipuiten kan neih thin kan chan ta hi ram tan hlohna nasa tak a ni. Tin, Pu Lalhmingthanga chhunge leh thenrual thate ‘Pathianin awmpui zel se’ tih hi kan tawngtaina, kan duhsakna a ni e. Ka lawm e.

SPEAKER : Member zahawm tak Pu KT Rokhaw ka sawm leh e.

PU K.T. ROKHAW : Pu Speaker, vawiin a member kal tate sunna hun kan hmang tur hi a lungchhiatthlak ka ti a, a lunglenthlak viauin ka hria. Hun ka lak rei loh nan a bik takin Pu Lalhmingthanga chungchang hi han sawi ka duh a. Amah hi he House-a member kan lo nih pui tawh thin a ni a. Tin, a mizia pawh hre ve in ka inhria a, kan aia senior fe mah ni se.

Pu Hminga hi pa-inngaitlawm, zaidam leh nunnem tak a ni a, a hun leh hmun hre tak mai, thusawi hun a thu sawi thiam tak mai a ni a, a thupua zirin sawihonaah pawh debate thiam tak a ni. He House chhunga a thusawi leh chetzia te vawiinah hian ka mitthlaah a la cham reng a. Tin, amah hi a member-puite leh midangte thusawi ngaithla thiam leh dawngsawng thiam em em mi a ni. Member junior zawk te leh midangte tan confidence a pe thiam em em a, mite fuihin, a bikin ka tan pheichuan a hlu leh zualin ka hria a ni. Kawng engkimah thurawn tha tak tak min pe thin a, member kan nih tan tirh te khan he House-a thu ka sawi khan ka nervous khawp mai a, ka thusawi chhunte kha “I sawi tha lutuk, ka rin aiin I sawi tha” te min ti a, kha khan confidence min pe nasa a ni.

Tin, a nunah khan entawn tur kan nei tam khawpin ka hria a. A thusawiah mi chungtlak zawngin thu a sawi ve ngai lova, mi chapo lo tak leh mi pawisawi hlau em em mi a ni. Mahse, thudik chu huaisen taka tan tlat mi a ni. Pa-zahawm tak leh parliamentary ropui takte zinga mi a niin ka hria.

Vawiinah hian Pu Lalhmingthanga, Pu Khawpuithanga leh Pu Lalrinmawia te kan chan ta hi mizo mipuite tan chuan ‘channa ropui tak a ni’ tih hi ka sawi duh a ni e. Ka lawm e.

SPEAKER : Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, tukina kan hruaitu hlui kan sunte: - Pu Lalhmingthanga, Pu R. Khawpuithanga leh Pu Lalrinmawia te hi mi uihawm tak tak vek anni a. A mal mal hian an chanchin sawi dawn ila sawi tur ka nei ve nual a, mahse hun a tam loh avangin Pu Rinmawia hi ka han thlur deuh bik ang a.

Pu Rinmawia hi a tam zawk chuan 'Lt. Col. Lalrinmawia' kan ti thin a ni. Mizoram tan zalenna سوالin kum 20 zet ramhnuai a a awm a, a lo haw leh khan 1987 Mizoram General Assembly Election-ah, kan ngaihthlak tawh angin North Vanlaiphai bial atanga thlantlin a ni. A hnuah candidate a ni leh ta lova, active electoral politics chu a chawlhsan a. Mahse, chuti chung chuan a hmangaih hmasa MNF party-ah rinawm takin a thih ni thlengin a awm a ni.

Ramhnuai atanga lo inkawm ve tawh kan ni a, mimal tak hian 'ka ui em em a ni' tih ka sawi duh a. Hming pawha in ko lo hian, 'Thianpa' tia in ko thin kan ni. A vui ni ah khan cabinet meeting avangin kan tel thei lo lehngal a, 'pawi takzet a ni' tih ka sawi duh a ni.

Pu Rinmawia chanchin hi kawng hnih chauhin ka han sawi ang a. Pakhatah chuan, ka hriatthiam dan chuan, *dik leh tha* nia a hriat vawng tlata, chumi tihlawhtling tur chuan nghet taka ding mi a ni. Rei tak kan inkawm chungin mi pawia sawi ka hre ngai lova, chutiang ang mi tha, amaherawhchu a dinnaah erawh chuan insawhsawn tir har tak a ni a, a tawp thleng, a dik nia a hriat chu vuan mi a ni.

Tin, a dawtah chuan, chhungkaw enkawl naah pa-hlawhtling tak niin ka hria a. Ramhnuai atanga lo haw kan thian tam tak te hi chu chhungkaw enkawl na lam hi 'an ngaihsak taw lo em aw' tih tur annih laiin, ani erawh chuan fa pali a nei a, a upa ber hi B. Sc (Agri.) a ni a, a dawttu hi tunah RD Department hnuai hian hna a thawk a, a dawt leh tu hi M. Com. a ni a, a naupang ber hmeichhia hi BA zirlai a ni. A nupui Pi Chawngzikpuii a fel viau a ni ang a, fate enkawl na kawngah leh in leh lo dinna kawngah hian pa-hlawhtling tak te zing ami a ni a. Hei hi ramhnuai atanga a rawn hawnpui tam tak te leh ramhnuai kal ve lo te pawhin mahni nupui fanaute leh mahni in leh lo enkawl that hi kan ram hmasawna a ni tih hria a kan entawn tur te zinga mi a niin ka hria a.

Pu Lalhmingthanga, Pu R. Khawpuithanga leh Pu Lalrinmawia te kalsan an chhungte hi 'Pathianin awmpuiin thlamuan se' tih hi kan duhsakna a ni e. Ka lawm e.

SPEAKER : Minister zahawmtak Dr. R. Lalthangliana ka sawm leh e.

DR. R. LALTHANGLIANA, MINISTER: Pu Speaker, Session hmasa leh tun inkara helai House rorelna a kan mi pawimawh tak tak, kan thawhpui, ram rawng kan bawlpuite pathum thawt mai kan han chan hi a khat viauin ka hria a. Vawiinah hian

pathum lai maiin mual min han liam san hi pawl ka ti khawp mai a, ‘rilru a khawih khawp mai’ tih ka sawi duh a.

Pu Hminga hi loh theih lohin ka rawn dinna chhan chu - Ka ngaihtuah ka ngaihtuah thin a. PC sorkar lai khan ‘Pu Hminga hi awm ta lo se’ tih zawng te khan ka ngaihtuah thin a, ‘a bul tumtu leh a kipui berte zinga mi ani mai awm mang e aw’ ka ti a, chu chu Zoram mipuiin kan pawm dan anih ka ring a.

Nichinah khan kan thawhpuite khan a chanchin tam tak an sawi tawh a, ka repeat tawh lo ang a. Amaherawhchu, thil pakhat ka hriatchian em em chu, thil hi a hre rei ka ti a, a memory a tha a, kan sawifiah thiamloh sawifiah thiam mi a ni a, talent Pathian-in a pek hi a bik hian ka hria a.

A dang lehah chuan, ‘Ani anga politician thian kawm thiam hi an awm lovang aw’ ka ti thin a, entawn tur hi kei pawhin ka ngah khawp mai a. Saptawngin, a *sociable* a, thian kawm a thiamin kan ngaina a. Nichina kan member zahawmtakin a sawi ang deuh hlek khan, amahah hian political party-a kan nihna ‘barrier’ kan tih ang chi kha awm miah lovin mi hi a welcome thiam em em mai a, hei hi a ropuina a ni a, amahah entawn tur ropui tak a awm a ni.

Ka sawi leh duh chu, *Kohhran Upa* a nihna a rei tawh hle mai a, kohhran upa zingah hian kohhrana loyalty pe, Pathian rawngbawl naa commitment, *inpekna tak tak nei* a nihna hi vawiinah hian ka sawi lo thei lova. Chuvang chuan, a entawn tlakin ka hria a. Thil a tih tawhna lamah chuan a awl lai deuh (MLA anih loh lai) phei kha chuan a buaipui pakhat Biakin sak kha, ‘Pu Hminga Biakin sak’ an ti tawp mai a, chutiang khawp chuan kum eng emaw zat kha a atchilh tawp mai a, mahni in leh lo kalsan te leh thildang tam tak kalsana, a bur tawhna lamah chuan ‘hlawhtling ngei tura inpe mi a ni’ tih vawiinah hian ka sawi chak deuh a ni.

Pu Khawpuia hi kan party-ah chuan kan mitangkai em em a ni a, a rinawm bawka a, a rintlak bawka a, thil a tih tawh hi chu a ti tak tak a, hei hi a ropui ka ti thin a. Tin, chumi piahlamah chuan, kohhranah te pawh ani hi chu hriat a hlawh em em mai a, Synod level committee pawimawha thleng pha zat zat thin ni tein kan lo hria a, vawiinah hian a uiawm em em a ni.

Hei, Pu Rinmawia hi eng emaw chen, underground atanga an lo chhuah hlim atang khan kan thenawmah (Chhinga Veng-a kan awm laiin) kan inhriatna a rei tawh khawp mai a. 1987 State inthlan hmasakber kha ni tain ka hria a, khatah khan North Vanlaiphai bial atangin a tling a. Ka la hre reng a, khami tum khan constituency eng emaw zat chhiar tur kan neih zingah Vanlaiphai bial an han chhiar kha a hmasa ber a ni a, ‘Pu Rinmawia a tling’ tih hi puan hmasa ber a la ni reng mai a. Ani hi ka hriat chian ve em em mai, Ram leh Hnam tana inpe zo hetiang hian a thih ni thleng hian, a bik takin

kan party phei chuan kan hlut em em mai a, ‘kan mipawimawh a tling a ni’ tih hi ka sawi duh a.

Nichinah khan kan ngaihthla tawh a, a specialise-na hi underground sorkarah khan ‘wireless’ kan ti a, inbiakpawhna lamah hian ‘mi bik hi a ni a, a thiam em em mai a ni’ tih hi amah hi chuan a sawi lova, thiante zawng zawng hian, ‘Pu Rinmawia ramhnuai an awm lai khan engnge a chanchin’ han tih hian, an sawi loh theih loh chu, wireless hmanga inbiakna, ‘biakhlata lam hi chu a thiam a ni’ an ti a, hei hi a hlu khawp mai a. Nichina kan ngaihthlak ang khan, mi tam tak khalamah khan a promote in ‘an zir chhuak a ni’ tih te kan ngaihthlak tawh kha.

Hei, vawiinah hian a lungchhiat thlak zawngin sawi ta ila, a lungchhiat thlak ka ti a, ka mitthlain an pathum hian ka hmu ve reng mai a. Hetianga kan han sun tur hi, *Sunna thu* vawiinah hian kan sawi lo thei lova. Engpawh ni sela, Pathianin an kalsan an chhungte ‘a bik taka hruaiin thlamuan zel rawh se’ tih hi ka sawi duh a ni. Pu Speaker, ka lawm e.

SPEAKER : Deputy Chief Minister zahawm tak Pu Tawnluia ka sawm leh e.

PU TAWNLUIA, DEPUTY CHIEF MINISTER: Pu Speaker, vawiinah kan House zahawm taka member chhuanawm tak tak mipathumte sunna hun kan nei hi kan tih tur diktak niin, lehlamah chuan *thil chakawm loh*, mahse, *tul si* a ni a. Member leh hruaitu hrang hrang ten an chanchin ngaihthlak nuam tak tak te an han sawi tawh a, vawiinah hian an pathum hian tawi te te tala an chanchin ka sawi hi ka tih tur ni vein ka hria a ni. A hmasa berin Pu Lalhmingthanga, Dy. CM lo ni tawh, Minister lo ni tawh chungchang hi ka sawi duh a.

Pu Hminga hi 1964 khan Shillong-ah ka chhuk ve a, chutah chuan a lo inbengbel tawh a. In pakhat a pindan lehlamah kan luah a, chutiang chuan a tir te atanga inhmelhriat ve leh, tun hnuah pawh nau anga min entu a ni a. Ani hi ‘mi-entawntlak a ni’ tih kha a tir te atangin hre ve niin ka inhria a, kha pawh kha vawiinah hian ka sawi lang duh a.

Tin, ani hi a bik takin 1998 MLA election dawna MPC leh MNF te kan thawh-tlanna tura kan inbiaknaah khan, an party lamah delegation leader a ni a, kei, keimahni lamah delegation leader ka ni bawk a. Kan pahnih hian kan memberpuite hriat loh hian tihpuitlinna tur ngaihtuah hian kan inhmuh zing em em a, ‘i titlawlh hauh lovang’ kan ti a, a tawpah chuan ama remhriatna ringin tha takin mipuite pawhin min vote tling ta a ni a. Khatah khan a puitlin zia ka hmuin ka hria a, vawiinah hian a chanchin hi sawi nuam em em niin ka hria.

Tichuan, kum 2011 khan MNF Party ah lo lutin kan committee sang ber *Core Committee*-ah a tir atangin min uap lumtute zingah a tel a. A hriselna a lo thatloh deuh takah khan, “Ngawi rawh u, Core Committee te hi chu a buaithlak em mai, Adviser-ah te hian a awm theih chuan” a ti a, chutiang chuan kan President in siam remin, *Adviser* niin a boral ni thleng khan kan party-ah pawh a kula taia tang reng a ni.

Tin, amah hi ‘Stateman dik tak a ni’ ka ti a. rem hriatna hi a nei zau a, thil hi a thiam a, tin, hmathlir (vision) a nei tha a. Mizoram sorkara kan ministry hrang hrangah hian finance leh power lamah chuan a hming hi a langsar hle mai. Chutianga mi fawr nawlh zingah chuan a telin ka hria a ni. Vawiinnia a awm ta lo hi a chhungte pawh ka tuarpui thu ka han sawi a ni.

Tin, a dawt lehah chuan, Pu R. Khawpuithanga hi Champhai High School-ah kan zirlain, hei, kan CM te nen hian kan pawl chung, chung leh anni a, lehkhathiam thei tak a ni. An pawlah hian ka u te leh kan CM te nen hian inpawl tlang anni a. pakhatna atanga pathumnaah hian a awm deuh zelin ka hria. Chutianga mifel tak chu a ni.

Kha kan hre tawh a, underground-a zalenna suala a ram mut khan MNF party-ah khan General Secretary, kan kultai ber a ni. Amaherawhchu, a taksa a hrisel loh luat avangin hotute remtihhain inenkawl turin a hawng a, chuti chung pawhin Tihar Jail ah khan an la tan tir lui talh a, chutiang khawpa ram leh hnam tana mi inpe zo chu a ni a. Kan hriat tak ang khan, kan Party-ah pawh a luhrum zingah MNF Adviser niin a hun tawp thlengin kan kultai a ni a, PAC member pawh a ni thin a ni tih kha ka han sawi duh a ni.

Tin, a dawt lehah chuan, Pu Lalrinmawia hi keini underground-a awm chuan ‘Col. Lalrinmawia’ kan ti a Mizo National Army-ah hian Lt. Colonel a ni a. Nichina kan Minister zahawm takin a sawi ang khan, WT hi a thiam em em a, signal-ah hian kan Chief Signal Officer a ni a. Ramdang sipaite nen kan training-ah pawh signal-ah chuan fawr nawlh khawpa thiam a ni a. Chuvangin, ramhnuiaia kan awm chung pawh khan hmun hrang hranga kan duty-te inhriat pawhna WT kha ama ho hian an thawk a, chu chuan information leh administration kha nasa takin min pui thin a ni. Chu chu a ma tangkai em em bikna, *a special-na* a ni.

Tin, infiamna lamah chuan football thiam tak, ‘goalie’ kan ti a, a pumrua a lian bawk a, ‘goal ven thiam tak a ni bawk a ni’ tih hi vawinah hian ka han sawi tel duh bawk a ni. Ani hi mi nghet tak, a tih tawhah chuan a puitlin hma chu bawhzui tum tlat mi a ni. Vawinah hian kan zingah a awm ta lo hi a ngaihawm hlein ka hria a ni.

Chutiang chuan an pathum hian an chhungte kan tuarpui a, Pathianin harsatna kawng hrang hranga a ven turin ‘an tan ka ngen sak duh a ni’ tih kha ka han sawi duh a ni. Ka lawm e.

SPEAKER : Tunah chuan Pu Lalrintluanga Sailo, sawm ila, *Zawhna & Chhanna* hun kha a la zel tih kha kan hre bawkw dawn nia.

PU LALRINTLUANGA SAILO: Pu Speaker, ka lawm e.

Awle, hei vawiiinah he House zahawm taka ram leh hnam tana lo thawkw tawh kan senior mi pathum lai mai sunna hun kan han hman mai hi a lungchhiatthlak hlein ka hria a. Amaherawhchu, sawi lo thei lova ka inhriat avangin ka hriat ang angte kan hotu leh member dang ten an sawi tawh, he ram tana contribution an neih te han tarlan ve duh ka nei a.

A hmasa berah chuan, Pu Lalrinmawia hi keima nunah hian thuk tak inrawlhna a nei a, ramhnuaiyah remna kan neih thlengin min hruaitu a niin, ani hi (tuna kan Dy. Chief Minister zahawm tak sawi ang khan) ramhnuai sorkarah khan Chief Signal Officer niin leh Chief Record Officer niin hun a hman thin a. Ramhnuai (underground) atanga kan lo hawna kan record neih zawng zawng hi a enkawl na hnuai awm a ni a. Tin, Chief Signal Officer a nihna hnuaiyah hian kei pawh tha takin *signal* ka training chhuak a, kan ramhnuai awm lai khan sawtah Capital Hqrs te, tin, hetah Technical Hqrs te, UT Command leh Kachin lam te link in nitin tlai dar thum ah hian kan inbe vek thin a. Chutianga kan hotu pawimawh tak leh secret lam khawih tu a ni a. Amah atang hian thuruk engmah a leak-out ngai lova, secret vawng thei tak a ni a, a chhuanawm hle a ni.

Tin, clerical lamah a hnuaiyah bawkw hian ka training chhuak a, heng typist tih te leh engkim mai hi a thiam a, *mi-talented* tak mai a ni a, ‘Mizo zingah hian amah ang hi an tam awm lo mang e aw’ ka ti a. Ka hriat sual loh chuan, tawng dang (Mizo tawng ni lo) - English te, Hindi te, Bengali te piah lamah hian tawng chi kua lai a thiam a, thla hnih khat hnam dang zinga a awm hian an tawng hi a thiam deuh zel a ni. Burmese tawng phei chu zia leh chhiar thlengin, WT, ‘dot-dot-dash’ kan tih, inbiakna hman te hian a lo record vek thei thin a. Chutiang chuan operation neihnaah te pawh Burma nen pawh kan inkarah harsatna a awm pawhin sipai leh sipai inkara an secret te awlsam taka lo receive thin tu kha ani a. Amah hi kan ram tan kawng engkimah a pawimawh hle a ni.

Tin, chumi piah lamah chuan, Bangladesh sorkar leh underground Mizo sorkarah khan mi pawimawh tak *Representative* a ni a, Burma-ah te office neiin hun tam zawkw a hman a, signal enkawl na chu ka kutah te a hlan ve thin a, khatiang khan khulaiyah relation engkim siamtu a ni thin.

Tin, tuna an sawi ang khan, amah hi palian tak, hmeltha tak niin, footballer tha tak a nih bakah volleyball leh badminton te pawh a thiam em em a ni. Tin, tui hleuh hi min zirtir nasa em em thin bawkw a, ‘mi-talent tak a ni’ tih kha he House zahawm takah hian ka tarlang duh bawkw a ni.

Chutiang mi vawiinah sun a lo ngai ta mai hi lehlamah chuan kan ram tan a uihawm rualin, keima mi malah pawh ‘hmun thuk tak mai luahtu a ni’ tih kha he House zahawm takah hian ka sawi duh bawk a.

Tin, Pu R. Khawpuithanga hi kan ram tan thuk tak, underground atangin hmun luahtu ani. Tin, amah hi pa-rinawm tak a ni a, a kaihhruaina hnuaiah MNF ruling te niin Secretary, Finance te kan lo enkawl tawh thin a, hengah hian a rinawmzia hi a hre bertu ka nih ka ring a, tin, ‘mi duham lo tak a ni’ tih hi ka tarlan sak duh bawk a ni.

Tin, Pu Lalhmingthanga hi kan inkawm ve tawh chinah, hei, Luangmual-ah hun rei tak Local Council President ka ni tawh a, khulaiah khuan In hmun te neiin an fate nen kan cheng ho thin a, a duham loh zia hi Pu Khawpuia ang thovin chiang takin ka hria a. Kan Bible, Thufingte bung 15-in a sawi kha a takin an hmang niin ka hria a. Duham lo leh mi chapo lo tak anni.

Chutiang mi, vawiinah ram tana mi thawh hlawk tak mi pathum kan lo sunte hi an uihawm hle a. Chutih rualin an chhungte kan tuar puin, vawiinniah “Pathianin an hmun ruak hi hnawh khat sela, awmpui tlat se” tih hi ka tawngtaina a ni e. Ka lawm e.

SPEAKER : Awle, tunah chuan kan ram hruaitu zahawm tak takte - Pu Lalhmingthanga, Pu R. Khawpuithanga leh Pu Lalrinawma te sunna kan nei ang a. Kan vaiin minute khat ngawi rengin i lo ding ang u.

(Member-te minute khat ngawi rengin an ding a).

Thu ang ule. Tuna kan sun takte, an chhungte leh thenrual thate helaiah hian an awm a, tin, tv atangin an lo thlir bawk a ni.

QUESTIONS & ANSWERS:

Tunah chuan *Zawhna & Chhanna*-ah kan kal tawh ang a. zawhna hmasa ber Starred Question No. 1 - zawt turin Dr. K. Pachhunga, Member zahawm tak ka sawm e.

DR. K. PACHHUNGA : Pu Speaker, ka lawm e. Ka zawhna, hon. Minister for Irrigation & Water Resources Department changtu chhan atana ka zawhna chu – “Lunglei South Bial, Thlisam - Ngengpui-zau potential area link road SASCI atangin laih mek a ni a. Farmers ten hlawk zawka thlai an tharchhuah theih nan tui lak sak leh technical support pek tumna a awm em” tih a ni e. Ka lawm e.

SPEAKER : Chhang turin a changtu Minister zahawm tak Pu C. Lalrinsanga ka sawm e.

PU C. LALRINSANGA, MINISTER: Pu Speaker, Member zahawm tak Lunglei South Bialtu zawhna chhanna chu –

“Lunglei South Bial Thlisam - Ngengpui Zau-ah hian tui lak sak leh technical support ruahmanna a la awm rih lo” tih a ni e.

SPEAKER : Zawhbelhna zawt turin a zawhna neitu Member zahawm tak Dr. K. Pachhunga ka sawm e.

DR. K. PACHHUNGA : Pu Speaker, ka lawm e.

Ka zawhbelhna chu – “PM-KUSUM hmalakna hi eng ang te nge kalpui a ni tawh khawngaih takin min hrilh thei em” tih a ni e.

SPEAKER : *Zawhbelhna* zawt turin Member zahawm tak Dr. Vanlalhlana ka sawm e.

DR. VANLALTHLANA : Pu Speaker, ka lawm e.

Minister zahawm tak chhan atana zawhna pakhat ka neih chu - 2019 February khan Mizoram Water Policy kha tlangzarh a ni tawh a, hei, website-ah te kan lo chang thin a, tukin zing thleng khan ka lo ngaihven a, hmuh tur a la awm chiah lo niin ka hria a. Kha kha “Cabinet lamin a pass-pui tawh em, engtin nge water policy-ah hian hmalak zel a nih” tih a ni e.

SPEAKER : Ruling atangin pathum in phar rual thap mai a, han phar leh ula. Awle, member zahawm tak Pu Ramthanmawia ka sawm e.

PU RAMTHANMAWIA : Pu Speaker, ka lawm e. Ka zawhna hi a chhuak hman dawn lo tih ka hriat avangin ka zawt mai ang a.

Pu Speaker, tun sorkarah hian hian –

- 1) Champhai District-ah MI project engzat nge thawh a ni tawh?
- 2) Khawi hmunah te nge thawh a nih?

SPEAKER : A theih ang anga chhang turin Minister zahawm tak, a changtu ni bawk Pu C. Lalrinsanga ilo sawm ang u.

PU C. LALRINSANGA, MINISTER: Pu Speaker, zawhna neitu zawhna kha ka chhang phawt ang a.

‘PM-KUSUM’ kan ti mai thin a, a lampum pawhin. Tun tum chu ka lam chhuak hrim hrim teh ang. PM-KUSUM kha “Pradhan Mantri Kisan Urja Suraksha Evam Utthaan Mahabhiyan Yajana” tih a ni a, a thui khawp mai. Nikum hmasa atang khan

PM-KUSUM hi central scheme a ni a, Mizoram sorkarah unit 200 min rawn pe a. Amaherawhchu a *pro-rata* matching share component hi a buaithlak ang reng a, central-in 50% an tum a, State sorkarin 30%; tichuan, beneficiary hian 20% a tum ve tur a ni.

Hei, ‘matching share 30% hi hmun dangah tumpui kan la nei lo mai awm mang e’ ka ti a. Kan House Leader zahawm tak hian farmers te duhsakin 30% min han tum sak a, chutiang chuan central-ah kan thehthla a, central lamin vendors turte thlanna neiin tender te an han float a, Tata Company hian an rawn chhang a. Mahse, an chhanna ang *benchmark cost* pawh kha an ti leh ngam si lova, chuti chung chuan central-ah Pu RK Singh, Central Union Minister pawh kan zuk nawr nawk nawk a. Tunhnaiah hian Unit 200 bakah unit 1500 central-in min rawn pekbelh leh a. Chu chu a matching share-a kha a buaithlak deuh avangin NABARD funding atangin 1500 matching share ruahmanna kha kan kalpui fel tawh nghe nghe a. Tichuan, avaiin 1700 kha tunah hian farmers te tan ruahmanna 200 chu a kal tawh a, 1500 kha tunah hian pek leh theih turin ‘ruahmanna department-in kan kalpui leh dawn a ni’ tih kha puanna remchang ni se thain ka ring a.

Chutiang chuan, December Ni 16 khan pre-bid khulaiiah a vendor tur thlanna tender an float leh a, tun atanga reilo teah he PM-KUSUM’ kan lam chhen kha, a taka kan kuthnathawktute hnen a thlen kan beisei a ni.

Tin, Dr. Vanlalhlana, Member zahawm tak zawhna kha - Water Policy hi Ni 1.10.2020 khan Council of Minister-in min pass-pui tawh a, a memo leh thil dang dang kha chu ka chhiar vek lo mai ang a, hemi chhungah hian thil ngaihtuah tur kha tam tak a awm a. Tunah hian Water Resource Management Regulation Bill pawh hi ruahmanna kan kalpui a. Amaherawh chu a hautak ang reng a, veng hrang hrang leh khaw hrang hranga tui an lo verh ve ngawt zel mai laia hi regulate ngai a ni a, tih ran pawh kan tum a. Amaherawhchu, a line department hrang hrangte hnen atanga observation leh thil dang dang bill a lut tur a ni a, *Dan*-a siam tur anih avangin uluk taka en a ngai a, kan la inpeih chiah lo deuh a. Law-ah *vet* a ni tawh a, henge hi kan kal chhohpuina tur pakhat chu a ni a. Thil dang dang pawh he mi chhungah hian ruahmanna kalpui tur chu a awm nual mai a. “Council of Minister khan 2020 khan min lo pass-pui tawh a ni” tih kha ka chhanna ni leh ta sela.

Tin, Member zahawm tak tak Pu Ramthanmawia zawhna hi a chhuak hman dawn lova, a zawhna chu a rawn kal a. “Champhai District MI Project engzat nge thawh zawh tawh” tih leh “PM-KUSUM kal mek dang a la awm em” tih kha niin ka hria a.

Champhai Project-ah khan Project pakua kan la a, chuta project hnih chu thawh zawh tawh a ni a, project pasarih la kal mek a ni. Chubakah chuan, tunah hian hmachhawp thar kan nei a, PMKSY hnuaiiah hian *Har Khet Ko Paani*, ‘HKKP’ kan ti a, chumi scheme atang chuan DPR peih fel vek tawh project panga kan nei a. Chungte chu – Phunchawng MI Project (Thekpui), Phaichuan MI Project (Hmunhmeltha),

Lungdup MI project (Dilkawn), Pumphir MI Project (Farkawn) leh Tuikual Zau MI Project (North Khawbung) te hi project thar buatsaih leh kan tum chu anni a.

Kha kha Member zahawm takte zawhna ka chhanna chu a ni e. Pu Speaker, ka lawm e.

SPEAKER : Starred Question No. 2 - Zawt turin Member zahawm tak Pu Lalduhoma ka sawm e.

PU LALDUHOMA : Pu Speaker, Commerce & Industries Minister chhan atan ka zawhna chu hei hi a ni -

- a) Mizoram Sorkar hian Numaligarh Refinery nen Ethanol siam tura indawrna a nei em?
- b) Eng chen nge kalpui anih tawh?
- c) Agreement siam anih tawh chuan, a copy min pe thei em?
- d) Kan ram Economy tan eng ang takin nge tangkaina a neih ang?

Pu Speaker, department chhannaah hian, “Engmah hriat kan nei lo” tih a ni a, kan House leader zahawm tak hi a buaipuitu zawk hi a ni a, aniin min chhan theih chuan a lawmawm awm mang e.

SPEAKER : *Zawhna & Chhanna* hun a tawp ta a, mahse, zawhna kha a laklawh em mai a; chhang hram turin House-in rem kan ti em? (*Member-te: Remti*) Chhan tir mai ang aw. Awle, chhang turin a changtu minister zahawm tak Dr. R. Lalthangliana i lo sawm ang.

DR. R. LALTHANGLIANA, MINISTER : Pu Speaker, zawhna kha ka repeat tawh lo mai ang a, hun a kal chak deuh hlek a. A chhanna chu -

- a) Commerce & Industries Department chuan hmalakna a nei lo.
- b) Agreement siam a awm lova, a copy a awm lo.
- c) Hma la tura Commerce & Industry Department ruat anih chuan, kan ram economy tana a tangkaina tur uluk taka zirchian a ni ang.

Pu Speaker, tawitein ka han chhanbelh lawk ang a. Pu Duhoma sawi ang deuh khan, ka department chan chu ni chiah lo mahse, zawhna a lo kal hian department te hian thil hriat zau nan kan duh ve hrim hrim a.

Ethanol hi organic compound chi khat, pawimawh tak mai a ni a, thil chi hrang hrang siam nan hman thin a ni. A hmanna langsar zual deuh te chu - Damdawi siam nan te, cosmetic siam nan te, petrol 10%-a pawlh dalna atan tea hman a ni a. Chuvang chuan India sorkar hian a ngaipawimawh hle mai a, *Ethanol Blended Petrol Programme* hi India ram state hrang hrangah te hian an kalpui tan mek a, a tum ber chu - *petroleum import tihlem* a ni a. A dang leha chuan, grout-residue tam tak hman tangkai leh kum

2030-ah phei hi chuan 20% ethanol blending-a petrol hi kalpui tura beisei a ni. Chuvang chuan, Petroleum & Natural Gas Minister pawh hian ‘Long-termed Ethanol Procurement Policy’ hi kum 2019 November thla khan a lo tichhuak tawh nghe nghe a, ethanol siam chhuah nan hian *mau* species chi hrang hrang hi a hman theih a, Mizoram mau kan neih tam ber, ‘mautak’ kan tih hi a tangkai em em dawn a. Kum hniha upa annih tawh phawt chuan ethanol siam nan a hman theih vek a ni.

Mithiamte chhut dan chuan, *mau* metric-tonne khatah hian ethanol litre 200-300 siam chhuah theih tura beisei a ni. Chuvang chuan, Mizoram hian mau kan nei tam zia kan hre vek awm e. Tunhnai deuhah company hrang hrang pawh hian an rawn ngaihven a ni tih te pawh hi kan hriat tlan a that ka ring a. Mizoram-in mau kan nei tam zia hriain company thenkhatte chuan an tuipei thu te pawh an rawn thlen tan niawm tak a ni. Chu chu a sawi zau nan ka han sawi a ni. Ka lawm e.

SPEAKER : *Zawhna & Chhanna* hun a tawp a, nichin pawh khan a tawp det det tawh a, mahse pakhat ringawt zawh kha a dikin ka hre lo a, ka mit ka han siai ve deuh a nih kha.

PU LALDUHOMA : Pu Speaker, Thezawl-a ‘Aizawl Tlang Food Fisheries Laboratory’ tiin a inziak a, Fisheries Laboratory te chu khawvelah a awm ka ring lova, hetiangka ka ziah pawh hi ka ring lova. “Food Testing Laboratory” tih tur hi min tihsual sak a nih chuan, a dik khan min tihsak leh thei ang em?

SPEAKER : Ka chiang khawp mai a; he laboratory hi ka hun laia sak a ni a, Member zahawm tak Pu Duhoma khan a ziaq sual chiang khawp mai. Duh tawh mai ang ule.

Tunah chuan *Business* dangah kan kal ang a, Deputy Speaker thlanna kan nei dawn a ni. Kan hriat angin Deputy Speaker hmun a awl a, dan ang thlapin notification kan rawn siam a, nomination file hun bituk te kan siam a, chumi chhung chuan mi pakhat file-na kan dawng a. Hun tiam chhunga midangin an file loh avangin Deputy Speaker kan thlan tur chu Member zahawm tak Pu H. Biakzaua a ni a. Member zahawm tak Pu Ramthanmawia’n a rawn propose a, Member zahawm tak Dr. L. Thangmawia’n a rawn second a. Nomination dang kan hmuh loh avangin Pu H. Biakzaua hi Deputy Speaker zahawm tak atan ‘chuhtu awm lovin thlan tlin a ni’ tih House ka hriattir e. Helaiah hian opposition lakah pawh lawmthu ka sawi duh a, inthlang buai lova fel taka an ti hi lawmthu ka sawi duh a ni.

Tunah chuan kan Deputy Speaker thar zahawm tak chu a thutna hmun turah kan hruai ang a. Kan house leader zahawm tak, Chief Minister Pu Zoramthanga, group leader zahawm tak Pu Zodintluanga leh Pu Lalduhoma te lo chhuak ula, Pu H. Biakzaua chu a thutna hmun turah i lo hruai tlang ang u.

Awle, kan Deputy Speaker khan sawi duh te a nei em, ka han sawm nghal teh ang.

DEPUTY SPEAKER : Pu Speaker, lawmthu sawi ka duh a. Hun min siam sak avangin ka lawm khawp mai.

Pathian hruaina leh kan House leader zahawm tak Pu Zoramthanga leh Member zahawm tak takte hnenah Deputy Speaker atan duhsak taka min thlan avangin lawmthu ka sawi a ni. Ka bial Lawngtlai East mipuite hnenah lawmthu ka sawi duh a, he House zahawm taka rorel turin min thlang a, Mizoram rorelna sang bera thu tura min thlangtu anni a. Hetiang dinhmun luah theia bul min tan saktu annih avangin ka bial mipuite hnenah thinlung takin vawiinah hian lawmthu ka sawi duh bawk a ni.

Pu Speaker, he House zahawm takah hian legislature party hrang hrang kan awm a, chutiang anih laiin Deputy Speaker *nomination* tumahin min file thua lova uncontest-a ka lo awm thei hi lawmawm ka ti leh zual a. I veilama thute hnenah hian buaina leh harsatna, vote thlak leh inthlan hranpa ngai lova min siam avang pawhin lawmthu ka sawi duh bawk a ni. Tin, min propose-tu East Tuipui bialtu MLA zahawm tak Pu Ramthanmawia hnenah lawmthu ka sawi a, tin, seconder-a min tan saktu Lengteng bialtu MLA zahawm tak Dr. L. Thangmawia hnenah pawh lawmthu thinlung takin ka sawi bawk a ni.

Pu Speaker, he House zahawm tak hi thiam tak leh hleih nei lo, lai taka rorelna i kalpui thin hi lawmawm ka ti a. Chumia i hnung lo zui ve tur leh nangmah lo tawiawm tura ka lo awm ve hi lawmawm ka ti a, lawmthu ka sawi duh bawk a ni. Ka lawm e.

SPEAKER : Awle, Dy. Speaker tha tak mai, tawn hriat nei tha tak mai kan nei a. Kan hriat angin, ani hi Lawngtlai lam District Council-ah vawi li lai mai lo thlan tlin tawh a ni a, EM leh hmun pawimawh tak tak lo chelh tawh a ni a. Tin, thiamna lamah pawh BA, B. Ed. niin high school zirtirtu ah te lo tanga experience tha tak nei a ni a, a lawmawm ka ti khawp mai.

LAYING OF PAPERS:

Tunah chuan, *Laying of Paper*-ah kan kal leh tawh ang a, Minister zahawm tak Pu R. Lalzirliana'n, heng: -

- i) Joint Electricity Regulatory Commission for Manipur and Mizoram (Fees, Fines and Charges) (Second Amendment) Regulations, 2020;
- ii) Joint Electricity Regulatory Commission for Manipur and Mizoram (Intra-State Essential Reliability Services Operations) Regulations, 2020;
- iii) Notification on appointment of Er. H. Thanthianga, Assistant Chief (Engineering) of Joint Electricity Regulatory Commission for Manipur and Mizoram to the post of Electricity Ombudsman;

- iv) Joint Electricity Regulatory Commission for Manipur and Mizoram (Recruitments, Control and Service Conditions of Officers and Staff) (First Amendment) Regulations, 2021;
 - v) Joint Electricity Regulatory Commission for Manipur and Mizoram (Electricity Supply Code) (Fourteenth Amendment) Regulations, 2021;
 - vi) Joint Electricity Regulatory Commission for Manipur and Mizoram (Electricity Supply Code) (Fifteenth Amendment) Regulations, 2021;
 - vii) Joint Electricity Regulatory Commission for Manipur and Mizoram (Electricity Supply Code) (Sixteenth Amendment) Regulations, 2022;
 - viii) Joint Electricity Regulatory Commission for Manipur and Mizoram (Electricity Supply Code) (Seventeenth Amendment) Regulations, 2022;
 - ix) Joint Electricity Regulatory Commission for Manipur and Mizoram (Metering for Grid Connected Renewable Energy) (Second Amendments) Regulations, 2022;
 - x) Joint Electricity Regulatory Commission for Manipur and Mizoram (Renewable Purchase Obligation and its Compliance) (First Amendments) Regulations, 2022
- te hi, House dawhkana rawn *lay* turin ka sawm e.

PU R. LALZIRLIANA, MINISTER : Mr. Speaker, Sir, I lay on the table of the House, a copy of each of the following –

- i) Joint Electricity Regulatory Commission for Manipur and Mizoram (Fees, Fines and Charges) (Second Amendment) Regulations, 2020;
- ii) Joint Electricity Regulatory Commission for Manipur and Mizoram (Intra-State Essential Reliability Services Operations) Regulations, 2020;
- iii) Notification on appointment of Er. H. Thanthianga, Assistant Chief (Engineering) of Joint Electricity Regulatory Commission for Manipur and Mizoram to the post of Electricity Ombudsman;
- iv) Joint Electricity Regulatory Commission for Manipur and Mizoram (Recruitments, Control and Service Conditions of Officers and Staff) (First Amendment) Regulations, 2021;
- v) Joint Electricity Regulatory Commission for Manipur and Mizoram (Electricity Supply Code) (Fourteenth Amendment) Regulations, 2021;
- vi) Joint Electricity Regulatory Commission for Manipur and Mizoram (Electricity Supply Code) (Fifteenth Amendment) Regulations, 2021;
- vii) Joint Electricity Regulatory Commission for Manipur and Mizoram (Electricity Supply Code) (Sixteenth Amendment) Regulations, 2022;
- viii) Joint Electricity Regulatory Commission for Manipur and Mizoram (Electricity Supply Code) (Seventeenth Amendment) Regulations, 2022;
- ix) Joint Electricity Regulatory Commission for Manipur and Mizoram (Metering for Grid Connected Renewable Energy) (Second Amendments) Regulations, 2022;

- x) Joint Electricity Regulatory Commission for Manipur and Mizoram (Renewable Purchase Obligation and its Compliance) (First Amendments) Regulations, 2022

Thank you.

SPEAKER : A copy kha han sem rawh u le. (*A copy sem a ni a..*)

Tunah Minister zahawm tak Er. Lalrinawma'n, "The Mizoram Licensing and Regulation of Private Veterinary Hospitals and Clinics Rules, 2022" hi House dawhkanah rawn *lay* se, ka sawm e.

ER. LALRINAWMA, MINISTER: Pu Speaker, I phalnain, "The Mizoram Licensing and Regulation of Private Veterinary Hospitals and Clinics Rules, 2022" chu he House dawhkanah hian ka rawn *lay* e.

SPEAKER : A copy kha sem leh ni se. (*A copy sem a ni a..*) Kan chang kim em? Awle.

MOTION OF THANKS

SPEAKER : Awle, tunah chuan, *Motion of Thanks* ah kan kal ang a. Nimin lama Governor zahawm thusawi chungchang *Motion of Thanks* chu Member zahawmtak Dr. ZR Thiamsanga rawn move turin ka sawm e.

DR. ZR. THIAM SANGA : Pu Speaker, ka lawm e.

Nimin February Ni 7, 2023 Eighth Mizoram State Legislative Assembly, Eleventh Session-ah khan kan Governor zahawm tak Dr. Hari Babu Khambampati chuan he House zahawm takah lawmthu sawina Mizoram Department hrang hrangte hmalakna chhinchhiah tlak tak tak bakah hmasawna pawimawh tak tak a rawn tarlang a. Khang a rawn sawi zawng zawngte kha vawiinah hian ka sawi seng dawn lova. Tin, a sawi bak pawh kha Mizoram sorkarin tun kum kal ta chhung khan hmasawna tam tak sawitur a nei a, engpawh nise, a tlangpui vawiinah kan sawi ang a.

Pu Speaker, kan hriat angin, khawvelah hripui Covid-19 nasa takin a leng a, hun harsa tak Mizoram-in kan tawh a; (Ka han sawi belh deuhhleik ang a, Pu Speaker, i phalnain). Mizoram mai ni lo, India ram pumpui leh khawvelin harsatna tam tak kan tawh a, khawvel ram changkang tak France rama an finance minister pawh Covid-ina an ram economic a tihchhiat lutuk avangin a ma nunna pawh a la hial anih kha, (suicide-in). Chutianga Mizoram pawhin hun khirh tak a tawh laiin kan Governor zahawm takin a rawn sawi zawng zawng kha a vaia han en hian thil lawmawm tak vek niin ka hria a. Hun harsatak karah pawh khan kan State chhungah, a bikin venhimna tihchaknan kan

State sorkarin hma nasa takin a la a. Dan leh thupek chungchangah pawh harsatna lian tham awm lovin sorkarin theih tawp a chhuah a.

Tin, kan border chungchangah harsatna lian tham deuh te pawh kan han tawh a, amaherawhchu khan zawng zawngte pawh kha kan sorkar hmalakna avangin boruak sang tak pawh kha ziaawm takin kan han awm chho te pawh a rawn sawi hi lawmawm khawpin ka hria a. Pu Speaker, kan ramri buai chungchangah hian kan Chief Minister te, kan Home Minister te leh Police lampanga kan hotute leh mipui zawng zawngte thawhhona a tha a, khatiang khawp khan Assam kan thenawm state-in min han tibuai a, a hun taka kan Police huaisen tak te an han che a, sawi tam a ngai lo, an fakawm thlawt a ni. A lawmawm hle a ni.

Tichuan, hetiang dinhmunah hian kan state chu kan hriat angin India rama *Happiness Report* an thlanah pawh khan Mizoram chu India ram state zingah *State hlim bera* thlan kha kan ni nghe nghe a ni. A lawmawm hle a ni. Tichuan, Pu Speaker, ramri chungchangah pawh hian theihtawpin kan sorkarin hma a lakna a rawn tarlang hi a lawmawm khawp mai a. Assam ramria kan Police duty te chenna cheng nuai tamtak senga siam a ni te, tin SEDP sum hmangin inter-state border-a building hrang hrang sak mek te, water supply scheme siamna tura project thawh mek te hi a lawmawm khawp mai.

Tichuan, kan Mizoram Police ten chawl hman lek lovin ruihhlo chi hrang hrang dona chungchangah te pawh theihtawp an chhuah a, kumkhat chhung lek pawha Mizoram Police ten ruihhlo chi hrang hrang internation market-a crore 829 hu vel zet mai an han man te hi kan Police te hi an fakawm thlawt a ni.

Tin, Pu Speaker, kan hriat ang khan Lunglei-ah kangmei nasa tak mai kha a rawn chhuak a, beihpui thlaktu Lunglei Fire Station kha Union Home Ministry-in chawimawina ropui tak *Subash Chandra Aapda Prabandhan Puraskar, 2030* kha a hlan a ni. Khami kan lanna chhan kha chu Lunglei khawpui leh ramngaw ti chhe thei khawpa kangmei hlauhawm tak dona kawngah kan mi leh sa te, Police te leh kangthelh mi ten huaisen taka an thawh avang khan ‘chawimawina pawisa nuai 51 keng’ tuna kan han sawi tak an dawng hi an phu thlawt a ni. Chuvangin, kan Police te rintlak zia leh rikrum thilah pawh an inpeih zia a tilang a ni.

Tin, Pu Speaker sawi hmaih hauh lo tur chu, kan Governor zahawm tak khan kan sorkar *flagship programme*, a bik takin thingtlang miretheite, (khawpui chhungah pawh a ni ang chu) khang ho tana Social Economic Development Programme (SEDP) Phase-I hnuai 1st Instalment beneficiary mi singruk hnenah cheng 25,000/- theuh pek anih thu a rawn sawi te, a vaia crore 150 senso anih thu te a rawn tarlang te leh, Phase-I hnuai 2nd Instalment March, 2023-a zawh hman a beisei thu an sawi te kha a lawmawm hle a. A bik takin thingtlang miretheite tan hei hi a lawmawm hle a ni.

Tin, Pu Speaker, kan sorkar hian Covid-19 hrileng dona kawngah theihtawp a chhuah thu leh tunah hian Covid-19 avanga enkawl pakhat mah kan neihloh thu a rawn sawi te hi a lawmawm a ni. Pu Speaker, Covid chungchangah hian kan hriat angin kan State sorkarin theihtawp a chhuah a, kan Minister te, kan Health Minister leh Health Department te, NGO zawng zawngte leh Kohhran te nen theihtawpa mipuite nen kan thawh tlan avangin, vawiinah hian Covid-19 avanga damlo pakhatmah kan han nei lo ta te hi a lawmawm khawp mai a.

A bik takin tunah hian in National leh State health programme hrang hrang kalpui anih avangin tunah hian nausen thihna rate, *Infant Mortality Rate* leh *Maternal Mortality Rate* te pawh tunah hian a lo ziaawm ta khawp mai a. Nikum lama *Niti Aayog*-ina hriselna hrang hrang tehkhawnga India ram Small State tehkhawngah khan, Mizoram hi hriselna kawng hrang hrang thawhna lamah Small State zinga *ti tha ber* kan ni te hi a va han ropui em! India ram chhungah hian hriselna kawng hrang hrang - National leh State programme kan thawh that avang hian Mizoram hi *Infant Mortality Rate*-ah hian a tlem ber (a hniam ber) 3-na kan ni. Chuti lain Indian ram pum *Infant Mortality Rate* hi 28% lai a la ni. Chuvang chuan, Mizoram hi hriselna kawngah hian kan sorkar hian theihtawp a chhuah a, India rama *pakhatna* kan han ni te hi a lawmawm hlein ka hria a ni.

Tichuan, hei baka Mizorama chhinchhiah tlak tak kan han hmabak tur a chu, Government of India chuan Mizoram *Super-Speciality Cancer Hospital & Research Centre* Aizawl-a din tura project proposal cheng vaibelchhe 700, DAP, JICA hnuaia sum pekna tur pawh tunah kalpui mek a ni a. He rawtna hi a puitlin theih nan Govt. of Mizoram leh JICA, Ministry of Finance leh Govt. of India te chuan Ni 12.1.2023 khan inremna an siam ta te hi a lawmawm hle a. Hei hi chhinchhiah tlak tak a ni.

Pu Speaker, Mizoram hi kan hriat angin cancer tamna state a ni a, sum leh pai tam tak India ram hmun hrang hrangah kan seng thin a. He Super-Speciality Cancer Hospital & Research Centre hi a hlawhtlin chuan, India ram mai ni lo, Asia khawmualpuiah pawh hian a tha ber pawl ni tura rin a ni. Hei hi a lawmawm hle a ni.

Tichuan Pu Speaker, mipuite hriselna uluk taka enkawl anih theih nan administrative approval sanction NABARD hnuaiah sum tam tak kan han hmu chho a, (A figure hi a tam lutuk a Pu Speaker, kan sawi dik lo palh ang e). Tichuan, heng hnuaiah hian Primary Health Centre, Sub-Centre 30, Isolation Ward 19 leh Medical Quarters 23 te sak tharna atan kum 2022 khan pek kan ni a. Tin, tunah hian State Testing Centre, laboratory changkang tak pawh Ni 18.11.2022 khan hawn a ni tawh bawk a. Hei hi a lawmawm khawp mai.

Tin, hei bakah hian Pu Speaker, Mizoram pumah SEDP hnuaia Primary Health Care tihchangtlun nan thingtlang mi retheite ten doctor leh health-worker chhawr ve

pha lo teina health-worker te an neih ve theihna turin *Clinic Centre 230* lai mai Mizoram pumah sorkarin a han buatsaih te hi chhinchhiah tlak tak a ni. Hei hi kan Governor in a sawiloh zinga mi a ni a, ka rawn mention tel a ni.

Tin, Pu Speaker, kan hriat angin, Mizoram hi HIV-ah hian kan la sang khawp mai a, amaherawhchu kan sorkar hian Mizoram Humane Immuno Deficiency Virus (HIV) leh Acquired Immuno Deficiency Syndrome (AIDS) Prevention & Control Rules, 2022 pawm a han ni ta te hi a lawmawm khawp mai a, November Ni 1 khan gazette-ah chhuah a ni tawh a. Hei hian Mizoram-a HIV/AIDS enkawlina atana *State Research Centre* sak tura rawtna te, NESIC hnuaiah Ministry of DoNeR chuan pawmin, he hna hi rei lo Leah tan anih tur thu te hi a lawmawm khawp mai a. Hei hian Mizorama HIV/AIDS dona kawngah pawh ‘nasa takin min pui dawn a ni’ tih hi a lang Chiang hle mai a, a lawmawm khawp a ni.

Tin, Mizoram hi *Association for Voluntary Blood Donation* leh Tlawmngai Pawl hrang hrang, zirna in leh kohhran thalai pawl hrang hrang hma lakna azarah Mizoram chu *Voluntary Blood Donation* ah 90% kan ni thei hi a lawmawm hle a ni.

Tin, hei, kan hriat angin ruihhlo tawlh ruk leh hman sual hi Mizoram mai ni lo, hmun hrang hrangah a hluar hle a, sorkar tan pawh hian luhai thlak tak a ni, Pu Speaker. Chuvang chuan, hemi thuhnun tum hian Excise & Narcotics Department chuan theihtawp an chhuah a. Kum kal ta ringawt pawh khan Excise & Narcotics Department hian mi 4348 an man a, case 4755 an han ziak lut te pawh hi Excise Department staff-te an indaihloh teh lul nen, ‘theihtawp an chhuahna rah a ni’ tih a Chiang a, Excise Department pawh hi a fakawm hle a ni. Tin, hemi bakah heng atanga chhiah pawh hi a tam khawp a, cheng nuai 1,31,38,791 lai mai a han hmu te pawh hi a lawmawm khawp mai a. Hetianga kan Excise Force te indaihlo chung chungah heti zat chhiah an han hmu thei te pawh hi an fakawm hle a ni.

Tichuan kan hriat angin Covid-in min tibuai a, ramri ah kan buai a, ei leh bar kawnga kan buai a hlauhawm hle lai khan, ei leh bar kawngah kan sorkarin theihtawp a chhuah a, mipuiten ei leh bar te kan hniang hnar a, ei rawngbawlina leh tui-alh theih te hniang hnar taka kan awm thu a rawn sawi te hi a lawmawm khawpin ka hria a. Buhfai te pawh NFSA leh Non-NFSA pahniha an lei zawng zawng pawh quintal 6,83,441 lai a han ni te leh chini te pawh quintal 3,270 lai an han lei thei bawk te hi a lawmawm a. Tin, state chhungah hian public distribution system target (TDPS) pawh 100% a ni te hi Supply Department hian hna a thawk nasa hle tih a Chiang a, a lawmawm hle a ni.

Chuvang chuan hun khirh tak karah pawh mipuite ei leh bar bakah tuihlthei te leh ei rawngbawlina gas te harsa lova kan awm te hi sorkarin theihtawp a chhuah a, Pathian khawngaihna a zarah hun khirh tak karah pawh hetiang hian Supply Department

te, kan Minister leh a hoten theih tawp an chhuah a, kan hnianghnar zia Governor-in a rawn sawi pawh hi a lawmawm hle a ni.

Tichuan hei, kan sorkar hian grant-in-aid crore 19 zet mai *Storage and Godown Scheme* hnuaiiah Ministry of Consumer Affairs, Food & Public Distribution atangin kudam hi 10 chuang zet mai an hmu a, chu bakah NABARD sum atang 21 lai sak a han ni leh a. Tunah pawh hian 23 sak tura ruahman mek a han ni te hi a lawmawm khawp a ni.

Tin, pilot project LPG home delivery Aizawl khawpui chhungah veng 36 laiah a han awm te leh District Headquarters hmun hrang hrang, locality 23 lai maia kalpui mek a han ni te pawh hi a lawmawm khawp mai.

Pu Speaker, Agriculture lam hi kan Governor sawi ang khan, sorkar ngaihpaawimawh ber anih thu a rawn sawi kha a lawmawm khawpin ka hria a. A bikin daih rei leh kumhlun (sustainable) lamah tan lak leh zual anih tur thu kan hmu kha a lawmawm hle mai a. Hei, FOCUS hnuaiiah pawh hian District 6 - Champhai, Mamit, Serchhip, Kolasib, Khawzawl leh Saitual-ah te hian kalpui mek a niin, chhungkaw 300, block 12 huamin mi 3,22,500 awmna leh chhungkua 5,500 te awmna hetiang FOCUS hnuaiiah kalpui a han ni tur te hi loneitu, kut hnathawktute tan chuan a va han lawmawm dawn tak em!

Tin, IRDF, NABARD hnuaih hian fund nuai 727 ruahman a han ni te, WRC hmun hrang hrang hectare 484.67 huam chhunga Land Development atana ruahman a ni bawk a. He project hi Mizoram chhunga District 11-a khaw 48 ah cluster 55 huamin ruahman mek a ni a. Heng hi a zawh hnuah phei chuan Mizoram-ah kan buh tharchhuah hi 1211 metric ton laia pung tura ngaih a ni hi a lawmawm hle a ni.

Pu Speaker i phalna-in kan sawi leh ang e. Agriculture lama Sorkar hma lakna hi a chhuanawm khawp mai a. A changtu Minister pawhin Union Agriculture Minister Shri Narendra Singh Tomar hnen atangin *Outlook Agritech Summit and Swaraj Award, 2021* (Best Performing North East State in the Field of Agriculture) a lo dawng tawh a, a ropui hle a ni. Tichuan kum 2011-ah pawh hian ram pum huap *Good Governance Agriculture & Allied Sector in Hill State Category*-ah lawmman pakhatna kan lo dawng tawh bawk a ni. Hei hi a lawmawm hle a ni.

Mizoram District zawng zawngah *family-oriented* SEDP hnuaiiah beneficiary 4,611 ten horticulture trade an thlan bikah Rs, 2,500/- theuh pek a ni tawh bawk a. Tunah hian tomato, dawnfawh leh zikhlum chinah te pawh hlawhtlinna kan nei chho ta a. Kan Dy. Chief Minister bial Tualte khua-ah pawh hian crore 2 kum kal ta khan an lei thei a, zikhlum metric ton 1,600 vel tharchhuah atang khan vaibelchhe 3 chung zel mai kan

lalut te hi a ropui khawp a ni. Tin, kum 2022 chhung khan Mizoram-ah dragon fruit chingtute chuan crore 6 lai an thawkchhuak bawk hi a chhuanawm hle a ni.

Kan sorkarah hian kawngpui leh building infrastructure siamna kawngah hlawhtlinna lian tam tak kan nei a. Mizoram PWD hian kum 2022 chhungin formation cutting ringawt pawh km 351, flexible pavement km 280.5, leh rigid pavement km 212.5, bridge 12 leh building 18 te siam zawh tawh an ni a. Hripui leng karah heting khawpa PWD-in hna an thawk hi a va han lawmawm tehlul em!

Tin, Pu Speaker, Mizoram hmun hrang hrangah NHIDCL leh World Bank ten hna an thawk mup mup mai a. Tunhma chuan ka Bial Champhai te pawh darkar 12 dawn lai kan kal thin te kha a ni a, tunah chuan kan sorkar chaktak hmalakna avangin darkar 4, darkar 5 ah Champhai kan han thleng thei te hi a ropui hle a. Mizoram hmun hrang hrangah kawngpui tha a han awm zur mai te hi, 'he sorkar hi a mu mai mai lo a ni' tih hi Pu Speaker, ka sawi duh a ni. Lawngtlai te pawh nakinah chuan reilote ah kan thleng tawh mai dawn a ni.

Heng hna lian dang - District Court building New Secretariat-a sakna tur sanction nuai 4624 senga 90% kan han zo mai tur te hi a ropui khawp mai a, tunah khuan luah mai theih tura beisei a ni tawh a. Tin, sorkar hian hma sawnna lian tham tak tak a bei chho mek a, NABARD hnuaiah double storage building sak hna khaw 6-ah tluang taka hma lak mek a ni te hi a lawmawm em em a.

Tin, thil pawimawh leh em em chu, Mizoram mipui zawng zawngin kan mamawh, a bik takin thingtlang kilkhawr tui harsatna hmunah tui thianghlim hnianghnar taka kan neih theihna turin Jal Jeevan Mission hnuaiah Ni 16.1.2023 thleng khan thingtlang hmun hrang hrangah *household-tap* chhungkaw 97,423 pek a ni tawh a. Tun thleng hian khaw 224 huam tawhin, 2023 December ah chuan Mizoram khua zawng zawng huam vek tura ruahman a han ni te hi a lawmawm hlein ka hria a ni.

Tin, zirna tha pek hi sorkar thil tum ber a ni a, a rawn sawi te kha lawmawm hlein ka hria a. Samagra hnuaiah School tamtak sak niin, chhunchaw pek chhonzawm a ni bawk a. Tin, zirlai tamtak tan uniform leh lehkhabu te a thlawna pek anih thu a rawn sawi te kha a lawmawm hlein ka hria a. Tin, thil chhinchhiah tlak tak mai chu, High School zirlai Mathematic leh Science subject atan english leh mizo tawnga Zirlai Bu chhuah thei tura ruahman mek a ni a, kum 2023-2024 Academic Session atana hman theih tura ruahman a han ni te hi, a va ropui em! Education Department hnathawh hi a ropui a, State dangah pawh hian a awmin ka ring lo a ni. Hei hi Human Resources Development Board Vice Chairman khan a tlangzarh tawh a. A lawmawm khawpin ka hria.

Chubakah chuan, Mizoram Board of School Education pawhin High School leh Higher Secondary School-a mitdel zirlaite tan *Braille* Zirlai Bu hawrawp (font) liana ziaik lehkhahu lian tak a buatsaih pawh hi a lawmawm hle a ni. Tin, kan sorkar hian State chhunga education quality tha tak kan neih theih nan theihtawp a chhuah mek a. College 21 leh Institution 3 te chu NAAC assessment-ah Accreditation Council in a endik vek tawhin, Accreditation pawh an nei tawh a ni. Hei hi a lawmawm hle a, hmasawna ropui tak a ni. Chu mai bakah Directorate of Higher & Technical Education Office bakah Government College hrang hrangte chu *single use plastic free*-ah puan a ni te hi a lawmawm hle a ni.

Thingtlang lam hmasawna Hnahthial leh Saitual District thar atan District Rural Development Office (DRDO) Office hawn thar a ni te hi hmasawna ropui tak a ni a. Chutiang anih avang chuan District 11-a DRDA zawng zawngte chu District Rural Office-ah siamin, thingtlang lam hmasawna tur scheme hrang hrang kalpui chhonzawm zel a han ni te hi a lawmawm hle a. A bik takin Kawrtethawveng leh Tlabung RD Block-ah Rural Development Block thar hawn a ni te hi a ropui a, chhinchhiah tlak tak a ni.

Mizoram pumah *Ni-100 Inhlawhna* hi a lawmawm ka ti a, sorkar hmasa lamah pawh khan hetiang hi kan la hmu ngai lova, hei hi thingtlang leh khawpui mite tan pawha lawmawm a ni. Tin, Mizoram-ah hian job card 2,13,229 awmin, hetah hian active worker mi 2,14,160 an awm bawk a ni. Heng active worker zingah hian Aadhar nena inthlunzawm hi 98.84% niin, 1,41,891-in *Aadhar Based Payment (ABP)* an dawng thei dawn te hi a lawmawm thlawt a, a chhinchhiah tlak hle a ni.

Tichuan, Pu Speaker, kan sawrkar hian thalaite hmasawna kawng hrang hrangah a bik takin infiamna leh eizawna kawngah chanvo tha zawk siamsak a tum tlat thu a rawn sawi hi a lawmawmin ka hria a. A bik takin sports infrastructure hrang hrangah hmasawna ropui tak thalaite tan kan han neichho dawn ta a, thalaite tan pawh hian tunah pawh eizawna ni thei turin football leh thil dangah te kan han neichho tur te hi a lawmawm hle a ni. Tunah hian sports infrastructure project hrang hrang Lengpui, C. Thuamluaia Mual leh Chawngte-ah te artificial football turf hawn a han ni ta rup te hi a lawmawm hle a ni.

Tin, PMJVK scheme hnuaiah Ni 10.1.2023 khan Kawrthah artificial turf atana project senso cheng nuai 549.91 leh Tuidam-a Laldenga football ground atan cheng nuai 532 zet senga sak a ni ta te hi a a lawmawm em em a ni. Hei bakah hian Ministry of Minority Affairs, Govt. of India chuan PMJVK hnuaiah State chhunga Minority Concentration Area project kalpuina tur ruahmanna a han siam te hi a lawmawm hle a ni.

Tichuan, Pu Speaker, hei State chhungah ruihhlo hmansual venna leh tihziaawmna turin SEDP hnuaiah hian Sethawn-a Jordan Rehabilitation Centre tih changtlunna atan nuai 920.71 ruahman a ni te hi a lawmawm hle a. Kan hriat angin ruihhlo hmansual avanga buai hi kan tam em em mai a, chumi atana sawrkar in ruahmanna a han siam te hi a lawmawm hle a ni. He centre atana civil work te pawh hi tunah hian thawh zawh a ni a. Ministry of Social Justice & Empowerment, Govt. of India in *Integrated Rehabilitation for Addicts (IRCA)* norm a siam angin chhawmdawlna hnathawk turin mi 137 pawh lakluh anni tawh bawk a ni.

Tin, Tribal Affairs Ministry, Govt. of India chuan Tlangnuam, Bilkhawthlir, Zawlnuam, Tlungvel etc ah te *Eklavya Model Residential School (EMRS)* 5 lai din a remti bawk, heng te hi a lawmawm khawp mai a. In sak hna hi reiloteah zawh hman beisei a nih thu a rawn tarlang te hi a lawmawm hle a ni. Tin, Ministry in Darlawn, West Phaileng, Khawzawl, Khawbung, Hnahthial leh Lungsen-ah te EMRS dang paruk sak a remti te leh, a sak hna thawh thuai a nih tur te hi a lawmawm hle a ni.

Industrial Growth Centre, Luangmual leh Export Promotion Park, Lengte-a ruahtui lakkhawlina project thawh zawh a ni te hi a lawmawm khawp mai a. Tichuan, PM-Gati Shakti hnuaiah heng hmun te hi tih hmasawn belh nan sanction a ni bawk a. Smart City project hnuaiah New Market Aizawl tunah hian sak thar mek a ni te hi a lawmawm khawp mai a. Sum sen zat hi NEC pawhin crore 14.50 hi Lunglei market leh Trade Centre sakna tur a ruahman bawk a nih kha.

Chutiang chuan central sorkar hnuaiah project lian tak takte tunah hian Mizoram sawrkarin a kalpui mek te hi a lawmawm hle a ni. SEDP hnuaiah hian tunah hian sangha dil neite tan beneficiary 1261 hnenah 1st installment Rs. 25,000/- theuh pek a han ni te leh, sangha dil siamna atan leh sangha chi nuai 22.40 chu loneitu harsa zawkte hnenah sem a han ni te hi a lawmawm khawp mai a. A vaiin project hlutna hi cheng nuai 2,168. 12 India sorkarin *Pradhan Mantri Matsya Sampada Yojana* hnuaiah sangha lama hmasawna lam hawiin hei hi a pawm tawh a ni.

Pu Speaker, sangha khawi lamah hian hma kan sawn khawp mai a tunah hian. Silchar lama sangha tuihnai vak lo, chemical a an vawnhim ang chi te pawh kha tunhma lamah khan kan chaw lut tam thin a, tunah hi chuan Mizoram pawn atanga kan chawkluh pawh hi a tlem sawt a. Sangha-ah hian kan intodelh mai dawn ni te pawha lang hi a lawmawm hle a ni.

Tichuan, kum 2020-2022 chhunga *Mizoram Rashtriya Gram Swaraj Abhiyan (RGSA)* kalpui tura central sorkarin a pawm zawng zawng chu cheng vaibelchhe 79.45 a ni a. Chuta tang chuan state in 1st installment cheng nuai 100 a dawng tawh a. Tin, RGSA hnuaiah hian *Panchayat Bhavan* Village Council House thar nuai 23 a sak te, Saitual, Khawzawl leh Hnahthial District-ah *District Panchayat Resource Centre*

(DPRC) pathum sak te, Bilkhawthlir-ah Arecanut hnah atanga plate siamna tur project siam te, Thenzawl-a *Handloom Design-cum-Production Centre*, Tuipui Darzo Kai-ah *Rural Homestay* leh *Agro-Tourism* kalpui mek anih thu a rawn sawi te pawh hi a lawmawm khawp a ni.

Khamrang khuaah pawh khawtlang kaihhnawih tourism lama mawhphurhna neia hmalakna kalpui mek anih thu a rawn sawi te hi a lawmawm khawp mai a. Hetah hian Ministry of DoNeR chuan nuai 800 chu NSEIT scheme hnuaiah Khamrang Village Eco-Tourism tihhmasawn nana buatsaih a ni te hi a lawmawm a. *Aizawl Convention Centre* hnuaiah central sorkar PSU scheme crore 46 chu Chite vengah sak mek a ni a, sanction zat hi nuai 236 a ni a. *Mizoram Eco-Tourism* tihhmasawn nan Siaha District Chakkhei-ah *Mobile Ecological Park* siam nan NEC in a pek thu te a rawn tarlang a, hengte pawh hi a lawmawm khawp a ni.

Tin, Transport Department-a sum lakluh November, 2022 thleng hi cheng nuai 2,816.86 anih thu kan hmu a. Tin, Ministry of Port, Shipping & Waterway (MoPSW) chuan Tlawng Lui chu *National Waterway 102*-ah a rawn puang ta rup mai te hi thil lawmawm tak a ni. *Hydrographics Survey* leh *Techno-Economic Feasibility Studies* neihna tur proposal pawh thehluh a ni tawh a. *River Khawthlang Tuipui Inland Water Transport Project* atana infrastructure siamna tur contractor thlang turin e-tender pawh kalpui mek anih thu a rawn sawi te hi a lawmawm hle a ni.

Tin, Pu Speaker, Printing & Stationery Deptt. hi tunhma khan kan hmang tangkai lo hle a. Amaherawhchu, tunah hian he department atanga sum kan hmuh zat kha cheng 8,13,536 lai mai a lo ni a. Stationery bungrua zawrh atanga sum hmuh zat December 2022 thleng hi cheng 9,392,238 lai mai ani te hi, 'he department hi kan hmang tangkai tan a ni' tih a lang a, a lawmawm hle a ni.

Tin, Land Revenue & Settlement Department-a revenue tax leh non-tax khawn zawng zawng December, 2022 thleng khan cheng nuai 524.56 lai a ni a. Hemi hun chhung vek hian registration fee leh stamp duty lak khawm hi cheng nuai 589.70 a ni. Hemi chhung hian LSC 3,311 siam a ni a, House Pass 1352, Land Lease Certificate 281 leh Agriculture Land atan LSC 31 pekchhuah a ni te hi a lawmawm khawp mai a. Kan hriat angin Revenue Department hi an indaihlo em em mai a, Surveyor te pawh kan indaihlo chung chung hetiang LSC leh House Pass tam tawh an han ti chhuak te leh Land Lease eng emaw zat an han tichhuak thei te hi a lawmawm hle a ni.

Tichuan, Department of Tax chuan chhiah a hmuh zawng zawng crore 717, December 2022 thleng an ni thei te hi a lawmawm hle a ni. Tin, Multi-Facility Centre *Lianchhari Run* NEC sum croe 10 hmanga sak mek pawh zawh tep a ni te hi a lawmawm khawp mai a. *Journalist Welfare Scheme* hnuaiah journalist 130 hnenah damdawi lam tanpuina pek a han ni tawh te' journalist chhungte hnenah ex-gratia nuai

7,728,000 sem ral ani te leh kum 2022 December thla chhung khan Kolasib atanga Mizoram Journalist Association member ten Meghalaya tlawhin horticulture leh agriculture kaihnhawih project hrang hrang *on the spot study* nei turin sorkarin a han tir bawk te hi tunhmaa la tih ngailoh ni awm tak a ni a, hei hi a lawmawm khawp mai a. Tin, *Mizoram Journalist Pension Scheme* sorkarin a ngaihtuah mek thu a rawn sawi te pawh hi kan journalist te tan a lawmawm hle a ni.

Pu Speaker, kan Governor in *Motion of Thanks* lawmthu sawinaa a rawn sawi zawng zawng bakah hian Mizoram hi dinhmun harsa tak karah pawh hmasawna hi a zuanin a zuang a. Amaherawhchu, Pu Speaker, i remtihain heta a rawn sawi loh zing a mi pawimawh tak mai, *Mizoram State Health Care* chungchang hi han sawi tel ka duh a.

Mizoram State Health Care Scheme hi MNF sorkar hmasain a din liau liau a ni a. Vaibelchhe 50 corpus-ah a tirah a dah a ni. Tichuan, MNF sorkar hmasa hun chhung khan Asian Development Bank atangin vaibelchhe 117 a dil bawk a. Amaherawhchu, kan sorkar chhung khan a chhuak hman ta lova, sorkar hmasaah khan a rawn chhuak ta a. Tichuan, sorkar hmasa khan kum 10 chhung Mizoram State Health Care an buaipui lai khan Mizoram state budget atangin chengkhat mah hi he healthcare scheme atan hian an dah lova. Tichuan, MNF sorkar 2018-ah a rawn ding leh a, chutah chuan 2019-ah he healthcare scheme corpus atan vaibelchhe 50 a rawn dah leh ta a. Tin, sorkar hmasaah khan healthcare a kan bill theih reng reng hi natna serious, cancer leh eng emaw deuh ang chauh kha a bill theih ta a. Tun MNF sorkar tharah hi chuan natna zawng zawng deuhthaw kan han bill thei ta a. Term hmasa, (sorkar hmasa)ah kha chuan a healthcare-a in register pawh kha sing 4 vel chauh anni thin a, tun, he sorkar tharah erawh hi chuan Health Care Scheme-a in register kha 1,20,000 chuang daih kha kan lo ni ta a. Natna zawng zawng deuh thaw a bill theih a, bat erawh chu bat a ni a.

Tunah hian kan sorkarin Asian Development Bank atangin cheng vaibelchhe 1000 kan han beisei leh ta a, a process a la thui deuh a. Pathian khawngaihna azarah a lo chhuak mai ang a, *ba chu ba* a ni. Amaherawhchu, natna a lo tam a, covid lai a lo ni a, healthcare-ah bill tam tak nitin a lut a ni. Sorkar hmasa khan kum tin vaibelchhe 50 lo dah ta ang se vawiinniah hian vaibelchhe sang tel kan nei tawh ang a, healthcare-ah hian kan buai lovang. Tunah hian party dang hian healthcare hi sawi sawi tur pawh an niin ka hre lo, an sawi duh anih chuan healthcare atan hian sum lo thawh ve ang hmiang. Chuvang chuan, ‘MNF sorkar chiah hi healthcare atana budget-ah sum dahtu a ni’ tih hi he House zahawm tak hmaah hian Pu Speaker ka sawi duh a. Mipui hi kan inhnial kan inhnial thin a. Chuvang chuan, he healthcare-ah hi chuan kan inlungual tlana, kan thawh tlan a ngai a ni tih hi kan hriat a ngai. Kan MLA zahawm takte hian tunah hian 1% vel hi kan hlawh atang chuan kan dah a, MLA hlawh atanga 1% kha chu a tam tham lova. Mizoram pum thla khata bill rawn luta pawh hi vaibelchhe tel a ni. Chuvang

chuan, hemi chungchangah hi chuan insawifiah pawh ngai lovin, he sorkar hian theihtawp hun harsa tak karah pawh a chhuah a ni tih vawiinah hian ka sawi duh a ni.

Pu Speaker, Governor in *Motion of Thanks* hi a vaia han en hian lawmthu sawina tur hliir niin ka hria a. Chuvang chuan, member zahawm tak tak te pawhin rawn sawi vek se ka duh a. Hemi a thusawi tlangpui kan han en hian lawmthu sawina tur hliir Mizoram sorkarin hun harsa tak karah pawh ram venhimna a ni emaw, ei leh bar zawinna chungchangah a ni emaw, hmalakna tur kawngah agriculture a ni emaw horticulture a ni emaw, education-ah a ni emaw, department hrang hrang Fire Department, Excise Department thlengin, an hnathawh hrang hrang a rawn tarlang te hi a lawmawm hle mai a, lawmthu sawina tur hliir niin ka hria a. Chuvangin, he Motion ka rawn put luh hi in zavaia min lo sawipuia, min pawmpui ngei turin Pu Speaker, ka rawn ngen a ni e. Ka lawm e.

SPEAKER : Awle, Governor thusawi chungchanga *Motion of Thanks* Member zahawm tak Dr. ZR. Thiamsanga rawn move tak kha kan sawiho nghal ang a. Member pakhat minute engzat nge kan in pek ang le? Minute 10 hi kan kal dan tlangpui a ni a, chu chu ti mai ang aw? (*House-in a remti a..*)

Awle, tunge han sawi hmasa ang le? Member-te hun hi a chep riau mai a, han ti zung zung rawh u le. A move tha deuh a a hneh deuh che u em ni, in va sawi tha duh lo ve. Han ding rawh ule. Awle, Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka lawm e. Tlemin ka hritlang deuh hlek a, kan tawngfiah lo lai a awm pawhin min lo hriatthiam member-te kan ngen hmasa duh a.

Vawiinah Member zahawm tak Dr. ZR Thiamsanga'n Governor in he House-a lawmthu a sawina *Motion* a rawn pulut hi a lawmawm hlein ka hria a. Ka lawm na em ema chu - Governor thusawi ka han han en a, No. 1 ah khan chiang deuhin a ziaak a; ramchhung leh ramri-ah muanna a awm thuin bul a rawn tan kha lawmawm hlein ka hria. Kan ramah hian he sorkar, Pu Zoramthanga kaihhruai hian Pathian leh mipuite pawikan lo la sawi lo a ni tih hi ka rilru leh taksaah min luah thuk hle a ni tih ka han tarlang hmasa duh a. Chutih rual chuan, ram in economic-ah leh kawng chi hrang hrangin hma sawn mahsela, ramchhungah leh ramri-ah muanna a awm loh chuan ram mipuite kan him lo a ni tih chiang takin a lang a. Chuvang chuan, hei hi 'lawmthu sawina tlak tak zet a ni' tih a lanna niin ka hria a.

Chumai ni lovin, chungah remna leh muanna enkawltu atana force kan neihte enkawlina tur a bik takin tuilet hnua thil la awm ngai lo *Police Hospital* building tha tak 1st Bn. MAP Headquarter, Armed Veng-ah cheng nuai 70 a sak ani leh hawn a lo ni ta te; multi-purpose Football leh Parade Ground tha tak mai siam a lo nih thu te a han

tarlang hi a lawmawm ka ti a. Chutih rual chuan ram him leh him loh enkawltu kan police personnel te tan pawh chona nasa tak niin ka hria a, a lawmawm hlein ka hria a ni.

Tin, a dawt leha chuan SEDP Phase-I chhungkua mi 60,000 hnenah he sorkar hian covid harsa tak karah leh ramri buai hmun li hmun nga kan neih karah leh kan quota min eipuitu, kan ration card a tel si lote khilai kan Mizo unau ten raltlan avanga min chimbuai karah hetiang hi kan sorkarin a sem thei hi a lawmawm ka ti a. Chu mai ni lovin 2nd installment pek leh theuh tur thu a han tarlang phei hi chu thingtlang, ‘zokhaw lama kut hnathawktute tan zalenna a ni hle mai’ tih a langin ka hria a, keini thingtlang bialtu tan phei chuan heng hi a lawmawm leh zual a ni tih ka sawi duh a. (He Governor thusawi Mizoram sorkar hmalakna hrang hrang zinga pawimawh zual a rawn tarlanah hian lawmthu sawina tur ava tam em!)

Tin, Serial No. 3 - Health chungchangah khan Minister of Health & Family Welfare, Govt. of India chuan Mizoram-ah natna kan neih nasat em em *cancer* enkawl na tur atana *Super-Speciality* Cancer Research Centre dinna tura tan hma min laksak, a enkawl tuten he project ₹70, 000 lakhs ngawt mai JICA funding anih theihna tur atana Mizoram leh JICA, Ministry of Finance, Govt. of India inremna (agreement) kan lo nei ta hi a bik takin cancer patient-te tan zalenna leh in nghahna tak tak a ni dawn a ni tih alangin ka hria a, lawmawm ka ti takzet a ni.

Tichuan, Serial No. 5 - Food, Civil Supplies & Consumer Affairs Department chungchang hi a lawmawm takzetin ka hria a. Hun harsa tak karah vawiinah ah hian kan ration sem dan dik leh fel zawka a kal theihna turin *digitization* kalpui a ni te, chutihrual chuan sorkarin Covid avanga harsatna tam tak a tawh chung pawha ram mipuite ei leh bar kawngah harsatna nei lovin min kaltlangpuitu a, ‘sorkar chungah hian lawmthu hi kan sawi hi a va tul em’ tih min ngaihtuah tel tir a ni. Tin, sorkar laipui atangin Mizoram in grant-in-aid crore ₹19.22 hmanga khaw hrang hranga godown min sak sak, entirnan: ka bial Reiek tlangdung - Darlung, Pukzing- ah te leh sak tuma hmalak mek Phuldungsei leh Khawrihnim-ah te hetiang a lo awm ta hi lawmawm hlein ka hria. Godown tha tak hnuaiah eitur thianglim leh him zawk kan lo nei thei dawn a ni tih a langin ka hria a, a lawmawm hlein ka hria. Chutih rual chuan a thawktute quarters thlengin min sak sak hi a lawmawm ka ti a, vawiin-ah hian thinlung takin lawmthu ka sawi a. Chumi piah lamah LPG supply pawh, sorkar hmasaa thinglang sumo service hnung zawng zawng gas cylinder bur ruak an khai dul thin kha hmuh tur a awm lo mai ni lovin, vawiinah chuan *home deliver* he sorkarin Aizawl veng 36-ah a kalpui mek a. Chumi piah lamah district headquarters hrang hrang khaw 23-ah hma a la chho bawh a, thil dangdai tak *miracle* a thlengin ka hria a, vawiinah hian lawmthu ka sawi duh a ni.

Tin, Agriculture Department, Serial No. 6 a rawn tarlan, a bikin heng focus kaltlanga mipuite hamthatna turah keini Mamit District pawh min lo thlang a. Hma chak

taka kut hnathawktuten an lak theihna turin kawng engkima min tanpuina tur lo insat eng ta te leh, a taka kuthnathawk tutena thlai chi an dawn zo zaite leh a enkawlina tur kawng hrang hrang min buatsaih sak te hi a lawmawm hlein ka hria a, khang kha ka han tarlang duh bawk a ni.

Tin, a dawt lehah chuan, PWD-in kawng laih leh kawng hrang hranga hma a lakna kan hria a, thil awm zen zen lo, PHC building keini thingtlang bialtutena kan hrisel loh nikhuaa kan inenkawl vena, chhe em em tawh mai NABARD funding hmanga min han sak sak te hi ka bialah, a bik takin Reiek leh Marpara-ah te bul tan niin tunah hian building tha takin kan sa a, a lawmawm hlein ka hria a. Tun hmaa kan building neihah kha chuan, dik tak chuan inenkawlina pawh kha a tha lova, chumi piah lamah a enkawl tu doctor pawh kum 10 chhung awm ngailo kha, vawiinah hian he sorkar lo din atang hian kan bial PHC panga (5) ah chuan second khat pawh doctor nei lovin kan la awm lova, heng hi a lawmawm hle a, Governor thusawi hi a puitling hle a ni. “Lawmna chang hriat te hi a pawimawh hle a ni” tih Pu Speaker ka tarlang nawn duh a ni.

A dawt lehah chuan, Serial No. 11 - PHE mawlh mai hi a lawmawmin ka hria a. Ka bial hi bung 33 a ni a, he JJM Scheme hmang hian kan Minister zahawmtak hian khaw 33-ah hian vung min chhuahsak theuh a, Reiek tlang chhipah pawh vawiinah hian tui kan pump chhuakin kan herh haw tawh a ni. Chuvang chuan, keini bial khaw 33 ah chuan inthlan leh ah pawh lawmthu sawi nawn an tum khawp mai tih hi ka tarlang duh a, he Governor thusawiah pawh he hmalakna a lang tel hi an lawm hlein ka hria.

Tin, Serial No. 12 - Education chungchang hi; Samagra hi a mak khawp a, kan bialah khuan matric chin chung lam zirna hi pakhat mah a awm lova, vawiinah chuan Reiek te, Phuldungsei leh Silsuri ah te a building nuai ₹100 sengin kan sa mek a. Zirna pawh nikum lamah kan kalpui tan a, zirlaite pawh (zirtirtu an tha thawkhat a ni ang) cent per cent pass in, tun session-ah hian pawl 12 zirna pawh Samagra hnuaiyah kan kalpui chho mek a, a lawmawm hle mai a. Tin, *mid-day meal* min pekna chungchangah hian a lawmawm leh zualin ka hria a. Ei tur tha hmu pha lo ten a hun takah an dawng thei a, a lawmawm takzet a ni.

Tin, Rural Development Department-ah hian thleibik nei miah lova he sorkarin ruling bial 28 ni thin (vawiina bial 27 ni ta), a bikin RD Block kan mamawh em em a, kan pu ber hnena kan sawi pawhin aniin thleibik nei miah lovin, pa ber a nihna hriain opposition bialah hlir mai RD Block min han dah te hi ‘*A va Pathianthu em*’ ka ti a ni. I vei lama mite erawh chuan an rawn Pathianthu hmuhloh thin hle mai a, a pawl ka ti a, an mit tivartu ni ve sela ka duh khawp mai. (Pu Speaker, tawi tein, ka zo tep a.)

Ka sawi leh duh chu - Sports & Youth Services chungchang (Serial No. 15) ah hian a ropui ka ti takzet a. Kawrthah te, Tuidam te, Phaileng leh Mamit-ah te pawh, keini Mamit hi district changkang lo tak, *Aspirational District*-ah te pawh artificial turf

min phah sak mai ni lovin, Sports school nuai ₹3,340/- chuangin min buatsaih sak a, hengah te pawh hian mamawh lehrawn sawi ve ngai lo, inthlahrung tak opposition bialah pawh a enkawltu Minister leh kan CM duh danin tha tak maiin football artificial turf min han phahsak hi ‘rorelna dik hi ava ni em’, tih hi ka sawi duh a ni.

Tin, Mizo Hnampa Pu Laldenga chawimawina tana *Laldenga Football Ground* kan han din te pheikhuch, ‘hnamdang zingah hian kan hmel avamawi em’ tih ka sawi leh duh a. Tin, Serial No. 25 - LAD ah hian ka sawi duh chu, tun hmaa la awm ngai lo VC building kan sa sup sup mai a, ka bialah te pawh kan sa nasa mai a, a lawmawm ka ti a. Hei, Governor thusawia arawn highlight hi a lawmawm tak zetin ka hria a.

Tin, Serial No. 27 – Tourism chungchangah hian, kan la hmuh ngailoh leh kan hriat ngailoh *Tenth International Tourism Mart for North East States* chu Aizawl ah nghah a ni a, ni thum lek chungin nuai ₹152 (nuai za sawmnga pahnih) ngawt mai kan sawrkar sum zemah kan han dahlut thei te hi a lawmawm ka ti a. (Awle, Pu Speaker ka zo dawn e, point khat lek.) Hetah hian *Prashad Scheme* hnuai ah infrastructure for pilgrimage and heritage tourism develop-na atan Minister of Tourism atangin nuai ₹4,488.52 kan han hmuh, December 14 atanga sanction kan nei ta te hi a lawmawm ka ti a, tourism development-ah hian kan thang hle dawn a ni tih kan sawi duh a.

A tawp lama kan sawi duh chu – hei, zin mite kan ni a, khawvel changkang zel a. Civil aviation chungchanga Lengpui Airport cheithatna, State dang atanga kan lo hawa kan zah chem chemna thin anga kha waviinah sut bo a ni ta mek a, changkang zawkin buatsaih a lo ni ta te hi lawmawm ka ti a. Sawi tur tam tak awm mahsela khang kha hun ka neih chungin kan tarlang duh a. Governor thusawi zawng zawng mai hi “pakhatmah hmaih lo hian lawmthu sawina tlak vek a ni,” tiin waviinah *Motion of Thanks* thlawp zawngin ka han sawi a ni e. Ka lawm e.

SPEAKER : Member zahawm tak Pu C. Lalsawivunga ka sawm e.

PU C. LALSAWIVUNGA: Pu Speaker, ka lawm e. *Motion of Thanks* putluh a ni a, sawi a ngai a, kan sawi dawn a ni a. Governor speech serial No. 2 - SEDP atanga tan ka duh a.

Kum 2018 inthlan dawn khan SEDP-ah khan “cheng nuaithum chunglam in dawng dawn; NLUP dawng tawh zawng zawng pawhin in dawng leh vek dawn” tih kha mipui hnena MNF party intiamna a ni a. Sorkarna an han siam hnuah SEDP hi sawi dan hrang hrang he House-ah ngei pawh hian a awm a, kan ngaithla thin a. Nikum 2022 budget session-ah kan House Leader zahawm tak hian, “thla tina cheng singnga tal an dawn theihna tur, an trade thiam zawng thlanga SEDP-a kal turin chungkaw singruk aia tlemlo a bul tan nan cover phawt kan tum” tiin a sawi bawka. Amaherawhchu,

vawiina *Motion of Thanks* kan sawinaah hian, “SEDP cheng nuaithum, nuaithum aia tam, NLUP dawng tawh zawng zawng pawhin in dawng vek dawn” tiha min tiam lai khan Governor’s speech-ah erawh hi chuan “cheng 25,000/- (singhnih leh sangnga) chhungkaw singruk hnenah pek a ni” tih thudik a rawn sawi a, a lawmawm viau a ni. Hei hi thudik tak a ni. Cheng nuai 3 atangin cheng a tak takah chuan 25,000/-ah; SEDP policy hi kan sorkar hian a zuanlawrpui dawr dawr ni hian ka hria a, a pawl ka ti khawp mai.

Tin, hei mai a ni lova, kan Minister zahawm takin Hnam Run ah khan, “SEDP cheng nuai thum chu khawia mi nge maw an sem ang le te an ti a, kha kha a mawl thlak lutuk. Eng vangin nge kan sem loh ang, kan puten an duh chuan” tiin a sawi bawk a. Chuti anih chuan, cheng 25,000/- SEDP-a kan sem hi ‘mipuite kan mawl em vang em ni’ tih vawiinah hian ngaihtuah tham a awmin ka hria a. ‘Engah nge kan sem loh ang’ tih hi mipuiin kan la hre reng a, kan la mawl reng em le tih te hi zawhna pawimawh tak niin ka hria. SEDP cheng nuai 3 dawng tur hian mipui atuata mahin kan dil miah lo, mahse min tiamtu ten min tiam a, cheng nuai 3 dawng turin mitinte kan inbuatsaih a ni. Chuti chung chung chuan tuna kan sorkar hian mipui hnena a intiamna a tihlawhtling rih lo mai pawh ni lovin, sorkar hi a intiamnaah khan a ding lova, cheng nuai 3 atangin cheng 20,000/-ah, tichuan cheng 25,000/-ah a zuang lawr thla ta a ni. Hei hi a pawl em em a ni. Mipui hmaa kan intiam tawhna tihlawhtlin hi kan mawhphurhna a ni. SEDP hi mipui atute mahin ‘min pe rawh u’ tiin an dil miah lo, mahse pek kan intiam a, kan intiam anga tihlawhtlin hi sorkar a intiamtu ina a tihtur, a mawhphurhna a ni.

Chumi avang chu nge ni ka hre lova, kan Governor hian Lunglei Fire Station-a thawktute a lawmpuina thu a rawn sawi a, an huaisenna, an tih tak takna leh an inpekna avanga lawmman an dawn thuin a rawn congratulate a ni. Mahse, a hnuaiah chiah ve thung erawh hi chuan, SEDP heti zat an semnaah hian a congratulate ve miah lo; kan Governor pawh hi a lawm lo a ni ang. Chuvangin, vawiinah hian lawmthu sawina tlak a awm lo a ni tih Pu Speaker, a hmasa berah ka sawi duh a ni.

Tin, a dang ka sawi duh chu, Pu Speaker, agriculture-ah hian a ni a. 2018-ah khan “kan sorkar hunah chuan vai buhfai kan ring tawh lovang” tih kan ngaithla a, 2019-ah, “khawizu leh hnute-tui luanna ramah Mizoram siam kan tum” tih kan ngaithla bawk a. Tin, 2020-ah “chaw, sa, thlai leh oil-a intodelh turin senso sang mahse kan kal dawn” tih kan ngaithla leh bawk a. 2021-ah chuan, “kuminah chaw a intodelh leh mau kan ngai pawimawh dawn” tih kan ngaithla bawk a. Tin, 2022-ah MNF chuan, “Mizoram hi mahni kea din tir theih kan tum” tih kan ngaithla bawk a ni. Chutih laiin chawah hian kan intodelh lova, engah mah kan intodelh lo. Pu Speaker, kan thutiam hi engatinge kan ngaihpaawimawh loh? “Engatinge kan thutiamah hian kan din loh thin” tih hi vawiinah hian ka sawi duh a. Governor’s speech-ah pawh hian chaw a kan intodelhna te, thlai, buhbal, engkimah kan intodelhna leh kan tharchhuah pakhatmah tarlan a awm si lova, kan Governor zahawm tak pawh hian sawi tur a hre miah lo. Vawiinah hian agriculture

bikah hian lawmthu sawina tur a awm lovin ka hria a, chu chu tawitein ka sawi lang leh duh a.

A dang lehah chuan, Pu Speaker, sangha lamah hian han lut leh ta ila. Point 22-naah hian, fish-pond siamna atan beneficiaries te hnenah cheng 25,000/- tanpuina pek anih thu a rawn tarlang a, hei hi a tlem ka ti em em mai a. Sangha-a intodelh tura sangha dil siamna atana cheng khati zah chauh khan tu chhungkua hi nge maw intodelh ang le? Tute mah hian kan tlin lo hrim hrim. Chuvang chuan heng te pawh hi kan Governor thusawiah hian a lawmna thu pawh a sawi lo, a rawn sawi ve tawp mai a ni. Governor thusawi, Motion of Thanks kan sawinaah hian lawmthu sawina tur helaiah pawh hian a awm lo a ni.

Tin, Pu Speaker, a dang ka sawi leh duh chu - phok 15-naah khan, 2021-ah revenue tax hi ₹671.88 lakhs, non-tax-ah ₹113.28 lakhs, total- ₹785.12 lakhs hmuh a ni a. 2022 Governor speech-ah hian revenue tax leh non-tax ah hian ₹524.56 lakhs a nih thu a tarlang a, kum kal ta ai khan ₹260.56 lakhs in kan tlahniam ta a. Hei hi eng nge a chhan? Tin, 2021-ah registration fee and stamp duty-ah ₹1,178.40 lakhs leh 2022-ah ₹589.70 lakhs a ni a. Kan phak lohna ringawt pawh hi ₹588.70 lakhs a ni. Chu chu nikum Governor speech-a rawn tarlan vek a ni. Tin, LSC registration, Residential LSC atan hian 2021-ah 888, 2022-ah 3311 a ni a; hetah pawh hian nikum kan pha lo em em bawh a ni. Nikumah LSC chhungkua eng emaw zat pek anni a, kuminah pawh eng emaw zat pek annih thu a rawn tarlang bawh a ni.

Chuvang chuan, a hniam zawngin kan kal a, hmasawn zawngin kan kal miah lo a ni tih a Chiang a, kan Governor pawh hian lawmthu sawi ngaihna pawh a hre lova, a sawi miah bawh lo. A hniam zawnga kan kal hi a lung a awi lo zawk mai thei a ni. Hmasawn zawng ni lova a hniam zawnga vawiin thleng a kan kal hi a pawh hlein ka hria.

Excise chungchangah khan Pu Speaker, tlem te sawi ve ka duh a. 2021-ah khan nos. of arrested person hi 2112 a ni a, 2022-ah hian 4,348 a nih thu kan Governor hian a rawn sawi leh a; case register hi 2021-ah 2,326 leh 2022-ah 4,755 a ni. (**Speaker:** Kan hun a tawp a, a tawng laklawh lai chauh hi zo mai rawh se aw...) Nikum leh kumina a inthlauhna hi 2,236 a ni a, nikum aiin dan bawhchhia kum khat chhung lekin mi 2,236-in kan pung hman tihna a ni. MLTP Act hnuaiyah hian case register hi nikum aiin kum khat chhung lekin 2429-in kan pung hman bawh.

Chuvang chuan, kawng tinrengin kan sorkar hi a fail a, chu chu Pu Speaker, kan Governor speech atang hian a langchiang em em a ni. Chuvangin, he *Motion of Thanks* hi kan zavai hian 'i do tluk tluk mai ang u' tiin ka rawn rawt a ni.

SPEAKER : Aw le, kan hun a tawp rih a, kan chawl ang a, 2:00 PM-ah kan lut leh ang a. Tin, kan Dy. Speaker-in Pathian hnena office hlanna leh thingpui min inpuina hun a siam dawn a, Member-te kan han inhrilh a ni.

Tichuan, kan chawl ang a, Dar 2 PM ah kan chhunzawm leh dawn nia.
(Recess)

2:00 PM

SPEAKER : Awle, tunge sawi leh ang? Member zahawm tak Pu L. Thangmawia ka sawm e.

PU L. THANGMAWIA : Pu Speaker, ka lawm e. Quorum kan tling thei ta a, ka han sawi zung zung ang a.

Kan Governor zahawmtakin nimin February Ni 7 a House a address-naa a thusawite hi a ropui khawpin ka hria a. Nikum, kum chanve dawnah Covid-ah kan ziaawm tan chho chauh a, inkhawm te pawh kan thei tan a ni a. Chuvangin, a hma lama Covid-in min nghawng dan te han ngaihtuah letin report tur leh sawi tur hi a nei lo mai ang tih kha ka hlau deuh hlek a. Amaherawhchu, Pathian malsawmna te kan dawng a, kan hotute thawhrimna zarah a ziak seng lo a ni deuh ber a, a sawi seng lo a ni deuh ber a.

Tin, Pu Speaker, i vei lama thute khan an chhiar chiang lo deuh anih ka ring a, an han sawi thenkhatah hian. Kan Governor hian a thusawi para 2-naah hian – tun kum kal meka hmasawmna duhawm tak takte leh remna leh muanna Mizoram Sorkarin achieve a neih zawng zawng avangin lawmthu a sawi mai ni lovin, “ka chhuang takzet a ni,” (which make me very proud) a ti hial a ni.

Tichuan, sawi tur tam tak awmah a hmasa berah chuan, Covid-in min han nuai chho a, department lam atang te pawh hian Covid laia kan tawrhna thenkhatte ka dil chhuak a. lockdown order ringawt, an list chhuahna pawh hi phek 3 lai a ni a. Lockdown chi hrang hrang - total te, partial te, a changin AMC area lockdown te kan tawk chho kha a ni a. March Ni 25, 2020 ah lockdown puan tan kha a ni a, kanla hre theuh ang a, June thla thlengin chhunzawm chhoh a ni a. Tichuan, Covid avangin kan sum leh pai leh MLA fund thleng pawhin a phal ho kha chuan kan thawh khawm kha a ni a. Chumi ka sawina chhan chu, “heti chung hi chuan kan flagship programme ber SEDP pawh hi tun term chhung hian kan sem hman lo mai ang a, kan hotuten sem tum hram pawh ni se; sum kan harsa si” tih te pawh ka mimal ngaihtuahnaah chuan a awm a. Amaherawhchu, kan tum tak Covid avangin thleng pha ta lo mah ila, chhungkaw sing ruk hnenah cheng 50,000/- theuh tun financial mekah vawihnih 25,000/- ve vea pek atana kan han ti thei tur hi, kan hun tawn harsa ngaihtuah chuan a ropui ka ti a. Kan

beisei angin kan awmlo tlang theuh a, sorkar pawh, mipuite pawh. Chutih laia inthlan dawna kan lo sawi ngei mai bul tan a ni thei hi a lawmawm a, Governor-in chianguang taka point 2-naa a rawn sawi pawh hi a lawmawm ka ti khawp mai a.

Tin, he Covid kan do chhohna kawngah hian mi 700 chuang hret te chu vanduai thlak takin an boral niin ka hria a Mizoram-ah; boral chhungte ka tawrhpu takzet a. Tin, Governor pawhin a thusawi tawp lamah khan Covid avanga Nu leh Pa chante tan Prime Minister scheme atanga leh a dang puihna tur a rawn ziaklang tel pawh hi a lawmawm ka ti khawp mai a. Tin, he hripui kan do chhohna kawngah hian tlawmngai pawl te, kohhran te, vantlang mipui hrim hrim, khaw tin mai, khawpuiah pawh veng tin mai kan tanrualna hi a ropui takzetin ka hria a. Covid-in min rehsan hnua kan budget session hmasaberah hian ka tarlang ve hrim hrim duh a.

Tin, education bikah hian bung thar kan kai a, India rama a hmasa ber atan, board dangin an la tih miah loh, mathematics leh science bikah mahni tawng ngei, mizo tawng leh sap tawnga zirlaiten an chhiara an zir theih turin a awm ta a. Kan Minister zahawmtak Pu Lalchandama Ralte in November Ni 30 khan pawl 10 bik tan (Board exam nan hmanhmawh thlak anih avangin) kha lehkhabu kha a tlangzarh tawh a; vanneihthlak takin tun thawhtanni khan keipawhin pawl 9 science leh mathematics mizo tawng leh sap tawnga an buatsaih kha ka tlangzarh baw k a. Hei hi Pu Speaker, tuna kan sorkara kan Chief Minister-in a ngaihpaawimawh em em *Mizo Language Development Board* nen pawh inzawmna thui tak a awm a. Mizo Language Development Board pawh hi a taka function thei turin chak taka bawhzui a ni a, office pawh luah tan a ni a, kan hre theuh ang a. Hei hi text book chungchanga ka sawi telna chhan chu, *scientific term* tam tak mizo tawnga kan neih loh hi a la tam em em mai a. ‘Mathematics’ tih te chu ‘chhiarkawp’ han ti ta ila, ‘Science’ tih te pawh hi mizo tawngin kan la nei lova, a ‘science’ tih kha kan pawm tlang dawn nge tih te. Chuvangin, a lehlin hna pawh hi a hautak bik a, hemi lehlin nan hian hah takin kan zirtirtute leh mithiam ten MBSE Academic Officer te kaihhruaina hnuaiah an bei a, an chungah pawh he House zahawmtak kaltlangin lawmthu ka sawi a.

Heti hian, Language Development Board in hma a la chho ang a, heng *scientific terms* leh thil dang dangte pawh hi mizo tawnga dah theih turin a awm ang a. Tunah pawh example chiang tak, he House-ah pawh ka lo sawi tawh - ‘C’ tam tak pawh kan la hmu maithei, khang mizo tawnga awm miah lo ang chi te pawh kha tun kan text book lehlin chhoh kal mek zel turah pawh hian, he *Mizo Language Development Board* hi a tangkai zia kan la hmu chho dawnin ka hria a.

Tin, BDO office pahnih hawn thar a ni te hi a lawmawm khawp mai a. State dang Northeast-ah pawh han en ila, BDO office hi keini Mizoram aia tam an nei a, keini pawhin hawn thar zel te pawh hi ngaihtuah chhoh a thain ka ring a. Covid vanglaia pahnih kan han hawng thei te hi, sorkar kal ta te han en pawh hian thil ropui tak a ni.

Tin, Pu Speaker, pakhat tarlan loh theihloh la awm chu - Mizoram hian a ‘ber’ kan nihna pakhat, *bilingual text book* - science leh maths ah nei hmasa ber kan ni a. A pakhat leha chuan - point 23-naah hian, Survey of India Report, 2021-ah Mizoram hian *forest cover area* state zingah hian kan la nei zau ber a. Hei hi kangmei ven kawng te, tuihna humhalh kawng te, kan tlawmngai pawlten nasa taka an tih leh mipuiin kan support-na rah a niin ka hria a, *pakhatna nihna* a tha lam a ni a, hei hi a lawmawm khawp mai.

Tin, Pu Speaker, Science Centre leh Digital Planetarium, Zohnuai, Lunglei ami hnathawh zawh a ni ta hi a lawmawm a. He sorkar hian sorkar hmasa thiltih tha taka a chhonzawm thin zia a tilang a, a hmun te sawn ve rup rup lovin, a hmun ngaiah tha takin a tizo thei a, hei hi a lawmawm khawp bawkin ka hria a.

Tin, Pu Speaker, a tawp lama Governor thusawi hi rilru khawih deuh mai a awm a. *Lianchhiari Run* sak hna 95% lai thawh zawh a nih tawh thu te; tin, I&PR lamin tuna kan Assembly Session neih mek hi local tv network-ah live telecast min han tihsak thu a rawn sawi te hi a lawmawm ka ti a. Hunte a chep thin avangin lawmthu sawina hun te kan nei thin lova, I&PR Department chungah pawh lawmthu ka sawi tel ni ta sela.

Tin, Journalist Welfare Scheme hnuai hian tun kum kal mekah hian Journalist mi 130 lai mai tanpuina *medical assistance* an pe te leh, jounalist thi paruk lai mai chhungte hnenah ralna *ex-gratia* an pek hi a vaiin cheng nuai 77,28,030 a ni a, a lawmawm khawp mai. Journalist te hi mipui hnena sorkar thiltihte leh an hriat tur min lo thehdarh saktute anni a, henga tana kan sorkarin tih a han nei te pawh hi a lawmawm khawpin ka hria a.

Tin, Pu Speaker, *Drugs & Children Survey in Mizoram* hian kum 2022 chhungin Mizoram Social Defence-ah hian Rehabilitation Board, Social Welfare Board leh Tribal Affairs an han nei te hi a lawmawm hle a. Hetiang survey hi tam zawk pawh kan la ti chhoin ka ring a. Hetiang hian ruahmanna siam hian kan ram dinhmun te pawh a lang thin a, a lawmawm khawp mai a.

Tin, Mizoram hi a ‘ber’ kan nihna phok 8-naah hian a lo lang leh a, a ‘ber’ kan nihna thalam pathum kan Governor sawi - Aibawk Cluster chu SPMRM Rurban hnuai hian cluster-a tih tur component 14, “India ram puma a ti zo hmasa ber anni” tih a rawn tarlang bawk a. Hemi anih theih nan hian Aibawk cluster hnuai thawktu officer te leh mipuite nasa takin an tangin ka ring a. *Pakhatna* nih hi thil harsa deuh mai a ni a, Mizoram pawh India ram level-ah hetiang kan han ni thei hi a lawmawm a. Tin, a bialtu Professor F. Lalnunmawia, S-III, MLA pawh hian thui tak a tihpui pawh ka ring a, a lawmawm khawpin ka hria.

Tin, a tawp berah chuan, Pu Speaker, Covid-in min nuai a han reh chauh laia hmalakna tam tak a han kal thei hi kan hotute thawhrimna leh Pathian malsawmna anih bakah, he sorkar hnathawhah mipuiin theih tawp min chhuahpuina a langin ka hria a. Hei aia ropui leh hmasawmna tam zawk hi kumin chho ah chuan (Covid ten min han reh san deuh tawh bawk a) a beisei theihin ka hria.

Governor thusawi pumpui hi a lawmawm em em a, chuvangin he Motion rawn putluh hi ka thlawp a. Tin, Pu Speaker, rem i tih chuan, Bilingual Text book (India rama a nei hmasa ber kan nihna) i hnenah ka rawn dah tir ang a, library ah nge, House property ah nge; min lo dawn sak theih chuan ka lawm ngawt ang. Ka lawm e.

SPEAKER : Awle, nichin khan quorum kan form lo deuh hlek a minute hnih hnuah khan a tan a ni a. Tunah Member zahawm tak Pu BD Chakma ka sawm e.

PU B.D. CHAKMA : Pu Speaker, ka lawm e.

Nimina kan Governor zahawm tak address, pheh hmasa bera a thusawi kha tlem ka han chhiar chhuak ang a, i phalnain Pu Speaker. - “I would like to invite this august Assembly to witness my government’s commitment to provide an efficient, responsive and accountable administration at all levels of governance.” tih kha a ni a. Tunah hian govt. employees (including the Legislators) te a hun taka hlawh kan la thei lo hian he sorkar hi *inefficient governance* a nihzia a lang chiang hle a ni. Sorkar employee te pawhin kan Chief Minister pawh wawi tam tak an hmuin ka hria a, a hun taka hlawh an lak theih dan tur te sawipuiin. Mahse tunah kan calendar pawh an tidanglam zo tawh a, karkhat (a chang chuan ni 15) pelh hnuah te hlawh lak a theih chauh a ni a, hei hian harsatna tam tak min thlen a. Kan loan lak te a hun pangngaiyah EMI kan pek theih loh chuan bank lamin penalty min pek thin avangin, a huna hlawh lak hi a pawimawh em em a ni.

Tin, para 1 naah narcotic chungchangah sawilan a ni a, drugs, international market-a cheng vaibelchhe 829 man hu lai mai man anih thu te. He thil hi sorkar lamin revenue lakna ringawt a ngaihtuah avanga ‘intentionally a man a ni thei em’ tih te ngaihtuahnah a awm a. A chhan chu, revenue lakna lam ringawt Governor speech-ah hian a lang a. Sorkar hian revenue lakna lam ringawt ngaihtuah lovin, a tihrem dan, a dona lam pang hi ngaihtuah sela a thain ka hria a. Chumi ruala ka sawi duh chu - hei Lunglei Fire Station hi nikum lama wild-fire control chungchangah khan an fakawm hle a, Central Home Ministry lam atang pawhin lawmmanah cash prize 51 lakhs lai an dawng hi lawmawm ka ti a. Khatiang khan mi zawng zawng hi kangmei lakah hmala thei ila chuan a tha khawp ang a.

Tin, para 2 naah SEDP chungchang kha sawilan a ni a. SEDP chugchang hi Governor speech-ah hian kum 4 a lang tawh a, tunah kum khat chauh a awm tawh a, tun dinhmunah 1st installment ah cheng 25,000/- chauh sem a ni a, hei hi kan sorkar economic failure vang kan ti thei ang a. Chuvangin Pu Speaker, SEDP hnuai cheng nuaih 3 sem tur hi sem vat ni sela a lawmawm hle ang. Tunah hian 2nd installment atan cheng 25,000/- chauh an sem dawn tih kha a ni ta a, 1st leh 2nd installment belhkhawm kha 300 crore a ni dawn a. Mahse, nikuma Chief Minister zahawm tak budget speech-ah khan ‘350 crore’ tih kha a ziak lang si a. Chuta tangin 2nd installment an pek dawn chuan crore 300 chauh a ni dawn a ni. Chuvangin SEDP hi *total failure* a ni tih kha a lang a ni. Chumi rualin hei, NEC kaltlangin Central sorkar atangin Lai, District-a Chakma (Bru unaute) development central sorkarin a ngaihtuah hi lawmawm ka ti a.

Tin, para 3-naah health chungchanga Governor speech in a sawilan *Super Speciality* chungchang hi, Pu Speaker, Super Speciality din hma hian prevention ngaihtuah hmasak a ngai a ni; “Prevention is better than cure” sap thufingin a lo tih tawh ang khan. Chuvangin, ‘curative’ ni lovin ‘preventive’ hi engtinngge kan kalpui hmasak theih ang tih kan ngaihtuah a ngai a. Tin, Mizoram-ah Aizawl District hi India ram district zawng zawnga cancer natna vei tamah *pakhatna* nia tarlan a ni a, nikum hmasa kan data enin. Tin, cancer chauh ni lo, hepatitis leh Aids te pawh hi natna hlauhawm tak a ni a. Aids-ah phei chuan Mizoram hi ram India ram pumah *pakhatna* kan ni baw a. Chuvangin, health infrastructure hi ngaihtuah uluk a ngai a ni.

Pu Speaker, Health Minister i nih lain ka bial chhungah Health Sub-Centre leh Health Primary Sub-Center te mi i sak sak tawh a. Borapansuri leh Lawngpuighat ah pawh thla hmasaah khan PHC building sak zawh a ni a, kan lawm hle a. Mahse, tun thlengin AMO hi lak a harsat avangin kan la hawng thei lova, Borapansuri-a Primary Health Centre pawh District Council nen Public/Private partnership mode in a la kal reng a. Tunah hian hei, nichin lawkah chanchin ka hriat danah chuan medical doctor hi Ayush doctor dah a ni a, mahse Chawngte-ah a awm bo daih a. Tunah hian doctor nei lovin Primary Health Centre pawh din tawp a ni. Chutiang chu kan dinhmun a ni a. Tichuan, nangma hun lai khan Pu Speaker, i khawngaihna azarah Sub-Centre pawh kan nei a, mahse vawikhatmah hawn lohin a ding tawp a ni. Chutiang chu Mizoram hi Health chungchanga kan dinhmun a ni a.

Tin Drug trafficking chungchanga khan kan Governor khan revenue lak chungchang ringawt sawiin cheng 1,31,31,291/- revenue lak anih te kha kan ngaihtla a. Mahsela, Pu Speaker, drug trafficking leh drug abuse te hi engtinngge kan do ang tih hi ngaihtuah hmasak a tul zawk a ni.

Tin, Agriculture leh life sector ah pawh nimirah Governor zahawm tak speech-a a lan danah chuan, “Agriculture remains a chief focus of my government, with a mission to enhance sustainable agriculture crop productivity.” tih kha a ni a. Kan Chief

Minister zahawm takin tun term hmasa bera Budget Session-ah khan, “Vai buh hi ei tawh lovin, zo buh ringawt kan ei tawh dawn a ni; buhah kan intodelh dawn” tih kha a sawi a. Mahse tuna kan production-ah engnge kan dinhmun, nakin budget detail discussion-ah kan la hria ang a. Mahse ka hriat danah, tunah hian kan production hi a tlahniam nasa a, agriculture sector-ah pawh tun sorkar hi *total failure* a ni.

Tin, Para 10-naah hian road, bridge leh building chungchang sawilan a ni a. Hei, road-ah pawh Aizawl - Lunglei (via Thenzawl) road hi a chhe khawp mai. Hmun thenkhatah chuan labour (dumka) pathum, pali vel bak hnathawk hmuh tur an awm lova, tin, PWD atangin road roller pakhat, pahnih emaw chauh a awm a. JE leh Engineer te an dil belh thin a, chutiang chu a dinhmun a ni, Aizawl - Lunglei road pawh hi.

Tin bridge pawh, hei, member zahawm tak Pu Nihar pawh a awm a, Phairuankai Bridge hi kan bial lam lifeline a ni a, thla tina repair a ngai a, chuvangin bridge lamah pawh hian sorkar hi a fail a ni. Tin, bridge han sawi takah chuan, Pu Speaker, Lengpui Airport chim kha “a very good example of bad quality” tih a lang Chiang a ni.

Tin, Rural Development chungchangah pawh sawi tur hi a tam khawp mai. Central Sorkarin DRDA hi a thiah tawh avangin Meghalaya, Tripura leh Assam hi District Council huam chhunga RD Block zawng zawng kha an mahni District Council huam chhungah a transfer vek tawh a, mahse tun Mizoram Sorkar-ah hi chuan District Council huam chhungah transfer lovin anmahniin a hranin District Development Office hawn a ni a. Hei hian expenditure tihhniam lam aiin tihsang thei dinhmunah kan awm a ni.

Tin, Air Connectivity pawh Pu Speaker, CADC Golden Jubilee inaugural programme min hmanpuiin i lo kal tawh a, kei pawh ka kal a. Helicopter Ground-ah Art & Culture programme i hmanpui tuma copter a lo kal bak kha chu Chawngte-ah tun thlengin kan hmu tawh lova, a service engtik atangin nge, engvangin nge a tawp pawh kan hre lova. Chuvangin, Air Connectivity Helicopter service hi Chawngte leh hmun pawimawhah a rang lamin lo start leh thei se a lawmawm khawp ang. Pu Speaker, ka lawm e.

SPEAKER : Tunge sawi leh ang? Kan hun pangngai kha dar 4 thleng a ni a, tunge sawi dawn le? Member zahawm tak Pu Lawmawma Tochwawng ilo sawm ang.

PU LAWMAWMA TOCHHAWNG: Pu Speaker, ka lawm e.

Assembly Session 11-na kan Session-a kan Governor zahawm takin a thusawia lawmthu sawina kan neih leh theih hi alawmawm ka ti a. Kan Sorkar hi kum li hmel hmu mek, hnathawhna erawh chu kum hnih tling thathum lo a ni a. Eng emaw zawnga

sawi chuan damlohna tak, damkawr tho leh le le thei, hna han thawk leh theih tawk tawk ang chauh a ni a, chuti chung chung pawha hnathawh sulhnu tam tak kan hmuh tur leh han tarlan tur awm leh thei ta hi a lawmawm hlein ka hria a ni.

Kan lehkhabu rinpui berah chuan, “engkimah lawmthu hril tel zelin” tih a ni a, chuang chuan kan duh ang thil tam tak a thleng lo anih pawhin, kan beisei ang kan hmu nghal rih lo a nih pawhin, lawmthu sawi him in zirtir anih avangin lawmna tur hi chu zawn na na na hi chuan sawi tur a tam hlein ka hria a ni.

A hmasa berah chuan, State ralmuang leh buaina lian tham awm lo, remna leh muanna hnuai tun thlenga kan han awm hrim hrim mai pawh hi a chhuanawm a, a lawmawm a, a man a lei tur ni ta sela India tangka hian cheng tam tak man a niin a rinawm a ni. Chuti chung chung chuan keini Mizoram-ah hetiangka kan hun kan han hmang chho leh mek hi a lawmawm tak meh meuh a ni. Sorkar hi kan ram himna tura kan sipaite leh kan police-te thawhrimna hi a ngaihthah lova, a ngaihsak a. Chuang chuan, Covid-19 hripuiin min tlakbuak chung pawh hian ram humhimna tur SEDP hnuai atanga building te, tui thianghlim in tur te a han ruahman sak theih te, sorkarin ramri leh mipui a chhunga chengte a ngaihthah loh zia tilangtu niin ka hria a. Chu mai bakah chuan hei Police ho tana hospital building thar han sak tur te, Multi-Purpose, Football Stadium leh Parade ground a han siam te tin a dang a tul ang zela mamawhna zualpui han phurhrukna hma han lak belh te leh training center, training school Thenzawl-a a han dah leh te hi thil lawmawm tak a ni a.

Chu bakah chuan Lunglei lampang bik tan pheih chuan Lunglei Fire Station ina kangmei Lunglei khaw pumpui kang thei mai tur kangmei a chhuah laia theihtawpa, mahni nun pawh thapa, khamah pawh lawna kangmei thelh chungchanga lawmman an han hmu thei hi a lawmawm takzet zet a. A hmuna an che te han thlirlet leh pheih chuan an phu tak takin ka hria a, an chhuanawm tak zet zet a ni.

Hei, SEDP hun harsa tak leh hun khirh takah Covid-19 in min tlakbuak chung pawha an han sem tan thei hi, a dawngtute chu an lawm khawp mai; a dawnglo te chu ka sawi sak thei lova. A tam leh a tlem lamah chuan sawi theih ka neih chiah lova, kan hunin a zir loh em avangin. Engpawh nisela, a mamawhte hnenah rahbi rem an lo rah theihna tur atan kan han ti leh thei hrim hrim hi thil lawmawm tak a ni a. Buh pawh hi te reuh tein kan tuh a, a lo thang a, a thang lian zel a, rah tam tak a chhuah ang hian, SEDP pawh bul kan han tan thei hrim hrim hi thil lawmawm tak a ni. A dawngtute tan alawmawm a, ka lawmpui em em a ni.

Nichinah khan member zahawm takin *pakhatna* nihna kan hauh thenkhat an han sawi tawh a, chung zingah chuan han tarlan loh pakhat a awm a, chu chu - Sustainable development growth (intodelhna tluantling) neih thei tura a hmasa ber atana sorkarin hma a han la a, ruahmanna a han siam hi thil lawmawm tak a ni.

Kan sawi vek seng dawn lova. Mizoram nunna suattu tam ber ‘cancer’ laka kan invenna tur, kan inenkawlna tur ruahmanna lo awm thar hi a lawmawm tak meuh meuh a. Chu chu Ministry of Health Family Welfare, Govt. of India hnuai atanga *Mizoram Super Specialty Cancer Hospital & Research Center Aizawl* a cheng vaibelchhe 700, DAP JICA hnuai atanga ruahman a han nih hi a nghahhlelhawm tak meuh meuh a. He thil hi sorkarin a tihpuitlin hunah chuan harsatna tam tak nunna suattu hi chu eng emaw chen chu min sutkian sak ngei ang tih a beiseiawm a ni. Chuvangin ‘sorkar-in mipuite tan theitawp a chhuah a ni’ tih ka tarlang duh a ni.

Chutilain drug, damdawi hmansual chungchangah harsatna kan la tawk erawh hi chu tan lak a ngai hle mai. Lawmman tam tak karah hetiang hi a awm ve lo theih lo a ni. Harsatna kan tawh karah hian thil lawmawm em em mai lo lang chu hei hi a ni a. Mipuiin ei leh bar tur buhfai, gas leh thil dangte tlachham miah lovin kan Chief Minister zahawm tak kaihhruaina hnuai hian ram kan awm a, tumah *mei-alh en* lovin hripui karah pawh kan awm a. A lova kan awm theih si loh chu LPG Board in Mualkhang Bottling Plant, Kolasib-ah a lian zawk, hnianghnar zawka kan neih theihna tura tan ruahmanna tha tak leh fel tak nei a

SPEAKER : Ngawi rawh aw, Chair kan inthlak lawk ang e. Deputy Speaker hi han thu ve teh se.

(Dy. Speaker-in Chair a la a....)

DEPUTY SPEAKER : Chhonzawm rawh le.

PU LAWMAWMA TOCHHAWNG: LPG Bottling Plant lian zawk neih theihna tura ruahmanna, ngaihtuahna ringawt ni lo a tak tak ram thil thleng tura hnathawh awm hi a lawmawm a. Heng hi mumal leh felfai taka tihhlawhtlin anih hunah chuan gas lamah harsatna min phuhruk sak ngei ang tih a beiseiawm tlat a ni.

Kan hriat lar tak kan hriat zui lem loh pakhat chu, Mizoram-a kan thar thei - Dragonfruit leh Lakhuihthei te ram dang UAE leh Qatar-ah te kan han thawncchuak thei hi thil lawmawm tak a ni. Hei hian chona nasa tak min pein ka hria a, “kan ram atang hian thil kan ti ve thei, thil kan tharchhuak ve thei, kan thawncchuak ve thei; miten kawng hmang nei leh awmze nei taka an tih chuan” tih hi min zirtir tu lian tak niin ka hria a. Mumal leh zuala kalpuia duan anih pheih chuan chhenfakawm tak tur a ni a. Kan ram pumpuiah pawh hian hetiang a han tharchhuah mai theih hi thil tam tak a awm si a.

Tin, power generation chungchanga hma kan sawnna - Tlawva Small Hydel Project te, Kawlbem Small Hydel Project tea hma kan sawnna lo lang te pawh hi thil lawmawm tak a ni. Thingtlang kilkhawr berah pawh Power tel loin engmah kan ti thei

lo mek zel a ni a, kan intodelhna tur atana kan Minister zahawm tak tak te hmalakna hi a chhuanawmin ‘lawmthu sawina tur a ni lo em ni’ tih hi ka ngaihtuahna a ni e.

A dang lehah chuan, District Court Building New Secretariat-a lo awm tur te, *Dan leh Hrai* mumal taka kenkawh a nih theih nana hnathawh lo awmte pawh hi thil lawmawm tak a ni. Tin, National Highway Aizawl-Thenzawl - Lunglei siam mek a ni te pawh hi a lawmawm a, tun aia chaka siam anih pawh kan beisei a; tunah pawh hian hna hi a kal mek zel a. Tun hmaa darkar 8 - 9 kan kalna thinah khan darkar 5-ah kan thleng leh thei ta a ni a, hmasawmna tur a la awm a.

Thil lawmawm em em mai chu kan siam theih ni si lo, a loa kan awm theih loh, kan tihpun ngawt theih ni bawh si loh kan humhalh theih a awm a. JJM hnuaia central funding in tinin mahni ina an lo herh haw theih tura tana tui connection kan han nei thei tur te hi thingtlang khua zawng zawng tan chuan kut bengalawm chi a niin ka hria a. He sorkar chhunga hetiang thil lo thleng dawngtu chu a state mipui kan ni a, thil lawmawm tak a ni.

Nichina anrawn sawi tawh ‘bilingual text book’ English leh Mizo high school level-a mathematics leh science subject atan bika a nei hi a tangkai ngawtin ka ring a, thil thar lawmawm tak zinga mi a ni. ‘*Subject Sakei*’ kan tih mai thin kha anni a, heng subject te hi. Mahse tunah chuan mahni tawng ngeia kan lo neih theih dawn chuan thil lawmawm tak a ni. Kan zirlaite tan a tangkai ngawtin ka ring a, a ngaihtuah chhuaktu leh a buatsaitute an fakawmin, *ram ro-ting* te zing ami pakhat anih ngei a beiseiawm tlat a ni.

Tin, Rural Development Block-ah Kawrtethawveng leh Tlabung te hawn a ni a, a lawmawm kan ti. Tlabung RD block phei hi chu nakin lawkah Indo-Bangla border trade hi chhuak mai thei tur a ni a, sorkar hmalakna hnuaiah kawngpui an lai mup mup bawh a, kan inrin hma hian a chhuak mai dawn niin a lang a. Tlabung RD block pek leh hawn kan district chhungah a lo ni hi, ‘a va han lawmawm em aw’ kan ti.

Tin, Sports hnuaia kan hmasawmna hi sawi tur tam tak a awm a, sawi sen a ni lo ang a. A bik takin kan beisei phak loh Chawngte leh Thuamluaia Mual-ah te artificial turf kan han nei leh ta te hi a lawmawm a, heta tang hian Lunglei leh chhim lam atang pawh hian footballer chhuanawm tak tak India ram pawha lang phak, tunah phei chuan a *ber* te zinga mi kan nei mek hi kan lawm tak zet zet a ni.

Kan hun chhunga Commonwealth Games-ah gold medal rit-chawia an han la te hi lawmawm tak a ni a. Lawmthu sawina tur dang tam tak pawh a la awm e, kan sawi seng lo; kan kheuh pilh deuh nian nuan chauh a ni e. Chuti chung chung chuan Governor thusawiah hian ‘he Motion hi i pawm ang u khai, lawm chungin i pawm ang u’ tiin kan han insawm a ni e.

DEPUTY SPEAKER : Tunge sawi leh ang le; sawi tur kan la awm em? Member zahawm tak Pu VL Zaithanzama i lo sawm ang.

PU VL. ZAITHANZAMA : Pu Deputy Speaker, ka lawm e. Nimina kan Governor thusawi hi ka thiam ang angin kan en kual ve a, lawmthu sawina tur an hre khawp mai a, dinglama mi te khan. Uluk taka ka han en hian, lawmthu sawina tur hi ‘a awm lo e’ chu ka ti lova, mahse lawmthu sawina tur erawh hi chu a tam lem lovin ka hria a. Ka han chhiar ka han chhiar hian, a tlangpuiin ‘*SEDP Fakna Bu*’ ni deuh berin ka hria a. Kan Governor kha SEDP a buaipui ve chuan ka ring lo na a tluang mar takin a rawn chhiar chhuak a, a thusawi erawh kha chua a tluang marin a ngaihnam hle a ni.

Pakhatna-ah khan police, ramria duty te chenna leh tui thianghlim in tur ngaihtuah nan cheng nuai 495 zet hman anih thu te kan hmu a. Chung pawh chu SEDP sum atanga hman a ni a. SEDP fakna a ni deuh ber mai e. Amaherawhchu, ka han ngaihtuah a, ramri ah buaina kan nei a, kan police-te kan tir thla a; chung ho tui in tur thianghlim leh an chenna in tak ngial pawh pe thei lo sorkar chu khawvelah hian an awm ka ring lova. Chuvangin, hei hi SEDP fakna lam ni lovin kan tih tur ngawih ngawih, duh anga kan la tih that tawk loh niin ka hre nghe nghe zawk a ni.

Police te hnathawh thata ruihhlo cheng vaibelchhe 829 man zet an man thute kan hmu bawk a. Hetiang zat ruihhlo kan han man hi a lawmawm viau rualin, a lungchhiatthlak in ka hria a. Tunah hian ruihhlo avangin kan ramah kan thalaite an buai nasa hle mai a, kan man aia tam hi a tlangin ka ring a. Chuvang chuan ruihhlo tam tak kan man hi *lawmna* tur ni lovin, *tahna* tur zawk a ni. A rawn luhna lamah nasa leh zuala lo dang tura tan kan lak nasat a ngai tak zet zet in ka hria. Chutilaiin 1st Battalion Hqrs. hospital bulding sak erawh khu chu kan mamawh a, ka sawisel lemlo; police leh police lo tan pawhin kan hman tangkai zel ka beisei a ni.

SEDP chungchang kha an rawn sawi a, thui ka sawi lo ang a. Chhungkaw 60,000 hnenah Rs 25,000/- pek a nih tawh thu te, phase-I hi March, 2023-ah sem zawh hman tum a nih thu te kan ngaihla a. Kumin budget-ah khan vaibelchhe 700 kha dah a ni a, phase-I-ah vaibelchhe 150 an sem a, phase-II-ah chutiang chu sem leh ta ila, vaibelchhe 300 kan sem dawn tihna a ni. Chutiang anih chuan cheng vaibelchhe 400 hi a la bang a, hei hi chu thil dangah kan hman zel niin ka hria a. Chuvangin, SEDP fakna ringawt hi kumin kan Governor thusawi chu niin a lang a ni.

Pathumna-ah khan ‘90% voluntary blood donation’ chungchang kan hmu a, kha erawh kha chu a lawmawm a, kan sorkar tih that pawh ni lem lovin, blood donate-tute tih that a ni.

Drug trafficking chungchang kha a rawn sawiri leh bawk a. Excise & Narcotic Deptt. khan case 4,755 zet a register tih kan hmu a, mi 4,348 man anni bawk a ni. Hei hian tuna kan ram dinhmun a rawn thailang chiang hlein ka hria. Kan ramah hian drug avanga harsatnain kan thalaite a tuam nasa hle mai a, a pung tawlh tawlh a, kan dang hnehlo hle a ni. Kan sorkar hian tun aia nasa lehzualin tan a lak a ngai a ni. *Entirnan* - hmanni lawkah chanchinbu-ah khan ruihhlo siamna atana hman tangkai tak “BE” chungchang kha an rawn zia a. 2020-ah khan litres 1.1 man a ni a, 2021-ah litres 410, 2022-ah phei chuan litres 2,796 chuang zet man a ni. Heti tak mai a ruihhlo lo pung ta hi engtia sawi tur nge hriatthiam a har a, kan sorkar chak loh vang nge, ‘kan sorkar hi a inthlahdah’ tih hi ngun taka ngaihtuahin lawmna tur avang tawlh tawlh ringawt mai hi, Pu Dy. Speaker, khawngaihin hemi ti tlahniam tur hian kan sorkar hi chak leh zuala tan la turin ka ngen a ni.

Food & Civil Supply chungchangah hian *LPG-Home Delivery* chungchang te kan hmu a. Thil pakhat ka han sawi duh chu, LPG Home Delivery hian Aizawl khawpui hi a la tuam hneh lo hle mai a, tih thamin kan la chhawr lo a ni. Ka han zawh kual hian, *delivery-boy* chungchangah harsatna lian deuh an nei a ni; step thui tak tak pu turin mihring duh ang tawk an inhmua lo a ni awm e. Chu ai maha ka rilrua ka ngaimawh, sawi hlawh lem si lo chu, LPG consumer ten gas kan lak a piang maia consumer card xerox copy ken ngai ziah hian ka rilrua lua hle a. Kan ruahmannaah hian sorkar lam leh agent te harsatna phuhruk turin mipui hi min hmang emaw ni chu aw, tih ka ngaihtuah a ni. Vawikhat kan pek te chuan computer-ah an save veka lo tih ve mai awm hi, nitin trip 10 - 15 te kan sem a, a latu zawng zawngina consumer card kan han xerox hi chu keini vawiina helaia thute hi chuan kan problem lemlo maithei e, mi harsa tak takte tan chuan thil hautak zet a ni. A ram puma kan kum khat expenditure hi chhut ila, tul lova kan hman hi a tamin ka ring a. ‘Hetiang lo hian a tih theih lawm ni’ tih ka ngaihtuah a ni. Chuvang chuan, hetiang hi tihtawp dan awm sela ka ti tak zet zet a ni.

Pasarihna kha an rawn sawi hlawm a. Tomato tam tak kan kuthnathawktu ten an thar a, Tualte-ah vaibelchhe hnih man zet an thar a ni. Lakhuihtheih pawh Sialhawk ah metric ton 29,023 lai an thar bawk a, a lawmawm takzet a ni. Amaherawhchu, kan Governor speech-a a lan danah khan SEDP avanga khatiang hlawhtlinna kha lo awm ang deuh khan kan hmu a, ka theih ang angin ka phone kual a. Sialhawk *lakhuihthei* te phei kha chu tunhma kum sawm liam ta atanga an chin tawh, SEDP awm hma daiha chin tawh, tunhnaiah an hlawhtling ta cheng a, a chingtute zinga kan duhsak tlema zawng SEDP kan pe a, SEDP avanga hlawhtling ang zia zanga kan han sawngbawl vel hi chu lawm a ti kim lo a ni. Kuthnathawktu hlawhtling apiang ‘SEDP vang’ kan ti zel dawn a ang riauin ka hria.

Pakuana, Power chungchang kha ka han sawi zawk ang a. Thlawhva Small Hydel Project 5 mW, 11th August-a commission kha lawmawm viau angin alang a. Mahse, ka han chhui kual a, 11th August-ah commission anih rualin December leh

January-ah kha chuan power a generate tawh lo a ni. Pu Dy. Speaker, sum tam tak senga hmasawna ruhrel kan dinte hi 'eng anga hmantlak nge ni dawn' tih mithiamten an en hma hi chuan buaipui loh ni se; sum tam tak kan seng ve si a, power a generate leh si lo hi chuan lawm a ti kimlo takzet a ni. Chuvangin, hetiang hi ching tawh lo turin kan sorkar ngen hi tul ka ti hle a ni.

Tin, *Shamagra Shiksha* hnuai text book leh uniform a thlawna an pek te hi session tantirh hian an dawng ngai lova, zirtirtute an buai thei hle a ni. School thenkhatah phei chuan eng emaw changin first term exam hmaa dawn hman loh chang an nei thin a, naupang leh zirtirtute an buai thei em em a ni. Chuvang chuan, School tan hun chu hriatsa a ni a, a hun taka zirlaibute naupang ten an dawn theihna tura tan lak hi a tul takzet a ni.

A tawp berah chuan, science leh mathematic subject mizo tawnga zir theih tura buatsaih hi tha ka ti a, mizo tawng veka eng school pawhin mathematic te chu high school thlenga zirtir hun hi ka nghakhlel takzet a ni. Engpawhnise, kan Governor thusawiah khan 'lawmna tur a vang hle' tih kha ka sawi theih tawk ni rawh se. Ka lawm e.

DEPUTY SPEAKER : Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Dy. Speaker, ka lawm e.

Kan Governor zahawm takin House a address-a Mizoram sorkar hmalakna hrang hrang a tarchhuahte han en hian lawmthusawina tur tam tak hi awmin ka hria a, a vai phei chuan sawi sen a ni dawn lova. Chuvang chuan, ngaihpawimawh zual tlema zawng han sawi ka duh a ni.

A hmasa bera han sawi ka duh chu - kan Home Department, Police Department-te hmalakna hi a ropui hlein ka hria a. Mizoram leh Assam inkar ramria hmalakna nasa tak kan neih hi a ropuiin ka hria a. Helai a han sawitel ka duh chu - party tin hian ramri hi 'politic khelh nan hmang tawh lo ila' tih hi ka duh a ni, Pu Dy. Speaker. Tu pawh sorkar se, opposition apiangin ramri hi kan invei siak ni hian ka hria a, duh khawp tak tak a awm thei chuang lo. Congress sorkar lai a ni emaw, PC sorkar lai a ni emaw, eng sorkarah pawh ngaihdan leh duhdan tam tak kan nei a, amaherawhchu, hmalakna a awm hlei thei thin lova. Tun sorkarah, kum 2019 atanga 2021 thleng khan harsatna kan tawk a silai te pawh a puak a ni. A tak takah chuan MNF sorkar hian ramriah chuan 'hma ala chak ber a, a la nasa ber a ni' tih hi Mizoram mipui hian an hria. Amaherawhchu hei pawh hi MNF sorkar hian political advantage-a hman tum lovin, he kan ram issue kan neih renga hi fel taka kan kalpui theihna tur chuan *party politics*-a la lova, mipui zawng

zawng kan tanrual theihna tura sorkarin hma a laka, hna a thawh mai hi a tha hlein ka hria a. Tin, ka veilama mite leh Zoram mipuite hian min hriat sak ka duh a.

Ka bial - Vairengte leh a chhehvelah harsatna kan tawk nasa hle a, ramri issue kan nei ta a. Helaiah hian a bialtu ka nihna ang pawh hian vawi tam tak interview turin minrawn sawm ve thin a, amaherawhchu ka hnawl thin; a chhan chu, mimal tute emawin party emaw inchirhtheh nan leh hmingthat lak kan tum hian lung a rual thin lova. Chuvang chuan, ramri issue-ah hi chuan zaikhata kan luan tlan hi a tul hlein ka hria tih ka han sawi rual khan, he sorkar hian hma nasa tak a lo laknaah hian lawmthu ka sawi duh a.

Tin, ka veilama mite leh mipuiten min hriatsak tura ka duh chu, he ramri issue thilah hian, “kan Police duty ten awmna tha tak tak an nei tawh a ni” tih kha ka sawi lang duh a. Aitlang-ah khuan Police duty post tha tak siam a ni tawh a, an luahtut tawh a, current pawh luh vek a ni tawh a ni. Tin, Sabual mualah khuan tunah hian sanction a awm leh dawn hnai tawhin ka hria a, finance lamah kan dil a, hei hi sak leh mai tur a ni a. Tin, Buarchep-ah khuan duty post mumal tak sak a ni a, Saihapui V-ah sak ani bawk. Tin, Vairengte dai silai puahna hmunah khan duty post mumal tak sak a ni a, ‘an luahtut vek tawh a ni’ tih House ka han hrilh duh a.

Tin, Vairengte-ah IR Company Hqrs. tunah khuan sak zawh thawkhat tawh a ni a, Session zawh lam te hi chuan kan hotute, department lamin ruahmanna an siam ang a, hawn theih vat kan beisei a ni tih ka sawi duh bawk a ni. Hemi kawngah hian kan sorkarin theih tawp a chhuahna hi duh khawp chu ani lo maithei e, amaherawhchu, kan kal chinah tunah hi chuan a hmalakna hi a ropui a. Hei hi bul tannaah ngai ila, sorkar lo awm leh zel turah pawh ramri issue hi politics inchirhtheh nan leh opposition tu pawh kan lo la ni ang, advantage lak tum emaw, ramri hmangaih thar hluai ni lovin, kan hunlai zelin kan tihtheih a tam lo anih pawhin, hmalam pana hna kan thawh zel hi a tha awm mang e tih kha ka rilrua awm ka han sawitel a ni. “Kan Police Department hmalakna a ropui tak zet a ni” tih ka han sawi duh a nih chu.

Tin, Pu Dy. Speaker, SEDP ah kan hmu a, hei, a ropui hlein ka hria a. Beneficiary mi 60,000 thlan anni a, tin cheng 25,000/- theuh an account-ah dah niin, March thla chhung hian “cheng 25,000/- theuh 1st phase-a dawng hote khan an dawng leh dawn a ni” tih kan han hmu a, a lawmawm hlein ka hria a. Governor thusawia ziahlan atana ka duh chu, “2nd phase a awm dawn a, chhungkaw eng emaw zatin an la dawng leh dawn a ni” tih hi. Hei hi ziahlan tel theih te phei chu ni se chuan a ropui leh zual dawn mang e aw ka ti a ni.

SEDP kan kalpui chhoh danah natna hripui Covid avangin khawvel, India ram leh Mizoram pawhin harsatna namenlo kan tawk a. Amaherawhchu kan sorkar *flagship programme* anih angin, thei leh thei lovin kan neih ang angin mipui kuthnathawktute,

huan lo rama ei zawngtute kan chhanchhuah theihna turin kan ngaihpawimawh zia tihlanna tura tan tiin; kan tum ang leh kan ruahman angin vawikhatah kal thei lo mah ila, kan ngaihpawimawh zia tihlanna tura SEDP kan kalpui thei hi a lawmawm hlein ka hria a ni.

Tin, Pu Dy. Speaker, PWD lama hmalaknate a ropuiin ka hria a. Mizoram-ah kawng km 351 laih zawh a ni te hi helai sawi loh thei lovah ka ngai a. Assam leh Mizoram ramri issue thilah pawh khan km tam tak mai kan bial chhungah, kan bial nilo (Tuivawl bial, Kolasib bial leh thlanglam) ah te pawh kawng thar tam tak mai laih a ni hi a ropui a. Kolasib DC leh kan Sub-Headquarter YMA hruaitute ruahmanna leh anmahni enkawlanaa khuti zat kawng laih a han nite khu a ropui tak zetin ka hria a. Eng ang pawhin ramri hi zu duh thuiin zu hauh thui mah ila, kan chenchilh lova kan tuaihnum siloh chuan awmzia a awm lova. Chuvang chuan ramria hma kan sawn theihna turin kawng tam tak laih a ni a, heng kan kawnglahi te hi a chhawrtu chu a chheh vela cheng mipuite an ni. Tunah hian Vairengte leh a chheh vel khua zawng zawngah khuan ramri kawnglahi avangin kan huan leh lo ramah te motor a han lut thei ta a, tun dinhmuna hmunphiah an lak te pawh awlsam takin a chingtute pawhin motor-in kan la chhuak thei tawh a. Hei hi *Ramri Venhimna* anih rualin, ram hmasawmna a ni a. Tin, a chheh vela cheng mipuite chhawr tangkai anih hi lawmawm hlein ka hria a.

Tin, helaiah hian ziah tel atana ka awm em em mai thil pakhat a awm a. Tunah khuan ramri kawng, hmanhmawh taka DC leh Sub-Headquarter YMA te hmalaknaa an laih kha a maintenance, a chei-hnum hna thawh mek a ni a, khung te khu a lawmawm hlein ka hria a. Hengte hi ziahlan theih ni pheise chuan ‘a lawmawm leh zual dawn mang e aw’ tih kha ka rilruah a awm a, chu chu ka han sawi duh a ni.

Tin, JJM hnuaiah hian hmalakna nasa tak mai a awm a. A bik takin keini ang thingtlang bial, thingtlangah pawh kilkhawr tak tak kan ni a, chuvang chuan JJM hi kan tangkai hle a. Chhengkaw 97,834 lai mai JJM hian a cover te, khaw 224 a cover chho mek te hi a ropui ka ti a. Kan bialah pheise chuan tui hi a harsa ang reng khawp mai a, sorkar-ah ruahmanna kan thlen a, kan dil a, Saipum-ah tuilak tur tha a awm mai loh avangin Tuirial tui pump te kan han dil a. Hmalakna te a han kal chho a, JJM hnuaia tender chhuah tawhte pawh cancel lehin khawtlang mipuite nen a tangrualin hma kan lakna te sorkarin mi a support chho zel a. Hengte hi a chhawrtu kan ni a, kan lawm takzet a ni tih kha kan sawi duh bawka a ni.

Tin, Pu Dy. Speaker, Education Department lam hmasawmna leh hmalakna te hi a ropui hlein ka hria a. Helaia Govenor ina a sawi ni lo, sawi tel chak deuh mai ka nei a. Kan Education kalphung hi a ropui sawt viauin ka hria a. State dangte pawhin kan education leh MBSE kalphung zir chianna te hmanni lawkah an rawn nei kha kan hria ang a, hengte hi a ropui hlein ka hria a. Tin, ‘SEDP teacher’ kan ti a, sikulah zirtirtu indaihlohna tam tak a awm a, pension leh thihna a vang tein post ruak tam tak a awm a.

Chutah chuan SEDP teacher 700 chuang lai mai kan han la thei te hi a ropui hlein ka hria a. Heng a vang hian keini bial angah te phei chuan zirtirtu pahnih/thum lek awm tawhnaah classroom daihin zirtirtu 4 emaw, 5 emaw kan han nei ve thei a, zirna pawhin hma a sawn hle a ni tih kha ka sawi duh a ni.

Pu Dy. Speaker, lawm thusawina tur tam tak ka nei a. A bik taka ka rilrua awm, a tawpna atan han sawinawn leh ka duh a chu - Politics hamthatna lak tumin ramri hi eng party mah hian MNF ani emaw, Congress ani emaw, ZPM ani emaw, BJP ani emaw opposition laia vei thar vak emaw, ruling laia ngaihven leh si lo hi a fuh loin ka hria a. Zoram mipuiin an hria a, tun sorkar ina hma a lak dan pawh an hria, amaherawhchu, ‘duh khawp chu ani e’ kan ti lo. Chuvangin, he sorkar hi ramri thilah chuan ‘a la thleng thui ngam ber a ni’ tih erawh hi chu ka sawi duh a ni. Ka lawm e.

DEPUTY SPEAKER : Awle, Member zahawm tak Pu Lalrindika Ralte ka sawm e.

PU LALRINDIKA RALTE: Pu Dy. Speaker, ka lawm e.

Hei, vawiina kan sawiho mek hi Governor thusawi chungchang a ni a, a tha lai lawr a ni a, a thatlohna han sawi em em tur chu a awm lo turah ka ngai a. Amaherawh chu, hemi hrula hian ka ngaihpawimawh leh duh khawp lohna lai te han sawilan ve ka duh a.

Pakhatna-ah khan kan Police te hnathawh that chungchang te, drugs leh a kaihhnawih man chungchang te sawi a ni a, a lawmawm a. Chutihruah erawh chuan, kan bial mipuiten harsatna kan tawh nasat em em leh Vairengte lamah pawh kan buaina chungchang sawi tel a ni lo hi a pawi ka ti a. Dan lova thil lo lut ve ve, *a then an man a, a then an man lo* laia hi, sorkarin sawi ve tur a nei lo hi a pawi ka ti a. Hei hi hun lo kal zel turah chuan sawilang ve ngei tawh turin sorkar hian hma la se ka duh bawk a ni.

Tin, *Pahnihna*-ah chuan SEDP chungchang te sawi lan a ni a. Tin, SEDP hi miin an nghakhlel a, tin, sorkar pawh a intiam a, sorkarna te pawh an chan phah a. Amaherawhchu, kan hmuh ang hian term hi a liam tep tawh a, kum khat tha pawh a awm tawh lova. Chutih lai chuan chhungkaw engemaw zat chuan SEDP avangin hlawhtlinna an nei tawh, tih te ngaihthlak kan inbeisei laiin, a kum tawpna tur, term tawp kal mekah ‘2nd instalment’ tih te kan la sawi hi chu a dik lovin ka hria a. Tin, mipui beiseina siam saka, an beiseina tih hlawhchham hi a pawi ka ti a. Beiseina hi tih khawtlai ringawt pawhin mi rilru kan tina thei a, tin, beisei ang tih hlawhtlin miah loh phei chuan, mipui rilru hi eng ang tlukin nge a nat ang tih hi hriat thiam phak pawh a ni lovin ka hria a. Engpawh nise, sorkar hian hemi chungchangah hian theitawp chhuah se tiin ka ngen duh bawk a ni.

Tin, *Pangana*-ah hian “buhfai te, oil te kan hnianghnar tawk”, tih te sawi a ni a. Helaiiah hian ka han sawi tel duh chu, oil chungchang hi a ni. Oil chu kan hnianghnar a ni mai thei a, mahse kei chuan ka ngaih pawimawh chu, ‘kan oil hi a thianghlim em’ tih hi a ni. Oil thianghlim hi a pawimawh a, hemi chungchangah hian chak takin kan sorkar hian hma la se ka duh bawk a. Tin, hengah hian oil thalo kan hman avanga kan motor/kan lirtheiin a tawrhna hi, ‘kan economy ah sum tam tak kan seng a ni’ tih hi kan hriat a thain ka hria. Chuvang chuan, oil hi hnianghnar taka a lo thlen chu kan duhthusam a nih rualin, ‘a thianghlim tha em,’ tih hi a pawimawh lai ber a niin ka hria a. Hemi kawngah hian nasa leh zualin sorkarin hma la se ka duh bawk a ni.

Tin, cooking gas *home delivery* chungchang hi ‘closely monitored’ an ti a. Hemi chungchangah hian sawi a tam ang reng a. Mipui tana sorkar ding anih avangin home delivery hi mipuite harsatna tur zawk anih, chuan kei chuan tih loh a thain ka hria a. Chuvang chuan, mipuite duh dana kan kal hi a thain ka hria a ni.

Tin, point 10-na ah hian Lengpui Airport chei that chungchang te sawi a ni a. Sawi tur tam tak ka nei lova, amaherawhchu khu Lengpui Airport chei that khu kan hre vek a. Tin, a, thil chhawng hi kan ngaihlu viau mai hian a hriat a, khu lai pawh khu uluk taka sorkar hian a enzui thain ka hria a. Thil hi kan ti anih pawhin ‘mipuite tan hman tlakin kan ti tur a ni’ tih hi ka sawi tel duh bawk a ni.

Tin, JJM chungchang hi, tui connection hi a pawimawh em em a, central sorkar hmalakna te pawh a ni a. Amaherawhchu kan harsatna chu, a *tap* chu a thleng, hmun tam takah chuan, mahse kan mamawh ber chu a *tui* a ni. Chuvang chuan, tui tel lova va thlun zawm ringawt chuan kan mamawhna a phuhru lova. Hetah hian ‘tui hi kan mamawh a ni’ tih hi sorkar hian min hriat sak se thain ka hria a. Tin, a *pipe* chungchangah hian sawi a tam a; *thir-pipe* a ni tur a ni a, amaherawhchu *plastic-pipe* hmanna tam tak a awm a, hei pawh hi enchian deuh a thain ka hria a ni.

Tin, 14-na ah khan lawmthu han sawi ve ka duh chu, kan bial, Kawrtethawveng-ah RD Block thar min hawn sak a. Hei hi chu kan lawm a, sorkar chungah pawh lawmthu ka sawi tawh a. Kan lawmna pawh hi a reh mai lo turah kan ngai bawk a ni.

Tin, 17-na chungchangah hian tawite ka han sawi leh duh chu, mi rethei, mi harsa zawk tena PMEGP *margin money* chungchang a rawn sawi a, hei hi mipuite’n an hresual palh ang tih ka hlau a. Margin money hi a lawng ringawt hian a lak theihlohin ka hria a. Miin *loan* an la ang a, chumi loan tanga 30% vel chu margin money hi claim theih niin ka hria. A margin money ngau ngau hi claim tum an awm palh ang tih hi ka hlau a, helaiiah hian a inziak chiang lo deuh hlek a. Chuvang chuan, hei hi mipuiin an hriat fiahloh palh takin ka rawn sawi tel bawk a ni.

Engpawh ni se, he speech ngau ngau hi chu, sawi tak ang khan a tha lai lawr anih tlat avangin han sawisel em em tur ka nei lova. Amaherawhchu, duh khawploh tam tak, sawilan loh tam tak hi a awm a. Khang erawh chu sorkar pawhin a enzui zel ka duh bawk a, chutiang tur chuan sorkar pawhin ngaihtuahna nei se ka ti hle bawk a ni. Ka lawm e.

SPEAKER : Awle, Pu Ramthanmawia, Member zahawm tak ka sawm e.

PU RAMTHANMAWIA : Pu Dy. Speaker, ka lawm e.

Niminah kan Governor zahawm takin kan sorkar hma lakna hrang hrang, (a then a zar a ni ang chu, a kim lo em em a) a rawn sawite lawmthu sawina kan han sawiho thei hi a lawmawm ka ti em em a.

A hmasa berah chuan, ramri chungchang hi kan vei tlang a, mipuiin kan vei a, hnamin a vei a, party tinin kan vei tlang em em a. Amaherawh chu vawi leh khata tihfel theih mai anih loh zia, hun rei taka tang tawh khan a chiang em em a ni. Chuti chung chuan he sorkar hian ramri chungchang a ngaihthah loh zia kan hmu a. Ramria police duty te thum chakna atana sum sen ringawt pawh hi cheng nuai 300 chuang a ni a. Chu bakah police duty te mumal taka an duty theihna tura hmun hma leh an camp te thum thatna turin cheng nuai 100 dawn lai sen ral a ni bawk a. Chu mai ni lovin, ramriah building hrang hrang cheng nuai 500 dawn lai senga sak a ni bawk a. Chu chuan ramri hi he sorkar hian a ngaipawimawh zia tilang a. Tin, kan police te pawh kha hreawm taka ramhnuai pilrilah awmna mumal nei lova an awm kha a rem ti lova. Chutiang chuan sum awm lo chungin, harsatna sum leh paiah sorkarin a tawh chungin ruahmanna siamin a thawh a ni tih kan hria a, a lawmawm ka ti khawp mai a. Hei hi Governor thusawiah hian lawmna tur niin ka hria a.

Tin, ‘SEDP’ kan ti a, kan hria a. MNF sorkar hmaa kan au hla ber a ni a. Khawvelin a hriat lawkloh hripuiin min nuai thut avangin cheng, “nuai 3-in bul kan tan pui ang” tih kha a ni a, a dik a ni. Mahse, Party dang te pawhin ‘an sem tak tak lovang’ tia min sawi sek pawh a awm a, a dik em em a ni. Kan sum leh pai dinhmun en chuan SEDP kha kalpui ngaihna a awmlo a ni. Mahse, hripui avanga kan mipui ten harsatna an tawh nasat avangin a theih chin chinah kalpui a ni zel a, kan duh angin thil a kal tak lohah chuan ‘cheng 25,000/- in bul kan tan a ni,’ tih kan hria a. Chu chu, chhungkaw 60,000 hnenah first instalment pek a ni ta a, second installment pawh March, 2023 hma ngeia pek tum a ni te hi a lawmawm tak zet a ni.

Sorkar hmasa khan NLUP kha a buaipui hle a, a *flagship programme* a ni a, kan hria a. Kha sorkar kha thlirkir ta ula, “kan sorkar tukah nuai 1 kan sem ang”, tih te pawh a ni ve bawk a; nuai 1 kha an sem mai lo a ni. Kum 3 hnu ah Darlawn-a hmunphiah

kekete hnenah cheng 4,000/- vel pein bul an tan a ni. Nuai 1 sem tum khan an bul tanna kha a te angreng khawp mai. Keini chuan cheng 25,000/- in bul kan tan a ni. Kan duh ang leh tum angin ti thei lo mah ila, kan bul tanna chu cheng 25,000/- a ni. Khalai kha ka ngaihtuah kir hian ‘indem vak tur kan awm em ni aw’ ka ti a ni. Khang hunlai khan sum leh paiah harsatna a awm kan hre lova, hri pawh a leng lo a ni. Kha sorkar kal ta ah khan sum leh pai pawh an ziaawm em em a ni tih kan hria a ni. Mahse, he sorkar hi chuan harsatna namenlo a tawh kan hria a, chuti chung chuan “cheng nuai 3 engatinge in sem leh si loh” min han ti te hi chu; ‘engtingge in sem theih zawk’ min ti ula a dikin ka hria; “in Chief Minister, (Finance Minister) hian engtingge hetiang hi a tih theih, hetiang Finance Minister tha hi an awm dawn em ni”, ti ula, dawt a ni miah lovang. Mahse, “SEDP hi MNF sorkar hian a sem dawn lo” tih te hi in au hla a ni a, kan la hrereng a ni. Pathian hi a tha a, vawiinah chuan ‘chhungkaw sing 6 hnenah cheng sing 5 pek phawt tur a ni,’ tih a ni ta a. Sorkar kumtharah chhungkaw sing 6 bawp pek leh tumna a awm bawp a ni. Hei hian a hril chu, “he sorkar hian kan mipuite hnenah a intiamna hi vawiin thleng hian a la tlansan lo a ni” tih hi a ni. Pathianin rem a tiha kan sorkar leh chuan, ‘nuai 3 kan pe ang kan tih hi kan pe dawn’ tih hi ka sawi duh a ni. Chuti anih chuan kan sorkar leh a ngai tih hi ka sawi duh bawp a ni.

Congress sorkar kha en ula, term khat chhung khan an sem zo reng reng lo; ‘kan sorkar tukah nuaikhat kan pe nghal ang’ an tih kha term khat chhung khan an pe reng reng lo. Sum leh pai harsatna a awm lova, hri pawh a leng ve miah lo. Chuti chung chuan an pe thei lo; ramri pawh a buai vak lo. Vawiinah heti taka sum harsatna kara hetiang ang kan thleng thei hi a lawmawm takzet a ni.

Nichina an sawi, Khawva Mini Hydel project chungchang kha ka sawi ve duh a. Hei hi fur lai chauha hman tur a niin ka hria a. Sorkar hmasain kum 2012-a a lo duan tawh niin, kum 2012-a bul tan, 2015-a zawh tura ruahman kha an zo thei lova, a harsa a. A thawh hun chhung kha a rei a, August, 2022 khan hawn a ni ta chauh a, “fur tui tam lai chauha hman tura ruahman a ni hrim hrim a ni,” tih kha ka bial chhung anih avangin ka han sawi a ni.

Tin, Education chungchangah hian ka han sawi duh chu, School building sak that leh repair te, zirtirtu indaihlohna avangin ram pumah sum thahnem tak min pe a. Ka bialah pawh thahnem tak min pe a, churang chuan zirna lamah pawh hma nasa takin kan sawn a ni. Kan sorkar hlim 2019 khan Champhai bialah MLA panga kan awm a. Keini East Tuipui kha matric result-ah a palina kan ni a, 50% chauhin kan pass a ni. Hei hi a chhan nia lang chu, zirtirtu kan indaihlo nasa hle a, sorkarin zirna a ngaihpawimawh avangin zirtirtu min han pe ta mawlh mawlh mai a. 2022 result ah khan 60% a rawn ni ta dawrh mai a ni. Hei hian sorkarin zirna a ngaihpawimawh zia a tilang a, kan bialah pawh hma kan sawn em em a ni.

Tin, kan u leh naute kan thisen zawmpui te, ram buai avanga raltlan thahnem tak Myanmar lam atangin mi 30,000 chuang an awm tih kan hria a, Bangladesh lam atangin mi 458 an awm a. Heng hote hi kan sorkarin a lo tuamhlawm dan hi a ropui ka ti a, ka lawm hle a. Manipur-ah chuan raltlan an awm ve baw k a, an mana, an thawn kir a ni, keini chuan kan lo kuanguah a, NGO leh kohhran ten an eiturte kan ngaihtuah a, an awmna tur te kan buatsaih a.

Kan hriat angin ka bialah pawh tamtak an awm a, kan buaipui ve viau a ni. Heng zirlai raltlan naupang te tan hian sorkar a ngilnei em em a, an awm mai mai remti lovin anmahni phu tawkah an awmna theuhah zirtirna a pe vek a ni. Farkawn-ah ringawt pawh hian High School zirlai naupang 63 an awm a, heng zinga 4 pheih chu distinction-ah an pass a ni. Raltlan ho hian thahnem an ngai a, an thiam thei em em baw k a ni. Tin, sorkarin zirna a pe mai nilovin, lehkhabu leh uniform a thlawmin a pe vek baw k a, he sorkar hi a ngilneih zia a lang takzet a ni. Kan hriat angin kan sorkarin heng Myanmar atanga rawn lut raltlan ho enkawl nan hian cheng nuai 300 chuang a seng a, Bangladesh lam atanga rawn lut te tan nuai 30 chuang a seng baw k a ni. Chungte chu helaiah hian ziahlan a ni lo te hi a uihawm hlein ka hria a ni. Ramri depa MLA te hi chuan kan bial theuhah kan u leh nau raltlante tan hian theihtawp kan chhuah theuh a ni.

Chutiang chuan he sorkar hi mipui sorkar mai ni lovin, mahni leh u leh nau ram hrang hranga mite tan *Inpui* a nihna hriain raltlan rawn lutte vawiinah alo tuamhlawm hi khawvel hriat a ni a. Hei hi Pathian malsawmna he ram, he sorkarin a dawmna tur te pawh niin ka hria a, lawmawm ka ti hle a ni. Pu Dy. Speaker, sawi tur chu a la awm na a, ka duh tawk mai ang e. Ka lawm e.

DEPUTY SPEAKER : Member zahawm tak Dr. Vanlalhlana ka sawm e.

DR. VANLALTHLANA : Pu Dy. Speaker, ka lawm e. Kan Governor zahawm takin nimin a a thusawi phok 17-na lai kha sawi duh te kan han nei ve nual a. A vai chuan kan chuk hman dawn lova, ngaih pawimawh zualte ka han sawi ve ang a.

A phok 2-na ah SEDP a rawn lang a, rilru a pawt deuh zar mai a. SEDP hi ruling sorkarin ‘kum 2017 atangin kan buaipui tawh a ni e’ an ti a. Tin, 2017-ah an tlangzarh a, 2018-ah bawng insi ang thata tan tum kha anni a. Amaherawhchu, 2018 a ni a, 2019 leh 2020 a zova, 2021 a ni leh a, 2022 kum tirah te khan Executive Board an thukhawm thei chauh a. Khati khawpa rei thutkhawmna hun atana an hmanga kha chu a zia lo deuh chuan ka hria a. Kan CM in, “NLUP dawng tawh zawng zawng pawhin an dawng ang; nuai 3 leh a aia tam an dawng ang” tiin a lo sawi tawh a ni. Chutah chuan, NLUP an semah khan Mizoram chhungkua 70% chuang kha nuai khat chuang kha pek tur a ni a. Khang hovin an dawn bawka, an mi leh sate, an duhsak zawngte ho an han pek leh pheih chuan engzat takin dawng ang maw! Chhungkaw tinin nuai thum an dawn dawn pheih

chuan a huphurhawm khawpin ka ring a. Hei, Covid 19 kan han chhuanlam a, ‘kan sem thei lo a ni, covid 19 avangin; hripuiin min nuai a’ tih kha a ni a.

Ni e, family base SEDP ₹25,000/- chu an sem teh meuh mai. Amaherawhchu, a hma ₹25,000/- sem hma khan Airport atan cheng vaibelchhe tam tak an lo hui thla tawh a. Tin, PWD-ah contract bill chhuak awlsam em em mai chi te kha, cheng vaibelchhe 300 chuang PWD-ah lo pawhpen a ni tawh a. Tin, Sports-ah te pawh a nuai hlin cheng nuai 2600 chuang te khatiang khan kan lo ti tawh a. A mawm lai kan han rut zo a, ‘heng ho hi i pe ve tawh ang hmiang’ kan ti a, cheng 25,000/- te tein kan sem te pawh a ang riauin ka hria a.

SEDP hi form 1-na tanga 7-na thlenga kalpui tur a ni. Form 1-na leh 2-na te chu an kalpui tawhin ka hria a 3-na te; theih ang ang chu kan han zir ve a. An kal tum dan leh an kalpui dan hi a inang lo ta lutuk a, hei erawh hi chu a mangan thlak ka ti a, kan lo endik zel ang. Kan scheme implementation hi chu a chhe em em hran lo thin. Amaherawhchu, a implement danah hian kan duhtui lo deuh han ti ila, engnge ni, pawisa te pea in tlansan leh mai hi kan angin ka hria a, hei hi a pawi ka ti khawp mai a.

PAC-ah a hmingin ka han awm ve a, Assembly lamah. NLUP beneficiary te kan kawm a, khilai Sesawng te, Thingsulthliah lampangah te kan kal a. Chuta pa pakhatin a lo sawi chu – “tu pawh an lo sorkarin, ‘hei hi ching rawh u, hei hi ti rawh u’ an ti a, a chi te min rawn pe a. Min tlansan leh nghal a, kan la ti ve ziah a, rilru beidawng, rilru hrehawmin kan awm a. Tin, hmalak tak tak theihna tur ni lovin leh ruahmanna fel fai awm lovin thingtlang mite min rawn chhahih kual a, keiniin beiseina thar nen inthlan dawnah te, ‘anni hian min pui thei ang a’ tiin vote in kan lo tanpui a, eng tham mah kan hmu leh thin si lova. Hetiang chuan khawngaih takin lo ti tawh suh u” tiin min ngen ngawih ngawih a ni.

Tuna SEDP kan kalpui dan hi chutiang chiah chu a ni. Theihtawpin kan zir Chiang ve; beneficiary pawh kan en; kan biala beneficiary te pawh theihtawpin kan enkual ve a; a taka ti lem lo, vaimim ching lem lo te pawhin an dawng teuh tih kan hria a, thil chi hrang hrang pawh a ni. “Hetiang mai mai hian mipui sum hi chu i tikual o ang u,” tih hi ka sawi duh a. SEDP kalpui dan dik te pawh a awmin ka ring a. Amaherawhchu, a hmaa kan lo sawi, mipui hnena kan lo intiam tawhna ‘cheng nuai 3 sem’ tih te pawh kan ngaihtuah tlai lutuk. Kum 2019, 20, 21 a ral a 22-ah kan thukhawm thei chauh a, chumi hma chuan beneficiary base SEDP-ah cheng nuai 1 chuang kan pe a, khangho kha chu MNF *mi leh sa* deuh vek anni a, list pawh kan nei vek tho a. Kan lo pe vek tawh a lawm! Chuvang chuan, kan kalna zel turah hian rilru i seng ang u. Sorkarin, central sorkarin heti zat hi ‘in ram in enkawl nan in dawng ve e, in duh danin in hmang thei e,’ a ti a. Mahni party *mi leh sa* te duhsaka, a harsa zawkte nek sawra hetiang scheme kan kalpui thin hi kei chu a pawi ka ti tak zet a. Chuvang chuan, SEDP kan kalpui danah hian, “chhui tlak, zui tlak, entawn tlakin hma i la ang u” tih kha kan

sawi a. Kan Governor-in a rawn fak chiamah hian kei chu lawmna tur ka la hmu hrih lo a ni.

Ka han kal zel ang a. Hei, LPG *home-delivery*, point 5-na ah khan a rawn lang ta a, a lawmawm khawp mai. Session apiangin ka la din chhuahpui ve chuan ka hria a. Mizoram Consumers Union-ah OB te kan lo ni ve tawh a, kan lo au nasa tawh thin a ni. Chuvang chuan, kan Minister hmalakna a lawmawm ka ti a; hmalak tur tam tak pawh a la awm a. Mipuite pawh hian kan hrethiamin ka hria a, inzir tur thila saptawng tak chuan, *trials and errors* a la ni a. Tlem la fello, la diklo deuh, la inkawlkalh deuh hi la awm mah sela, mipuite pawhin kan hrethiam viauin ka hria a.

Tin, nichina member zahawm tak Pu Zaithanzama'n a rawn sawi ang khan, consumer card xerox copy pe lo hian kan hming leh kan consumer number (kan card no.) kha pe mai ila, ziah mai ila, kan ziah sual loh chuan keimahniah a subsidy te pawh kha a rawn lut mai chuan ka ring a. A ziaktu kan nih avangin, ziah sual palh chuan a lut dik lo palh te pawh kha a ni ve leh thei a, a mawhphurhna pawh keimahni kutah a awmin ka ring a. An chhuanlam berah chuan, 'ziah luh leh dawnah tihsual palh a awm thei' tih a ni a. Mahni hmingte, mahni no. te kha chu kan ziah tha theiin ka ring a. Khang kha rawtna ka han thlen ve leh a.

Pu Dy. Speaker, point 10-na hi i phalnain kan chhiar ang a - "My government has made significant achievement in building infrastructure of roads, bridges and building" a rawn ti chho a. Ni e, nichin khan Dr. ZR Thiamsanga, kan Member zahawm takin a rawn sawi hawn pah khan, "State hlim ber kan ni e" te a rawn ti a, a nihna chen te pawh a awm ang a; a lo rei deuh tawh nge ni. Tunah hian hlawh la tlai thin kan nih avangin sorkar hnathawk chhungkaw awmna chu kan hlim ta vak lo niin ka hria a. Tin, NLUP beisei ho pawh hi kan hlim lutuk lem chuang lovin ka hria a. Tin, sawlai Thenzawl pelh lampanga awm ho, Chhim lam ho saw 'kan hlim vak lo a ni' tih ka sawi duh a ni. Kei hi sawlam pang chhuak ka in ti thin a. Hmanni lawk krismas leh kum thar inkarah chhiat tawhna avangin zing kar hma taka chhuah a ngai si a, keimahin motor-in ka in khalh a, chhiat tawh naah kan va kal a. In lampanga tih turte a la awm avangin leh-langin kan kal a ni. A tuk chu nilengin ka mu a ni. A hahthlak lutuk, Lunglei leh-langa kal chu. "Saw lampang ho saw kan hlim ve lo a ni" tih kha ka han sawi duh a.

"Logistics Ease Across Different States" tih hi central lam atang khuan zirna an rawn nei thin a ni. 'Logistic' tih chu – 'thil phurh, hmunkhat atanga hmundang a va phurh sawnna' tih kha a ni deuh mai a. Chutah chuan, 'transporter' an ti a, bungraw phur thin hote, motor khalh thin ho association te, khatiang ho tam tak, mi 3,000 chuang teh meuh kha zawhna an zawt a. Tin, a meeting-ah pawh a titu hote hi vawi 300, vawi 400 chuang an thu a, chumi an report-ah chuan, Mizoram hi infrastructure-ah kan hniam ber a ni. Chu chu kan dinhmun a ni. Kan hlim tlang lo hlein ka hria. Chuvang chuan, helaia road chungchangah te, kawng chungchangah te 'kan hlim tlang' tih te kha chu,

eng nge ni, state sorkar inrawlhna a ni lova. Kan sawi tawh 'HIDCL hmalakna' tih vela kha kan lo buaipui te pawh a ni ang e.

Tin, Pu Dy. Speaker, helai point 12-na, *bilingual*, Mizo leh sap tawnga text book kan neia hi a lawmawm ka ti khawp mai a, Minister te, hei Pu L. Thangmawia, kan MLA zahawm tak pawh hi a buaipuitu zingah a telin ka hria a, a lawmawm ka ti a.

Tin, 'Quality Education at All Levels' tih kha a ni a. Saw, keini bialah ringawt pawh sawn sorkar sikul building ceiling pawh la neilo, a chung kaw phuar phuar mai a, ruah sur dawnin Aizawl-ah pawh kan la in haw tir a ni. Building pakhat sawlai Buchhawna Memorial Middle School phei saw chu sak that kan tum a, a beam kha alo in san hleih a, kan han enchiang a, a chhawng hnihnaah zirtirtu an awm a, a ban chiah a ding a, brick a chho a, beam a awm tawh lo reng reng, chutiang khawp chuan hlauhawmin zirtirtu ten school an enkawl a. Chu chu kan dinhmun a ni. A hmian mirethei te kha an lo *VIP* tawh lova, (ti tawp ang). Tunah hian thingtlang lam panga school kan saknaah pawh a DPR ni lovin tuten emaw ni, 'ti hian ti zawk rawh u', an ti a, 'DPR anga hmalak a ni e' tiin. RTI zawhna te kan han chhang ngam leh si hi thingtlang mite zah lohna lian tak niin ka hria a. Thingtlangah mi harsa zawkte, Aizawl pawh a ni tho, keini hi sorkar school chhuak kan ni deuh vek tho ang a. Tunlaih chuan private school te a lo awm a, a harsa zawk te kalna a ni tawh a, miretheite kan ngai pawimawh tak taka, (ka zo tep tawh, Pu Dy. Speaker...) mi harsa zawkte kan ngaihtuah anih chuan, 'school te hi kan ngai pawimawh tur a n; kan buaipui tur a ni' tih kan sawi duh a.

A tawp berna atan - Smart City Project-ah Aizawl hman tur a ni a, a guidelines a awm miah lo. Sports infrastructure-ah kan pawt vak mai a, a tir phei chuan tender 14-a tender 7 kha sports infrastructure ah kan pawt a. Tunah hian ball boot te nen, kawr tawp deuhin kan kal kan a, wire tawp deuh te, zirna tla bal deuh te, hospital tlabal deuh te, chutiang chuan kan kal kan a ni. Chuvang chuan, Smart City kan kalpui dan turah pawh hian awmze nei zawk, development khairual zawka kan kalpui a ngai a. Hei ₹14,000 crore (vaibelchhia singkhat sang li) chuang hman tur nei tan chuan hmalakna han chhawpchhuah sawi tur chu tam tak a awmin ka ring. A pawimawh ber chu - miretheite dawmkanin an awm em; mipuite hian an damloh an harsat hian pan tur an nei tha em; hriselnaah hian enkawl anni em; mahni kea din tum *entrepreneur* hote hi kaih an ni em; phurpuitu sorkar kan nei em, tihte hi kan en a ngaiin ka hria a. Chumi en chuan kan Governor speech-ah hian han lawmna em em tur ka hre lova. Amaherawhchu ₹14,000 crore nei tan chuan sawi tur chu tam tak a awm ve ang tih kha kan tarlang duh a ni e. Ka lawm e.

DEPUTY SPEAKER : Tunge sawi leh ang le? Member zahawm tak Dr. Vanlaltanpuia ka sawm e.

DR. VANLALTANPUIA : Pu Dy. Speaker, kha, thuthleng-a i han thu kha lawmawm ka ti em em a, constitutional post i han chelh thar hi lawmawm ka ti em em bawk a ni. A hmasa berin lawmpuina leh duhsakna sang ber ka hlan a che.

8th Legislative Assembly, Session 11-naa kan Governor in thu a sawi te lawmna motion member zahawm tak Dr. ZR Thiamsang'an a rawn pulut hi a lawmawm ka ti a, han thlawp ve ka duh a ni. Kan Governor Speech-ah hian sawi duh pawimawh deuh deuh point 10 vel ka lachhuak a, chung zingah chuan border chungchang a sawi te, SEDP te, tin, Health infrastructure thar kan neih te, JJM Scheme chungchanga Mizoram khaw hrang hranga tui pek anih dan te.

Tin, kan Chief Minister zahawm tak kaltlangin thalaite enkawltu ka ni ve mek a, Youth Commission *Chairman* ka ni a, thalai aiawh pawhin lawmthu sawina tur tam tak neiin ka inhria a. Sports infrastructure thar tam tak kan din te, skills development hrang hrang he sorkara hmalakna thar kan hmuh te, tin, transport lama kan hmalakna te, tax collection a Mizoram revenue lo pung chho mek leh election chungchang te leh technology chungchang point 10 vel hi sawi ka duh a, mahse ka sawi zo hman ang em ka hre lova, kan sawi zawr zawr ang e.

Border chungchanga kan sorkar chet dan hi a lawmawm ka ti a, thu pawh kan inchuh nasa viau a. He sorkar, Pu Zoramthanga kaihruai sorkar aia la kal na border-ah hian kei chuan an la awmin ka hre lova, hei hi lawmawm hlein ka hria a. Duhthu chu kan sam lovin, tin, kan harsatnate pawh alo thuk tawh viau maithei a. Tin, history a kal let thui ngaihna tur tam tak te a awm avangin, vawi leh khata chin fel mai te a lo harsa a. In hriat angin tun hnaiah silai te pawh chelek a ni a, chutiang karah chuan he sorkarin hma a la tha viauin ka hria a. Tin, khunglai border area develop-na atan ₹375 lakhs, police ho accommodation atana hman a ni te, SEDP scheme atanga ₹495 lakhs (Nuai zali sawmkua leh panga) a hnua han pek leh te, chutiingin pawisa eng emaw zat mai pek anni te leh police te thuum that anni te hi lawmawm ka ti a, kan border te humhimna tur atana sorkar hmalakna hi a chhuanawm hlein ka hria a ni.

A dawt lehhah chuan, SEDP hi Mizoram-a sorkarna kan lak 2018 kum tawp atangin beiseina sang tak nen sorkar kalpui kan tum a, SEDP te pawh kan sawi nasa viau a, mipui hnenah pawh promise tha tak tak te kan pe a. Amaherawhchu, kan hriat angin, kan suangtuah loh lam atangin covid-19 a lo kal ta a, Mizoram-a case kan neih hmasak ber kha Dt. 24. 3. 2020 a ni a, tin, death case kan neih hmasak ber Dt. 28. 10. 2020 atang kha chuan sorkar hian thil dang kan sawi thei vak ta lova, dam khawchhuahna lam kha kan buaipui tam em em a, hmasawna kawng tam tak aiin dam khaw chhuahna kan fight nasa a. Chung karah chuan he Ministry in sum harsa tak kara pawisa thingtlang mite tan SEDP a han buatsaih hi a lawmawm ka ti a, keini pawhin kan duhthu a sam tawh loh viauna chin a awm a. Amaherawhchu, mipuite beiseina tihhlawhtlin ngei kan duh avangin leh mipuite tih beidawn kan duh loh avangin, tiang

hi alo thleng ta a ni a, mipui tan pawh nasa zawka thawh zel he Ministry hian a tum a ni tih kha kan sawi duh a.

Heng a rawn tarlang hi a lawmawm ka ti a. Tin, hei, kuminah pawh hian sorkar kum tharah hian pek kan tum mai bakah, tun kum kal mekah pawh hian a 2nd phase te pek a ni dawn te hi a lawmawm tak zet zet a ni.

Tin, khawvel ram hrang hrang hmasawna hi SDG-17 te hmang hian hmasawn thei ila tih hi khawvel policy planner te ruahman dan a ni a, Mizoram hi SDG (Sustainable Development Goals) hmang hmasa ber India ramah hemi village level leh urban local body te endikna tana SDG hmangin hmasawna te an kalpui em tih endikna tura localize-tu hmasa ber kan ni hi a lawmawm ka ti a, a chhuanawm ka ti em em mai a. ‘Mizoram hian kawng dik a zawh mek, he sorkar hnuaiah hian’ tih te hi ka han sawi duh leh lawk bawka ni.

Tin, infrastructure Mizoram-in kan neih chhiat em em chu *Health Infrastructure* a ni a, thil chhinchhiah tlak em em mai a rawn tarlan chu – Hei, cancer vei tam state kan ni a, chumi atana *Cancer Hospital & Research Centre* cheng vaibelchhe 7 senga din tur a rawn tarlang hi a lawmawm tak zet zet a, hun lo kal leh zel tura tan pawh a ruhrel tha Mizoram tana din a ni tur hi a lawmawm em em mai a. January 12, 2023 thla hmasa mai khan JICA te leh Ministry of Finance, Govt. of India ten inremna he hospital din tur hian an lo ziaak ta a, hmasawna ropui tak a ni dawnin ka hria a ni.

A dawt lehah chuan, Jal Jeevan Mission (JJM) scheme atang hian Mizoram-ah tui la nei lo khuate hnenah tui pek anni dawn hi a lawmawm em em mai a. Kan bialte pawh thingtlang bial kan ni a, *thingtlang bial e* ti lo chuan tunlai thalaite phei chu globalization-te avangin kan hmanraw hman te a inang tlangpui ve vek tawh a, electronic gadget tha tak takte kan hum tawh a, Apple iPhone te pawh kan neih ve tawh lain kan inah tui herh haw tur kan la nei lo te hi, development hi a inkalthelh nasa em em mai a. Chutiang ti ziaawm turin thingtlang mite tana solar pumping scheme tam tak kan din hi a lawmawm ka ti a. January Ni 16, 2023 thleng khan thingtlang khua 224-ah tui pek a ni tawh a, eng emaw zat pump a la ni dawn a. Ka bial Lunglei North-ah pawh khua, tui la neilo zawng zawng te tui pump sak an han ni dawn te hi a lawmawm ka ti a. Bial hrang tam takah pawh hian Mizoram-a tui neilo khua te pek a ni tur te hi a lawmawm em em a, hei hi hmasawna ropui tak a niin ka hria a. Sorkar hi chu ‘series of development’ ti ila, hmasawna inchherchhuan zel tur, tih zel tur anih avangin he sorkarah pawh hian hmasawna tam tak hi a rawn piang chho zel niin ka hria a, a lawmawm ka ti tak zet zet a ni.

Tin, thalaite tihmasawn turin kan thalaite an advance em em tawh a, ‘kan kut phahah hian khawvel kan keng tawh’ a tih theih a. Technology te avangin internet facility te a lo tha em em a, ramdang thalaite thil neih te, an hmanraw neih zawng zawng

te hi kan hmu ve vek a. Thalaite hi kan rualawt em em thin a, kan thalaite hmasawna tura tan *sports infrastructure* a bik takin heti zat kan sorkar-a din a lo ni hi a lawmawm ka ti a. Dik tak chuan ‘artificial turf’ kan tih, phul lem kan han phah te hi, a tira kan han introduce tirh kha chuan hahipin kan sawi a, a hmuhnawm kan ti a, thlalakupi ringawt pawh kan chak a. Vawiinah he sorkarah hi chuan hmun tinah, kil tinah phah a lo ni ta a, a lawmawm tak zet zetin ka hria a, hei hi hmasawna ropui tak a ni. Keini tak ngial pawh hian *ngaiiah kan neih ve ta emaw ni chu aw* tih tur khawpin phul lem phah te hi a lo nasa ta a, a lawmawm tak zet zet a ni. A hmun te sawi vek ta lo ila, ‘thalaite kan lawm em em a ni’ tih ka han sawi duh bawk a.

Tin, skill development lam pawh hi kan Mizo thalaite tichak zel turin Labour Department hian a kalpui nasa em em a. Chutiang atan *Kawtchhuah Innovation Fair* te, *Pum Innovation/Competition* leh *Exhibition Fair* tih te pawh buatsaih a lo ni a. Tin, *Sankalp Scheme* kal tlangin thalai promotion tam tak pek a ni te hi lawmawm ka ti a. Mizo thalaite hian engtikah emaw chuan India ram hi kan la control ang tih, kei ka inngahna a ni a, kan skill, kan kut them thiamna te hi kan tih hmasawn zel chuan ‘India ram hi kan la control ang’ tih kei ka ngaihtuah dan thin a ni a. Chuvang chuan sorkarin hma a la tha hlein ka hria a.

Tin, Mizoram-in *bung-thar* kan kaina hi Pu Dy. Speaker, tarlan leh lawk ka duh a. Inland waterways-ah hian bung thar kan kai tlat mai a. Ministry of Ports, Shipping & Waterways (MOPSW) hian Tlawng Lui hi *National Waterway 102*-ah a puang thar a, hei hi thil lawmawm tak a ni a. Mizoram ang, inkalpawhna harsa, tlang ram chhengchhiaah hian *inland waterways* hi thil pawimawh tak a ni a, hemi tur atana sorkarin hma a lakna zawng zawngte hi a lawmawm tak zet zet a ni. Tunah hian nasa zawka tipuitling tura tender pawh buaipui mek a ni te hi a lawmawm tak zet zetin ka hria. He sorkarin hmasawna hrang hrang a kalpui hi a tam em em a, chungte chu Governor-in a rawn puang chhuak hi a lawmawm tak zet zet a ni.

Pu Dy. Speaker, ka sawi zo hman vek ta lova, he motion, *Lawmna Motion* Dr. ZR Thiamsanga’n a rawn put luh hi a tha ka ti em em a, ‘ka thlawp tak zet zet a ni’ tih hi ka rawn sawi a ni e. Ka lawm e.

DEPUTY SPEAKER : Member zahawm tak Pu Lalchhuanthanga ka sawm e.

PU LALCHHUANTHANGA: Pu Dy. Speaker, ka lawm e.

Governor thusawia lawmthu sawina motion hi dan pangngai, kalphung pangngai ni maiin ka hria a kei chuan; a tak ram thleng lo a ni a. Budget session apiangin Governor thusawiah lawmthu kan sawi thin a.

Han sawi zau deuh ta ila. State kan nih hnu kum 35 a kal tawh a, lawmthu kan sawi thin a ni. Amaherawhchu, tunah hian khang kan lawmthu sawi te kha ‘a tak ram a thleng em’ tih hi kan ngaihtuah a hun ta hlein ka hria a. A tak ram a nihna turah hian lawmthu hi sawi ni ta ila chuan tuna kan dinhmun ang hi a ni thei lo a ni. Kawng tha te pawh kan nei ve tawh ang; power-ah kan intodelh tawh ang; ei leh barah te pawh kan intodelh tawh ang; tui te pawh a hnianghnar kan nei tawh ang; chu chu a nihna dik tak a ni. Kalphung pangngai, kan sorkar lawmthu sawina tur awm si loah lawmthu kan sawi a, keimahni leh keimahni hi kan inbum ni ta maiin ka hria a, a pawl khawp mai. Tunah pawh hian lawmthu sawina point 38 lai mai a awm a, hengte hi ‘lawmthu sawina tur tak tak tling a ni em’ tih hi kan ngaihtuah chian a tul ta khawpin ka hria.

Point thenkhatte hi han sawi chhuak ve ta ila. Point 38-naah ‘Lok Ayukta’ tih kha a rawn lang a. Hengte hi a awmzia takah chuan mipuite hmaa hmai phih tumna mai mai niin a lang a. Lok Ayukta-ah hian staff an indaih lo em em a, kan hria a ni. Corruption do tumna ni lovin, corruption sawi mam tumna a ang a, a hnathawktu tur tak tak prosecution te, investigation te leh enquiry awm si lova a office lo din ve leh ringawt khan eng hna nge maw an thawh ang le? A hna pawimawh tak tak thawktu tur kha chu sorkar mi leh sa anni a, hei hi independent a ni lo a ni. Hei hian awmzia a nei lo, a pawl lutuk a ni. Duhsak zawngte post in siamsakna te pawh hi a ang khawp mai a. Driver 6 an awm a, peon 10 an awm a. Thawktu zawng zawng hi 29 chauh an ni a, hengte hi engnge a awmzia? A tih tur tak takah lut si lovin tihian sorkarin sum tam tak a seng a, henga kan sum hman te hi lo hmang lovin healthcare-ah te, tar pension-ah te pawh pe ta zawk ila a lawmawm viauin ka ring a ni.

Chuvang chuan, ‘lawmthu sawi’ kan tih hi i fimkhur tawh ang u. Lawmthu hi kan sawi tam tawh lutuk. Kan lawmthu sawiah hian a tak ram a tlang ngai lo. Kum engzat nge budget session-ah hian lawmthu kan sawi tawh? Lawmthu kan sawinate hi a tak ram ni se chuan tun dinhmun hi kan ni dawn lo. Kalkawng te kan nei tha lutuk tawh ang; engkimah kan intodelhna tur hi lawmthu kan sawi tawh a ni. Mahse, tunah hetiang dinhmunah hian ka la ding si a, a pawl lutuk a ni. Hetiang mai mai hi chuan he rorelna sangah hi chuan thu i pass mai mai tawh lo ang u.

Kan zirnate a tlabal em em mai a. Hei, ka biala school hrang hrangte ka tlawh a, hmun thenkhat chu ruah sura class lak theih lohna te a ni; ruah a sur chuan a far nasa lutuk. Kan naupang ten inthirana mumal an nei lo; zunin te kan sak sak a, tui thianghlim in tur te pawh kan pek a ngai a ni. Hengah te hian lawmthu kan la sawi dawn em? Ka biala veng pakhat Salem Veng-ah chuan Primary School pahnih a awm a, chu chu school pakhat chhunfin a ni a, naupang an leng ta lova, a pawl khawp mai; class an lo inkal chhawk thin a ni. A serious lutuk hengte hi. Chuvang chuan, kan education-ah te hian lawmthu sawi tur kan la nei em? ‘MYC’ kan ti a, ‘engvangin central service-ah kan tlin theih loh’ tih te kan sawi a, a bul thum atangin kan zirna hi a chhe em a ni. Zirna mumal an dawng lova, facilities mumal engmah an dawng lova, a pawl em em a ni.

Zirtirtu lak chungchangte pawh sawi a ngai a. Nikum March Ni 18 khan East Lungdar-ah chuan MNF Group Secretary-in advertisement a chhuah a, a heading-ah chuan ti hian a inziak a - ‘MNF-te an la nihlawh zel dawn’ tih a ni. MNF ho tana advertisement chhuah a ni. Education minister a awm bawk a, a lo chhinchhiah turah ngai ila. A pawh em em a ni heng te hi. Kan tu leh fate zirtir tur hian a tha leh a tling, advertisement pangngai chhuaha lak a va nghahhlelhawm tawh tak em! Party worker induhsak nana zirtirtu kan lak hi a pawh em em a, hei hi tuna kan *thanmawh-bawk* chu a ni ta chiah a ni. Engvangin nge central service-ah mizote kan luh ve theih tak loh? A ler a inthuai leh ringawt kha a ni lo, a bulthum atanga tih a ngai. Chuvang chuan, i fimkhur ang u. Zirtirtu lak chungchangah a tha leh a tling, a thiam, qualified-te i la ngam ve tawh ang u.

Chutiang bawk chuan tunlaih thil thawm riva a awm a. Land Revenue & Settlement Deptt-a LSC dil tur chuan minister concern hriatpuina a ngai a ni. A *..... lutuk a, hetiang inhmun pass dilna leh zelah hi chuan kan minister-te hi inrawlh lo se a tha lo maw? Kan inrawlhna hi a te tawh lutuk a, a hniam tawh lutuk a, a pawh em em a ni. Thil hi dik tak leh fel taka kan kal hi a hun tawh a, tul lovah hian lawmthu i sawi mai mai tawh lo ang u.

(*Expunged as ordered by the Chair.)

Ei leh bar chungchangah te kan inthlan dawn khan tuna kan Chief Minister hian, “MNF kan sorkar chuan vai buhfai ni lovin zo buhfai kan ring tawh ang” a ti a. Intodelhte hi kan sawi tam lutuk tawh a, hengah te pawh hian lawmthu kan sawi tam lutuk tawh. Amaherawhchu tunah hian engnge kan dinhmun? 21st May, 2020-a kan Supply minister-in a sawi dan chuan “Buhfai kan dahkhawm zingah kan thar a awm lo” a ti a ni. Kan intodelh loh nasat zia chu. Khangah te khan lawmthu kan sawi tawh thin em?

Pu Speaker, I dinglama thute hian ‘lawmthu kan sawina turah hian I chiang ve tawh ang u’ tih ka han sawi a ni e. Ka lawm e.

SPEAKER : Aw le, ka sawi duh pakhat chu, MLA tling hnunung ber pawh kum 4 kan lo thu ta a, kan House-ah hian kan senior-te hian tawngkam hi an lo duh uluk khawp mai a; ‘Zahthlak’ han tih te hi an hmang lo thin a. Chuvangin, tuna ‘Zahthlak’ tih ri kan hriat kha chu kan *expunge* dawn nia.

A laklawh dawn riau mai a, rinaiin kan sawi chak lova. Awle, member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Speaker, ka lawm e. Hon. Dy. Speaker kha Chair-a a thut lai ngeia congratulate kha ka duh deuh avangin vawi 2 vawi 3 lai ka kut ka phar

a, mahse min ko ta lova, a pawl lem lova. Pu Speaker, nangmah kaltlangin Dy. Speaker thar hi ka *congratulates* a.

Pu Speaker, vawiina Governor address-a lawmthu sawina *Motion* Pu ZR Thiamsanga putluhah hian lawmna tur hrang hrang ka nei ve a. A hmasa berah ka sawi duh chu Governor thusawi ngeia lang Tlabung RD Block hawn chungchang hi a ni. A lawmawm ka ti khawp mai a, kan bial mipuite tanrualna avangin RD Block kan hmu thei a ni a, nangmah kaltlangin mipui chungah pawh lawmthu ka sawi a ni. Mahse, Pu Speaker, a hawnna programme chiah neih a ni a, a takah a la function miah lova, chu chu sawilan ka duh a ni.

Chumi rualin RD Block *puanna* chungchangah hian sawibelh ka duh chu, *puanna* programme-ah hian kei, a bialtu ka nihna angin official programme-ah sawm ka ni ve lova. A hnuah pen-a ziak chawpin sawmna min pe ve a, pawl ka ti hran lova, a pawl zawk erawh chu a *programme* hi a ni a. A programme siam dan hi a mak ka ti hle mai a. Tlabung RD Block *puanna* programme; A hun: 30.3.2023

SPEAKER : Ngawi rawh u aw. Kan hun pangngai hi ‘dar 4’ tih kha a ni a, kan pel dawn a. Engtin nge ni ang House ka rawn e. Kan pel hret mai dawn em ni? (*House-in pelh hret a remti a..*) Anih leh sawi tlang se, pelh thui lutuk chu tum lo ila tiraw? Awle, sawi zawm rawh le.

PU NIHAR KANTI CHAKMA: Pu Speaker, thu tam tak sawi tur pawh ka nei lem lova, hei hi ka sawi lan duh chu a ni a.

Tlabung RD Block *puanna* programme kha Ni 30.3.2023, dar 10:30 AM ah hman a ni a. Hemi rual tho hian MNF party member thar lawmluhna programme neih a ni bawka, hei hi chu a pawl ka ti a. Official programme pawimawh tak leh party thil hmunkhata hman a ni hi a pawl ka ti a ni. A rualin an ti a, keini tan chuan lawmluhna programme a tel chi pawh a ni lova. Hetiang thil hi thleng tawh lo se ka duh khawp mai a, chu chu Pu Speaker, ka han sawi lang duh a ni. A lawmawm rualin hetiang thil a thleng hi a pawl hle a ni. (*..interruption..*) .. Motion kan sawi a, hei hi Governor speech-ah a tel ve avangin ka han sawi ve a ni e.

Pu Speaker, Governor thusawi chapter 15-na ah hian PMJVK hmalakna chi hrang hrang a lang a, a lawmawm ka ti khawp mai a. A bikin Pradhan Mantri Jan Vikas Karyakram (PMJVK) hnuaiyah kan ramah minority concentrated area tihhmasawn nan cheng 18,85,814/- sorkar laipuiin a pawm hi a lawmawm ka ti khawp mai a. Mahse ka lawmluhna pakhat chu - hei ka bial te pawh *Minority Concentrated Area* a ni a, mahse PMJVK hnuaiyah hmalakna hi pakhat pawh hmuh tur a awm lo hi pawl ka ti hle a ni.

Pu Speaker, Governor thusawia lang lawmawm ka tih deuh mai pakhat leh chu, I phalnain ka han chhiar chhuak ang a –

“Ministry of Port, Shipping and Waterways has declared river Tlawng as a National Waterway 102” tih hi a ni, a lawmawm ka ti hle mai a. “Proposal has been submitted for conducting hydrographic survey and techno-economic feasibility study. E-tender is under process to select contractor for the construction of infrastructure for inland transport project at river Khawthlang Tuipui” tih a ni. Pu Speaker, nang pawh Minister i nih laiin wawi tam tak ka bialah i lo zin a, kan hria a, hmalakna hrang hrang, development hrang hrang an neichho mek a. Kan session apiangin fencing chungchang hi kan sawi ziah a, ka sawi leh ang a. Hemi fencing-a a thawktu company te hian a hranpain dumping ground an siam loh avangin tunah hian Khawthlang Tuipui-ah harstana kan tawng chho mek a. A tui a kang nasa em em a, kan naupan laia inland water anga kan hman thin, Tlabung atanga Chawngte, Marpara thleng lawnga kan kal theihna thin kha soil deposit tam lutuk avangin kal ngaihna a awm tawh lo a ni. Chuvangin, he project Governor thusawiah a lo lang ve hi lawmawm ka ti khawp mai a, water transport project hi a hlawhtlin hunah chuan kan hman tangkai hle dawn a ni tih kha ka sawi duh baw a.

A tawp berah chuan, point 4-naa drugs chungchang hi ka sawi ve duh a. Governor thusawiah pawh ‘alarming proportion’ tih a ni a, sorkarin hemi chungchang hi chak takin hma a lak a ngai a ni. Drugs problem hi a serious hle a, nitin news hrang hrangah drugs man chungchang chhiar tur a awm reng a, a paw ka ti em em a ni. Hei hi sawrkarin chak takin an bawhzui a ngai a ni. Awle, Pu Speaker, hei zawng hi ka sawi theih a ni e. Ka lawm e.

SPEAKER : Kan wind-up tir tawh mai dawn em ni? Awle, Member zahawm tak Pu C. Lalmuanpuia ka sawm e.

PU C. LALMUANPUIA : Pu Speaker, ka lawm e.

Hei, kan Governor zahawm takin nimina a thusawiah lawmthu sawina tur tam tak a awmin ka hria a. Chungte chu a point tam tak chu kan sawi hman lo ang a, point hnih thum vel han sawi ve hram ka duh a.

A *pakhatna* ah chuan Pu Speaker, kan hun lokal tawhah khan ‘ramri buai’ han ti ila, Assam nena kan ramri ah harsatna chi hrang hrang kan taw a. Chungah chuan kan police-te inrinlawkna pawh awm mumal lovin ti deuh thutin kan han innawk ta kha a ni a. Harsatna tam tak karah hripuiin min tibuai baw si a. Chung zawng zawnga ka sawilan duh chu, heng ramria kan police-te awmna tur, an chenna tur leh tui thianghlim in tur kan Governor thusawia lawmthu sawina lo lang hi lawmawm ka ti a, ka lawmpui tak zet zet a ni.

Police te kan indaih loh em em laiin harsatna chi hrang hrang kan tawk a, chuta ka sawi leh duh pakhat chu, Police Training School, Thenzawl-ah hian training lai mi 286 lai mai tun January Ni 16 a kan han nei thei te hi a lawmawm ka ti a. A chhan chu, inthumchak zel kan ngai a, kan dinhmun kan hria a. Hripuiin min nuai avangin kan duh angin Police te pawh kan thumchak thei lo ni te pawhin ka hria a. Heti chung chung training centre a training lai kan han nei thei te hi a lawmawm hlein ka hria a ni.

A pahnihna ah chuan, Pu Speaker, Mizoram hi engti dan nge ni, cancer hian min tibuai em em mai a, mipui mimir, tlema kum 60 chin chunglam natna han en hi chuan cancer hi a ni duh riau mai a. Tin, a kum hnuailam te pawh kan bang chuang lova. A tak takah chuan kum 60 chin chunglam natna tlangpui chu cancer a ni a. Heta lo langah hian Mizoram Super-Speciality Cancer Hospital & Research Centre buatsaih a ni tur te, crore 700 lai mai JICA leh Mizoram sorkar ten Ministry of Finance Deptt. Govt. of India hnuaiyah agreement sign a ni te hi a lawmawm ka ti khawp mai a. Kan hriselna kan ngaihpaawimawh a tul a, eng ang pawhin Mizoram hian hma sawn ila, eng ang pawn kan khawpui pawhthangin, kan ram te pawh hi thang mah sela, kan hriselna a tlakhniam tlat chuanram nuam a ni thei dawn lova. Chuvang chuan, a nawlpui leh natna tlanglawn tak lo ni ta, kan thihpui nasat te zinga mi cancer natna bik atana hospital ruahmana kal mek hi a lawmawm ka ti khawp mai.

Tin, *pathumna* ah chuan, hei, LPG-home delivery a lo lang a. Supply Deptt. hnuaiyah hian ruahmanna hrang hrang a lo lang a. LPG hetianga home deliver thei tura ruahmanna a kal chho mek hi a lawmawm khawp mai a. Tin, kan hnianghnar khawpin ka hria a, gas harsatna te pawh hi kan nei lova, ramria kan han inhnawk deuh lai erawh kha chuan harsatna kan nei deuh a. Amaherawhchu, kha pawh kha kan duh vang leh kan tum vang a ni lova, ramri buaiyah kan kawngte min dan sak vang a ni a. Khangah te pawh khan mipui tanrualna a nasain ka hria a, mipui han phun, hmuh hrehawm leh harsatna siam zawnga an awm lo te kha a lawmawmin ka hria a, kan tanrual zia tilangtu niin ka hria a.

Tin, khulam ramri dep bialtuin a sawi kha Pu Speaker, han sawi nawn leh zawk ka duh a. Ramri issue chungchangah hi chuan tu party te mah hi inmahpupuh lovin, Mizo mipuite kan zavai hian tangrual ila ka duh a, chu chu zoram mipuite pawh ka ngen duh a. He ram, he hnam tan hian ‘i tangrual zel ang u’ tiin mipuite pawh ka sawm duh bawk a ni.

Tin, hei ruahmanna chi hrang hrang karah SEDP a lo lang a. Kan hre theuh a, ‘SEDP hi in va sem har’ ve tih te pawh a awm a; ni e, a dik khawp mai. Kan tum lawk loh leh kan beisei lawk loh hripuiinmin nuai a, 2019-20 inkarah khan a *pilot project* vety sector-ah hian mi 1020 bawr vel Ar, Broiler leh Rainbow Rooster bakah Piglet Multiplication leh fraternal unitatan te ruahmanna a kal mek a, khami kha a hlawm lian

zawka chhonzawm tumna ruahmanna leh Mizoram pum huapa kawng hrang hrangaruahmanna kal tura buatsaih chhoh mek a nih lain, kan tum loh leh kan beisei loh deuhin hripuiin min rawn nuai takah chuan kan ke pen tea khaihlak deuh a, amaherawhchu, tunah hian la kal mek a awm a. Kan beisei leh kan ruahmannate pha lo mah ila, mipuiin an hlut hlein ka hria a, hei hi ka lawmna a ni.

Pu Speaker, vawk hrileng ASF in min tibuai a, Mizoram pum kan buai a, chutiang chu kan dinhmun a ni a; cheng 25,000/- pawh hi hlu hlein ka hria a, tun kan harsatna dinhmunah hi chuan. An vawkte a thi vek a, a hran han lei lehna mai tur te an nei lova, kan harsatna hi a nasa a tunah chuan, covid hriin min nuai bawk nen. Hengah te pawh hian mipuite pawhin min hlut thiam hlein ka hria a. A tam lam ni lovin, SEDP in hmasawna tur, kan ram economy chawikanna tur ruahmanna kal mek hi a lawmawm khawp mai.

Hei PWD hnuaiah hmasawna chi hrang hrang a lo lang a. Kawngpui tha nei tura hmalakna formation cutting pawh km 351 lai leh rigid pavement km 212 chuang siam a ni te; Pu Speaker, kan bial chungah pawh tunah Vaivakawn - Chanmari Road te pawh an buaipui a, road-block te pawh awm hial a ni a. Hetianga kan kawngpuite ngaihsaka a awm hi a lawmawm ka ti khawp mai.

Tin, hei, zirna lamah bung thar te kan han hmu a, zirna in hrang hrangte thuan thatin a awm hi a lawmawm ka ti a. Tin, *bilingual*, English leh Mizo text book kan han nei thei tur te hi a lawmawm khawp mai a. Tin, zirtirtu chi hrang hrang indaih lohna a nasa em em mai a, hengah pawh zirtirtu 1,000 chuang fe mai, SEDP teacher te, regular leh MR teacher te nen phei chuan 3,000 dawn hi a hawlh tawhin ka ring a; hengte pawh hi a lawmawm ka ti khawp mai.

Tin, *Smart City* hnuaiah ruahmanna chi hrang hrang a lo lang a, infrastructure hmuh tur a awm a, chungah te pawh chuan smart city anih tawh avangin Aizawl khawpui pawh Zarkawt tlang Mizo High School field ah te pawh, thli thawa khu lutuk thin ang chi te, tin, khilalah khian Biak In te, Pioneer Missionary School te tin, Mizoram-a kan hotu lu ber, kan Chief Minister awmna bul a ni bawk a, khing vela khu luh luh turahte pawh tunah hian hna tan a ni tawh a, crore 16 lai maia he *Smart City* hnuaia min han ruahmansakte hi a lawmawm ka ti a, ka sawi tel lo thei lova.

Chu mai a ni lova, Edenthur field te pawh tunah hian min chei sak mek a, phul lem phah turin 'Smart City' a nihna ang ngeiin Aizawl khawpui chei a ni chho hi a lawmawm ka ti takzet zet a ni.

Tin, Transport Deptt. hnuaiah pawh heti zat mai revenue sorkarin kan han hmu te, tin, nichin khan Tlawng chungchangte pawh kan han ngaithla a. Ministry of Ports, Shipping & Waterways in 'Tlawng Lui National Waterway 102' tura a puang te hi bung

thar kan kai takzet zet a. Inland Waterway hi a senso a tlem a, a project hrim hrim pawh hi a funding 100% central atangin dawn tur a ni a, hengte hi a hlu em em a. Hmalak zelna, hma chhawp neia kalpui zel a ni hi ‘a van tha em’ ka ti a ni.

A tawp berah chuan he kan Governor thusawi zahawm tak hi a tha ka ti a, ka thlawp a, pass mai ka rawn rawt e. Ka lawm e.

SPEAKER : Member zahawm tak Pu KT Rokhaw ka sawm leh e.

PU K.T. ROKHAW : Pu Speaker, kan Governor thusawi hi ka han en thuak thuak a, a bik taka ka rilru min khawih deuh chu, SEDP chungchang hi a ni a. SEDP hi tun term inthlan hma khan kan Chief Minister ngeiin “Chhungkaw tinah nuaihthum sem tur” a ti a. “Congress chuan cheng nuai 1 kan sem a, MNF erawh chuan ‘chhungkaw tinah nuai 3 kan sem dawn” tih kha a ni a. Tin, a dik tak chuan kan mipuite hi kha nuai 3 beisei avanga he sorkar pawh hi hneh taka sorkar thei a ni a, member 28 lai thlan tlin an lo nih theihna chhan pawh he ‘SEDP cheng nuai 3’ vang hi a ni tih a hrechiangtute chu Mizo mipuite hi anni.

Vawiinniah hian harsatna hrang hrang an lo sawi a, cheng nuaih 3 sem hmian vawiinniah hian he sorkar hi kum 4 a kal tawh a, tunah hian a kum 5-na kan kal mek a. Chutah chuan cheng 25,000/ kan sem thei hram a, chu pawh chhungkaw 60,000 chauhah an la sem a. A second phase-ah cheng 25,000/- sem leh tura tih a ni a, chu chu March thla bawr vela chuan beisei tur a ni. Chuvang chuan, SEDP chungchanga Governor thusawiah hi chuan lawmthu sawina tur hi a awm thlawt hian ka hre lo a ni, a dik tak chuan. Keini Congress te kha chuan ‘cheng nuai 1 kan pe ang che u’ kan ti a, Pathian zarah kan pe vek a ni. Party party pawh kan thliar lovin, a MNF pawh, a Congress pawh, a ZPM pawh kan pe vek. Mahse, Pu Speaker, he chhungkaw 60,000-ah hian party dang chhungkua an tel lova, kei ka bialah phei chuan pakhatmah an tel lo a ni. Chuvangin, tunah kan Governor thusawi SEDP chungchangah hi chuan ‘lawmthu sawina tur a awm lo’ tih ka han sawi duh a ni.

Pu Speaker, a dawt lehah chuan, PHE ina Jal Jeevan Mission (JJM) hnuaiah tunah hian chhungkua 97,834 ah tui connection pek tawh niin, village-ah pawh connection 224 pek a ni tawh a, a lawmawm ka ti a. Heta ka han sawilan duh chu, connection pek tawh thenkhatte hian tui an la nei lo a ni. Connection kha nei mahse tui ber a awm tlat loh chuan awmzia a nei lova. Chuti lain connection thenkhatah chuan tui an nei tha a, an chhawr em em mai a ni. Chuvang chuan, kan sorkar hian thingtlang khaw thenkhata tui nei lote kha khawngaihin tui min lak sak sela, he JJM hian awmzia a nei dawn a. Ka bial khaw thenkhatah pawh min tihsak tawh a, kan lawm hle a ni. Mahse, tunah hian connection nei si, tui lak tur nei lote hi khawngaihin tui lak tur min ngaihtuah sak sela a lawmawm hle ang.

Tin, Education-ah hian ka han sawilan duh chu, keini kan bial te chu Autonomous District Council area a ni a, Mizoram sorkarin a enkawl theih chu High School chin khi a ni. Mahse hetah hian School zirtirtu an indaih lo em em mai a. Kan Minister hian SEDP teacher la lo phei se chuan a ngaihna a awm lo a ni. Ka bialah phei chuan teacher nei miah lo school kan la nei a. LDC pakhat a awm a, teacher an awm lova, a thenah chuan teacher pakhat chiah te an nei a ni. Chuvang chuan, he SEDP atanga teacher an la hi kei chuan *tha* ka ti a. Ka biala school thenkhat teacher pakhat chauh awmna angah te SEDP atangin pathum te min laksak a, kan kal ve thei tawh a ni. Mahse, an hlawh erawh chu a tlem a, chuvangin kan sorkar leh kan Minister te ka ngen duh chu, ‘thingtlang lam High School hi khawngaihni ngai pawimawh deuh se’ tih hi. A chhan chu, khawpuiah chuan teacher an nei tha a, teacher reng reng hian khawpuia awm hi an tum vek mai a ni. Hna an dil lain, ‘khawiah pawh ka awm thei ang’ an ti a, sorkarin a la a, a hnu rei lovah khawpuia awm an kherh leh a, hei vang hian thingtlang lamah teacher kan nei chhe ta em em thin a ni. Chuvang chuan, kan Minister zahawm tak hian, SEDP teacher an lo la leh a nih pawhin ‘thingtlang lam High School hi lo ngai pawimawh se’ tih kha ka ngen duh a ni.

A tawp nan pakhat ka sawilan duh chu, Transport Department-ah hian Consultative Committee Member ka ni ve a. Kei hi kum eng emaw zah, 1993 atanga he House-ah hian Pathian zarah lo thu ve tawh ka ni a, ka lo experience-ah chuan, Transport Department hi englai pawha chawi belh reng, revenue mumal pawh a nei lo a ni a. Heta revenue-ah cheng nuai 2,800/- lo lang ta mai hi ropui ka tiin, mak pawh ka ti a. Chu mai ni lovin Pu Speaker, wawiin nia Inland Waterway - Tuipui D Hnahthial atanga Lawngmasu thlengin pawm a ni ta hi a lawmawm ka ti a, hei hi kan Minister pawh hian central lamah a hlawhtlin ngei theih nan theihtawpa min lo bawhzui sak ka ngen duh bawh a ni e. Ka lawm e

SPEAKER : Tunge han sawi leh ang? Member zahawm tak Er. H. Lalzirliana ilo sawm ang.

ER. H. LALZIRLIANA : Pu Speaker, ka lawm e.

Vawinah nimina kan Governor thusawi kan member zahawm tak Pu ZR Thiamsanga’n *Motion of Thanks* a putluh chungchang sawihonaa han sawi duh tlem ka nei ve a.

Hei, kan Governor hian point No. 1-ah a han dah chat mai a - Kan Mizoram Police-te thumthatna leh kan ramri venhimna tur chungchanga sum leh pai Mizoram sorkarin a senso te, tin, he ramri buai hi kan member zahawm tak tak ten an sawi tawh a, thum that kan lo ngai hle a. Mitinin kan rilru pekna te a lo ni a, Mizo mipuite kan rilru awmna chu khulai *Assam leh Mizoram ramri* khu a ni. Chutiang taka Mizoram sorkarin a buaipuia, sum leh pai tam tak senga kan force te a thumtha hi ropui ka ti a.

ER. H. LALZIRLIANA : Chumai ni lovin, Mizoram chhungah manpower indaihlohna avang hian, kan police force te hi indaihlo nasa ber pawl an ni a. Sum leh pai harsatna avangin recruitment tih tak tak theih a ni lova, chuti chung chung a zual-zapui phuhrukna tura hmanni lawka mi 286 sawrkarin compassionate ground-a a han la te kha a lawmawm ka ti hle a ni.

SEDP chungchangah hian kan sawi tam ber chu ‘family oriented’ kan tih kha a ni deuh berin a lang a. SEDP sorkar *flagship programme* hnuaiyah hian project hrang hrang kalpui a ni a. Infrastructure han din nan te, man power strengthen nan te, zirtirtu a ni emaw, Health Department han thumthat nan te emaw kawng hrang hrangin SEDP project hi hman a ni a. Sawrkar flagship programme anih angin budget hmasa ber kum 2019-ah SEDP tan cheng vaibelchhe 750 a dah nghal a ni. Amaherawhchu, hman hmam Covid-19 a rawn thlen tak avangin kha ti lamah khan divert vek a lo ngai ta a. Chutiang chuan namen lovin kan buai a, harsatna kan tawk a, infrastructure siam belh a ngai a, kan pachhe em em a, inzir chawpin kan bei chho a. Sorkar leh mipui thawhhona zarah vawiin hi kan thleng chho ta a ni a.

Chumai a ni lova, ran hri namenlo in min han tlak buak a, vanduinah taw tam tak, eizawna bahlah leh sum tam tak chan chhungkua, vawiin thlenga lei rem rap hlei thei lote pawh kan la awm mek a ni. Ramri buai avangin namenlo in sum leh pai bakah mihring kan buai a. Chuuti mek laiin refugee eng emaw zah, Burma lam atangin mi 30,000 chuang, tunah phei chuan Bangladesh atangin mi 400 bawr vel kan han neih belh leh a ni a. Hengho lo tuamhlawmna, an shelter ringawt a ni lova, an education leh health facilities thlengin sorkarin a lo buaipui a ngai a.

Tin, Lirngching vawi eng emaw zah tum danga kan la hriat ngai em em loh he hun chhung hian kan tawng a. Khawchhak lamah vawi 100 deuhthaw, a lian deuh leh a te deuh te kan han tawng a nih kha. Chungah chuan harsatna namen loin a tlakbuak karah sorkarin a dinna a ding ngheta, mipuite tana hamthatna tur *family oriented* SEDP a la kalpui hram hram thei hi; keini bialte chu hnam chekhnawk te kan tam a, a mihring khawsak hrim hrim pawh kan khawsak a sang lem lova. Sawrkar-ina *family oriented* SEDP heti chung pawha a la kalpui thei hi kan lawm em em a ni. A dik tak chuan kan bial chhung mipui, family tam tak te hi family bank account-a cheng 10,000 pawh lalut lo cheng 20,000 chuang an han nei ve te hi an lawm em em a, hahipin an sawi a ni.

Point No. 2-a rawn lang Union Cabinet-in 30% North Eastern Council hnuaiyah ‘Scheme of Northeastern Council’ tia hnam hnuafual chawikanna tur programme a rawn nei a, budget a rawn dah hi kan lawm em em a. Hei hi kan bial tan chuan vanneihna tur a ni. Heng vang hian he Governor speech-a minority te chawikanna tur a rawn telh hi kan lawm em em a ni.

Health & Family Welfare chungchangah hian “necessity is a mother of invention” a tih ang deuh hian Covid-in min han nuai tak tak a, harsatna namenloin min han nuai tak tak a. ICU te, ventilator te kan lo pachhiat zia, kan lo neihloh zia kha a Chiang em em mai a ni. Chung zawng zawngte avang chuan kawng hrang hrangin kan health infrastructure improve-na turin nasa takin sorkar leh khawi khawi emaw atangin tanpuina te dawngin vawiinah chuan civil hospital leh, Lunglei lam hospital lamah te pawh a ni ang kan khawl neih loh te pawh kan han neih belh a, chutiang chuan facilities/infrastructure tam tak kan han improve a, thingtlang lama PHC te, district hospital te pawh thum tharin a awm zel a. Chumai nilo, sorkarin kan health sub-center tawih tawh tak takte min repair sak a, new construction te min han pe a, kan bialah ngat phei chuan health clinic tak ngial pawh la awm lohna khaw 15-ah tunah hian SEDP kal tlangin min han pe hi kan lawm em em a, health worker leh helper te kan han la a, a sakna turte pawh sawrkar hian min ruahman sak dawn niin kan hria a, kan lawm em em a ni.

Tin, Food Civil Supplies-ah hian kan bial hi kan lawm lo thei lova. Infrastructure tam tak chu dawng lo mah ila kan mamawh ber mai, sorkar hluiah khan DCSO office kha kan sawrkar tirh khan thliin a len thlu tawp mai a, district office pawimawh ber kha; chutichuan DC office khawi lai room-ah emaw luah tirin hun eng emaw chen an han awm hnuah kan minister zahawm takin khawi khawi atangin emaw sum min pawh pen sak a, tunah khuan kan sa mek a, luah theihin a awm tep a, ‘kan lawm hle a ni’ tih kha ka han sawi duh a.

Khatieng hun harsa leh manganthlak tak kan tawh lai pawhin buhfai food grain chungchangah te, PLO product-ah te, LPG-ah te mipui ten harsatna kan tawh lo mai ni lovin, kan hnianghnar a ni. Kum danga kan dawn ngailoh a free-a buhfai dawn te pawh thla eng emaw zah thingtlang mi ten kan han nei kha kan lawm hle a ni.

LAD-ah VC house repair leh a thar eng emaw zah kan han dawng a, khaw tin mai hi kan bialah chuan, a tira ka sawi ang khan kan ngah ber chu *neihloh* hi a ni a, engkim mai hi kan lo nei lo deuh vek mai a, hengte kan han nei thar tur hi kan lawm em em a. Tunah hian eng emaw zah kan bial chhungah VC house a thar leh repair te kan han nei a ni.

P&E-ah hian Tlawva Small Hydrel Project leh Kawllam Hydrel Project te kan han nei a, heng hi a lawmawm ka ti.

Governor in point eng emaw zah a rawn sawi a, sawi tur tam tak a awm ang a, mahse sawi zawh sen pawh a ni lova, helaia a rawn sawi hi a zualpui tak tak a nih ka ring a,

JJM chungchang chu kan hria a, vawiin hian keini *aspirational district*-ah phei chuan kan chhawr tangkai em em mipui an lawm em em a ni. An mahni khua leh inah te tui an han herh haw ve te hi kan lawmna a sang em em a ni.

Airport chungchang hi an sawi a; Airport atanga revenue kan hmuh ringawt hi 725 lakhs a ni tawh a, revenue receipt kan exceed-na hi 112.33 lakhs a ni hial a ni. India rama Airport tam ber hi Airport Authority of India-in a enkawl a ni a, keini Mizoram pawh hi ka lo hriat ve dan chuan Airport Authority of India hian enkawl a duh a, ‘pek ve mai te pawh hi a tha lo em ni’ tih ngaihnan te pawh a awm ve thinin ka hria a. Amaherawhchu, kan state-ina kan neih a ni a, state hian enkawl ve ila, kan asset a nih ve avangin tih hram hram, harsa mahse kan Chief Minister zahawm tak hian a sawi hi ka hre thin a. Vawiin hian Airport improve a lo ni tur te, vairamah rei tak kan awm a, Mizoram haw te hi a buaithlak em em a ni. Ruang han inthawnah te thlawhna a tlem si a, last minute-ah phei chuan Air India lovah phei chuan ruang pawh a inthawn hleih theih lova, a fare a sang em em a. Tunah chuan thlawhna pawh tam tak a lo awm tawh a, mipui leh khatiang vanduinawna tawkte tan pawh khan a lo awlsawm phah em em tawh a ni.

Tin, Home chungchangah te pawh recruitment kan han nei a. Hmanni lawk khan Delhi-ah PRS-in training a conduct-ah MLA thenkhat te kan attend ve a. Chuta an sawi pawimawh em em chu, state tinte hian tuna harsatna kan tawh chu, revenue deficit hi state tin hian kan lo nei sang em em vek mai a ni. Chutah chuan an concern ber chu state tinte hian revenue collect chungchangah hian ‘tan kan lak tlan a ngai a ni’ tih hi a ni a. Chutah chuan he Governor speech atanga ka lakchhuah revenue kan collect hrang hranga hi kan sawi pur pur ang a.

Transport Department hian cheng nuai 2,800 chuang an la, Printing & Stationary hian printing works leh stationary items-ah hian 81 lakh leh 93 lakh a collect a, Lengpui GAD Airport hian 725 lakh, Revenue & Settlement Department hian 524 lakh. Chu chu revenue tax leh non-tax collected a ni a, registration fee leh stamp duty ah hian 589 lakh a ni bawk a. Taxation Sale Tax-ah 717 crores; Excise-ah 131.38 crores. PHE hian vaibelchhe 26.90 a vaia collection hi 794.56 crore a ni. Hetah hian a collection a tha hle a, thla hnih (tun financial year) chhung hian kan la nei a ni. Pu Speaker, ka lawm e.

SPEAKER : Member zahawm tak Pu K. Laldawngliana ka sawm e.

PU K. LALDAWNGLIANA: Pu Speaker, ka lawm e.

Nimin lama kan Governor zahawm takin Mizoram sorkar hmalakna point 38 (phek 17) a langsar zualte a rawn present chu Dr. Thiamsanga’n vawiinah a rawn move

a, sawikhawmna hun tha kan nei hi a lawmawm hle a ni. Sawi tur tamtak a awm a, amaherawhchu hun chep tak karah tlema zawng ka han sawi ve duh chu –

Ramri chungchangah hian kan sorkar, MNF sorkar mek hi ‘a thawk tha hle a ni’ tih kha ka han sawi phawt duh a ni. A behbawm sawi tur tam tak awm mahse tlem ka han sawilang mai ang a.

Covid-19 hrilen dan te kan hria a, dam khawchhuakin heti hian vawiinah session-te kan han nei leh thei te hi Pathian hnena lawmthu sawi mawlh mawlh hi kan tih makmawh a niin ka hria a. Hna thawk thei lovin harsatna tam tak kan tawk a, khatiang kara kan dam khawchhuah tawh hnuah kan ram mipuite a tam zawk eizawmna tur atana tul leh mamawh ruahmanna lo awm tawh te a tih theih dawn lo emaw kan tih tawh hnuah mi chhungkaw 60,000 hnenah ₹25,000/- a bul tan nan kan pe thei ta hi a ropui ka ti a. A 2nd installment pawh pek leh zel tur a ni te hi a ropui hle a ni tih kan sawilang tel duh a. A dawngtu tur keini zokhaw lama mite kan lawmawm em em a, dawn leh thuai pawh kan chak a, a bak pawh pek leh zel theih hi a chakawm hle mai a, sorkar pawhin a pe leh zel turah ngai ila tih kha kan sawi duh a. A dawng ve lo tan chuan a lawmawm lo pawh a ni thei a, ‘a dawngtute tan hian a lawmawm em em a ni’ tih hi ka han sawilang duh a ni.

Health Department chungchangah hian keini zokhaw lamah chuan health clinic awm lohna a tam em em a, amaherawhchu kan sorkar chak takin health worker te keini khua pawhina an la hmuh ngei reng reng loh khaw 5 velah min han rawih sak a, hriselna kawngah hmasawmna, hmalakna ropui tak kan han hmute hi a lawmawm hle a ni.

Kan ramin kan do em em chu *ruihhlo* a ni a, chumi kawngah chuan Excise Department ten theih tawkin hma an la a, a zawng zawng man vek theih a ni lova, tam tak an man a. Hemi chungchangah hian kan sorkar leh department ringawt tan chuan han tihrem ngaihna a awm lova. Chuvang chuan thalaite kan mangang a, kan dam khawchhuah theihna turin ruihhlo hi kan zavai hian kan do tlan a ngai a. YMA, kohhran, mimal leh sorkar hnathawk zawng zawng pawhin kan do hi a tul em em a ni.

Food, Civil Supplies & Consumer Affairs Department lam atanga kan sawi fo thin LPG *home-delivery* chungchang hi a bul tantute kan ni ve a, sorkar hnuaiah MIZOFED-ah Chairman te in ka lo awm ve thin a, harsa takin awareness te kan ti a, bul kan tan ve a ni. Consumers hruihute kan awm nual bawk a, tunah home delivery te kalpui chhoh zel theih a ni hi lawmawm ka ti hle mai a. Chutih rual chuan harsatna tamtak awm thei chu, consumer leh agency te thawhhona tha hi a tul hle a ni. Member zahawm tak tak ten an sawi kha a taka kan tawn leh awareness petu ah kan tan avangin, ‘xerox’ tih kha chhungkaw tam tak tan chuan a harsa lem lova, mahse chhungkaw tam tak tan chuan harsatna thlentu anih avangin supply leh co-operation hotute atanga agency te hnenah ngen hi chu tha ka ti khawp mai. Hming, consumer number leh phone

number ziahlan mai khan a felfai thei a, hei hi chhungkaw tam tak harsatna kan solve theihna a ni tih kha kan sawilang duh bawk a ni.

Kan hriat angin buh leh bal mizoten kan tharchhuak tam lova, hei hi chu zep rual a ni lova. Agriculture Department atang te pawhin nasa takin hmalak a ni a, awareness pawh neih a ni a. Mizoten buh leh bal kan tharchhuak tam lova, mahse supply department ten hneh takin min supply a, harsatna kan tawk lova. Oil lam ni se tun hmaa kan buaipui luai luai 'pawlh dal' tih chungchang pawh hi tunah chuan a awm meuh tawh lova. Legal Metrology hotute kan dawr a anni pawhin 'tunah hi chuan pawlh dal a awm mumal tawh lova, a tha khawp mai' tih kha report kan dawn anih avangin, tun sorkar chak tak hmalakna hi ropui ka ti a.

Tin, Agriculture Department atang hian hmalakna tam tak FOCUS kaltlangin a awm a, hengah te hian kan farmer ten lawmna tur an ngah em em a, an hlim a ni. Aizawl bialtute ah chuan farmer kan tam lem lova, kan han sawite atang kha chuan a ni viau maithei a, amaherawhchu zokhaw lam, lo lam hnathawktute tan chuan agriculture kaltlanga hnathawktute tana tanpuina awmte, a link road laih te hi lawmawm kan ti a, kan lawm hle a ni.

Tin, Horticulture Department atanga hmalakna ropui tak mai Covid hrilen lai leh tun thleng pawha kan buaipui Governor thusawia lo langah hian Pu Speaker, kan farmer ten malsawmna tam tak an dawn - tomato, zikhlum, water melon, dragon fruit atang tea sum tam tak an hmu te hi a ropui a. Sorkar ang pawhin theih ang tawkin Horticulture Department atanga awareness pek te leh tanpui ngaite pawh tanpui hi an hlawhtlinna a ni tih pawh ka han sawi duh bawk a ni.

Tin, Covid hri len lai pawha harsatna tam tak kan tawh pawh hi Co-oprative Deptt. kaltlanga kan ram siamthat theihna, party bik awmlo, sakhaw hnan bik awmlo, pawl bik awmlo, mirethei leh hausa thleibik awm lova co-operative movement kaltlanga rawngbawlina nasa tak mai kalpui mek hi chhawm nun zel a ni a. Register ah te pawh ziahlan vek a ni a, 1306 vel lai registration a awm a. Tichuan, Covid hri len laia ropui em emmai chu, MCAB, MUCO Bank te, ramdang atanga sum chhuak vek miah lova kan sorkarin tangkai taka a hmang te hi ropui ka ti a. Chumi piah lamah, khang a hnuai leh zual dahkham pawh ngai lo, 'PACS' kan tih kaltlanga sumdawng leh nitin eichawp dawr siam ten an din a ni a, hetiang loan pek te hi kan Governor pawhin hriaa a rawn ziak lang te hi ropui ka ti a. Kan sorkar zahawm tak pawhin co-operative movement hi ngai pawimawha a kalpui zel hi a tul hle a ni. Tin, hmanni lawkah Co-oprative Development Council meeting pawh neih a ni tih te ka han sawi tel duh bawk a. A lawmawm hle mai a, hei hi sorkar ang pawhin 'kan ram hnuk a ni' tih ka han sawilang tel ve duh a ni.

Tin, Sports & Youth Service atanga hmalakna, kan bial chhungah pawh malsawmna tam tak a awm a, thenkhatin ‘phul lem phah a ngailo’ an ti a. Tunah Kawnpui-ah siam mek a ni a, kan thalai rualte an kal a, keini pawh kan kal a. An nghahhlelh dan chu nitin hian mi pali, panga te, zawh hun nghakin hnathawktu an vil hi a ni ringawt mai a. Tin, khaw hrang hrangah pawh thalai rualin nuam an tih zia leh an hlim zia kan hmuh vek avangin hengte pawh hi thenkhatin ‘tha’ kan ti a, thenkhatin tha kan ti lo lam ni lovin thalai rualin tha an tih em avangin, hengte hi sawisel sawisel chi niin ka hre lova. Hengte hi a ropui ka ti a, ka han sawilang tel duh a ni.

Tin, Tourism Deptt. ah hian ka bial Khamrang-ah pawh hmalak mek a ni a, ‘tender pawh koh mek a ni’ tih ka han sawi duh bawka ni.

Awle, Pu Speaker, ka han khaikhawm deuh tawh mai ang a. Education chungchangah ‘revival education’ program hnuaiyah school zawng zawng ka bialah kan tlawh chhuak a, theih ang tawkin welfare te nen hma kan la a. Tichuan, SEDP kaltlanga zirtirtu min pekah hian zokhaw lam hi chu kan lawm a, Aizawl lamah an indaih deuh anih pawhin, zokhaw lamah hian kan indaih lo em em a, hengte hi nakinah kan sorkar pawhin kan education than zel theihna tur leh result tha nei zel turin ‘min pek belh zel teh u a,’ tih kha ka han sawilang tel duh bawka ni. Tin, sikul inchung pawp an sawi a, sikul sak thar te leh chei that te pawh kha tam tak a awm a ni tih kha kan sawi duh bawka ni.

Tichuan, Pu Speaker, kan Governor zahawm takin sorkar hmalakna a langsar zual a rawn chhawp Pu Thiamsanga’n a rawn move hi ‘ka thlawp e’ tih kha ka rawn sawi a ni a. Ka lawm e.

SPEAKER : Prof. F. Lalnunmawia, Member zahawm tak sawm ila, chumi zawh ah Pu Vanlalhlana.

DR. F. LALNUNMAWIA : Pu Speaker, ka lawm e.

Kan Governor zahawm takina a thusawi chungah *lawmthu sawina* member zahawm tak Dr. ZR Thiamsanga rawn proposed-ah hian ka lawmna zual thenkhat han tarlan ve ka duh a.

A hmasain Pu Speaker, ka bial chhung atanga tan ka duh a. Ka bial chhungah a hming lam chhuakin kan Governor zahawm tak hian a rawn sawi a. Aibawk, SPMRM Rurban Cluster, ‘Aibawk RD Block hnuaiyah hlawhtlinna lawmawm tak mai kan nei a ni’ tih kha a rawn tarlang a. Chu chu India ram pumpui Rurban Cluster sang chuang zingah Aibawk RD Block hi a ti tha ber kan ni a, he project zo hmasa ber a ni bawka. Hei hi India ram puma a *titha ber* kan nih thu a han tarlang hi a bik takin kan lawm hle a. A changtu Minister leh department chungah lawmthu ka han sawi a ni. He SPMRM

scheme hi kan bialin kan chhawr a, theih phei se titha lawmman te hi min pe thei se kan duh hle a ni tih kha ka han tarlang tel duh a ni, Pu Speaker.

Tin, ka han sawi duh leh chu, hei kan Governor zahawm tak hian Mizoram infiam mite, a bik takin infiam mi hlawhtling Jeremy Lalrinnunga leh Lalremsiami te a rawn tarlang kha ka lawmpui hle mai a, an ni hi. Tin, vawiina ka han tarlan tel duha chu, anni pahnih kan lawmpui rual hian, kum kal ta leh kumin chho ah Sports Department hnuaiiah hian infiam mi tam takin lawmman an dawng a ni tih kha kan tarlang hlek duh bawk a, han tarlan vek sen a ni lova. Heng zawng zawnga Sports Department hmalaknaah infiam mi lawmman late an pun chhoh danah pawh hian hma nasa takin kan sawn a, lawmthu ka sawi a ni.

Tin, Pu Speaker, SEDP chungchangah hian han tarlan ve ka han duh chu kan beisei leh he sorkar-ina a beisei angin ka kalpui thei lova, a chhan leh vang chu kan hre vek a, Covid-19 hrilengin kum 2 zet min tihbuai a vanga sum leh pai harsatna avangin kan sorkar in duh angin leh beisei angin a kalpui thei lova. Kum 2019 khan Pu Speaker, kan la hre reingin ka ring a, pilot project hi lo kalpui tawh a ni a, chhungkaw 1,000 zet thlangin cheng 3,00,000/- dawng tura thlan te pawh a lo ni tawh a. Vawkvulh te, Ar vulh te, a then chuan 1,50,000/- te, a thenin cheng 2,00,000/- te an dawng a ni tih kan hriat vek kha. Amaherawhchu, 2020 kum tirah hri te a lo leng a, kan tum leh sorkar tum angin kan kal thei lo a ni. Chuvang chuan sorkar a harsatnaa kan mangan zia te kha kha duh aiin kan theihnghilh ta mai em aw aw ka ti a. Kan harsatzia leh kan mangan zia te kan thlirlet chuan SEDP kan duh anga kan kalpui thei ta lo te hi, Pu Speaker, kan inhrethiam tlangin, mipui pawhin an hrethiam tlang chuan kan hria a ni.

Tin, hemi cheng 25,000/- chauh piahlamah hian Pu Speaker, han tarlan tel ka duh a, kuhva-ah pawh hian pilot project ah chhungkaw 1,600 te hnenah kuhva tiak 1,300 vel theuh leh a chinna tur pawisa 45,000/- pek anni. Khang te pawh kha cheng 25,000/- chauh a ni lova, thil tam tak kan lo ti tawh a ni.

Tin, Horticulture-ah pawh hian dragon fruit ching tur mi eng emaw zah hnenah tanpuina pek a ni a, unit khatah cheng 1,20,000/- hu kha chhungkaw eng emaw zah hnenah pek an lo ni hman tawh a ni. Chung te chu tunah hian a kal chho mek a, a hlawhtlinna pawh dragon fruit-ah phei chuan kan hmu tan tawh nghe nghe a ni. Heng piahlamah hian sorkar hmalakna a lo lang zel ang a, SEDP te pawh tam zawkin kan sem chho zel ang tih ka beisei a, kan sorkarpui leh ngei ang tih te pawh Pu Speaker, ka ring a ni.

Pu Speaker, a dawt leha ka han sawi leh duh chu, Horticulture Department hmalakna Governor zahawm takin a a rawn tarlanah hian tomato leh zikhlum te chin hlawhtlin anih thu a rawn sawi bawk a. Heta a rawn tarlanah hian, kan Dy. Chief Minister bialah phei chuan hlawhtlinna nasa tak kan hmu a, Tualte khua-ah ringawt

pawh tomato chin avangin kum kal ta chhung khan cheng 200,00,000/- an lei chhuak a ni. A ropui hlein ka hria. Tin, chu mai bakah khilai biala khaw dang Sialhawk-ah lakhuihthei nasa takin an ching a, Mizoram mai piah lamah foreign ram UAE, Qatar thleng te pawha thawnchhuah a nih kha. Kum lo awm leh turah pheii chuan tam zawk pawh kan thawnchhuak ngei ang tih ka beisei a ni.

Tin, Pu Speaker, Horticulture Deptt. hmalaknaah tho hian Governor ina a rawn sawi lawmawm hlea ka hriat chu, zikhlum atanga tharchhuah hi cheng vaibelchhia 3.7 a ni a. Tin, Lunglei, Saitual, Kolasib leh Serchhip District-ah water-melon ah cheng vaibelchhia 3.8 man tharchhuah a ni tih hi a rawn tarlang a ni. Chuvang chuan, horticulture lamah hianin hma kan sawn hle a ni tih hi helaiah hian a rawn tarlang a a lawmawm hlein ka hria a ni. Tin, Pu Speaker, 2022 nikum khan dragon fruit chingtute hian an lei chhuah hi cheng vaibelchhia 600.24 a ni a, hei pawh hi a lawmawm hlein ka hria a, India ramah a titha ber kan ni chho a. Heng kan sawi thei leh thlaite hi Horticulture Department, kan Chief Minister kaihhruaina hnuaiyah nasa takin chin chhoh a ni a, dragon fruit-ah ringawt pawh cheng vaibelchhe 6 ai tam an han lei chhoh hi thil lawmawm leh chhinchhiah tlak tak niin ka hria. Tin, heta tarlan loh, hmun thlan bikah mau thahnem tak chin mek a ni bawk a, sorkarin nasa takin hma a la chho mek a ni. Hengah te hian lawman tur a tam hlein ka hria a ni.

Tin, Pu Speaker, PHE lam hmalakna hi han tarlan hlek ka duh bawk a. A bik takin PHE in JJM scheme hnuaiya tui in tur an peknaah hian hei, kan bialah pawh nasa takin hmasawanna kan hmu a, he scheme hnuaiya hmasawanna leh hmalakna langsar ber pakhat a ni. Khaw tin deuhthaw ah hmalakna kan nei chho a, khaw tinin tui khawlna tanky kan nei chho a, kan lawm khawp mai a, harsatna lutuk awm lovin tunah hian tui hnianghnarin kan hmuh chho thuai thei dawnin ka hria a, sorkar hmalakna chungah lawmthu ka sawi a ni.

Tin *Alternate Gravity Water Supply Aizawl* hi Tawih Tlang atangin gravity hmanga Aizawl chhim lampang tui pekna tur saw a kal chho mup mup a. Aizawl chhim lampang hi tui pipe phum a rawn thleng tep a, nasa takin kan tangkaipui dawn niin ka hria a He hmalakna lian tham kan Governor zahawm takin a a rawn tarlang hi a lawmawm hlein ka hria a ni.

Tin, Pu Speaker, ka tarlan leh duh chu, Education Department-in mathematics leh science subject bikah te English leh Mizo *bilingual text book* tihchhuah a ni ta hi lawmawm hlein ka hria a. Zirlaite, a bik takin school thaa kal theilo te leh thingtlang kilkhawr zawka awm te tan pawh science leh mathematics zirlai an hriatthiam leh zual theih nan Mizo tawng ngeia dah a ni ta hi department chungah lawmthu ka sawi a. Kan Minister leh HRD Board Vice-Chairman te hmalaknaah lawmthu ka sawi a ni.

Awle, Pu Speaker, sawi tur a tam hle a, kan sawi vek seng lova. Engpawh ni sela kan Governor zahawm takina he sorkar hmalakna a sawi, Dr. ZR Thiamsanga'n *Lawmthu sawina* a rawn move hi 'lawm takin i pawmpui ang u,' tiin ka rawn thlawp a ni e. Ka lawm e.

SPEAKER : Member zahawm tak Pu Vanlalhlana ka sawm e.

PU VANLALHLANA : Pu Speaker, ka lawm e.

Kan Governor zahawm takina address nimina a pek hi minute 40 chuang awrha sei a ni a. A speech han en hian department 30 chuang vel highlight-in an hnathawhte a rawn tarlang a. Chuti lain *Motion of Thanks* move-tu khan minute 50 vel hun a hmang a. Lawmthu sawi a tul si a, lawmthu sawina tur kha avang a ti a ni ang, lawmthu kha a sawikual a sawikual a, a tang lutuk kha, a chang pheih chuan Governor-in *Motion* a move ang khan a rawn ti deuh thin a. Tan a ngai deuh a ni ang e, a thiam awm e.

Kan Governor Address kha kei pawhin uluk takin ka zir a, kan Governor hi mi ropui tak a niin ka hria a, ngaisanawm ka ti a, kan ram hnufual zia te hi a hrechiangin ka hria a, hmasawna lamah ke kan pen pawh min duhpui a. Department hrang hranga Minister-te, Secretary-te leh Director-te thlengin a ko a, an hnathawhte a sawipui a, advise te a pe a. Governor dangin an la ti ngailoh ang kha a rawn ti a. 'Engnge a chhan' kan tih chuan, Mizoram hian hmasawn ve se min duh vang a ni. Hnufual min ti em a, tang deuh se, sorkar hnathawkte pawh hi tang deuh se tih a duh niin ka hria a. Tin, Mizoram-ah chuan hnathawh hun chhung a tlem tih te a hria a, hengte hi Mizoram anih avanga a tlem bikna chhan engnge aw, ka ti a. Tripura-ah te chuan kawng an nei tha em em a, Assam leh thenawm State dangte pawh fur ruahtui neih vek an ni a, 'Mizoram-ah hnathawh hun chhung a tlem' tih hi a hun taka hnathawh zawhloh chhuanlamah hian kan hmang nasa lutuk deuh a. Kan Governor-in BRO a kawmnaah pawh khan, "Mizoram-ah chuan hnathawh hun chhung a tlem a, thawh theih lai hian nasa taka thawk tur" a ti ringawt mai a, a zialo lam deuhin ka hria. Engpawh ni sela, mi thenkhat, 'Governor hian a tihloh tur a ti a ni' tite pawh an awm mai thei a. Chiang taka lang chu, kan Governor hian Mizote hi min hmangaih a, hmasawn se min duh, chumi atan chuan thahnem a ngai em em a ni tih kha a thusawi atang hian alangin ka hria a.

Tin, a sawi awm tak a sawiloh a awm nual mai a. Ramri buai avanga mipui kan tanrual zia, sorkar kan thlawp that zia, NGO-te nena kan tan ho a thatzia te kha han tarlang se ka duh khawp mai a. Ni dangah Governor Address kan hmuh fo thin, lo lang lo a awm nual a. Entirman Assam Rifles sawnchhuah te pawh Governor address-a kan hmuh thin a ni a, tunah hian a lang lova. Tin, thil dangdai deuh, "school uniform inang vek hman tur a ni" tih te hi thil thar leh thil danglam a ni a, han tarlan ve awm tak te pawh ka ti a. Tin, kan hma lawkah G20 Summit Mizo hovin Aizawl-ah kan thleng ve dawn a, heng te hi *historical event* a ni a, tarlan awm takah ka ngai a. Tin, PAHOSS te

ni danga kan hmuh thin mau chungchang, sorkar *flagship programme* te kha a lang ta lova.

Tin, kuhva hian mitin min tibuai em em a, dan lo anga kuhva lo lut leh dan anga Mizoram-ina a tharchhuah kan buaipui em em a, heng issue te hi rawn highlight tura ka ngaih, a rawn highlight lemloh a ni tih kha ka rawn tarlang hmasa a.

Tin, kan Governor Address ah hian thil lawmawm tak mai ka hmuh a chu, Ministry of Port, Shipping and Waterways, chuan Tlawng Lui chu '*National Waterways 0.2* ah a rawn puang' tih hi, a puangtute phei chu, central sorkar daih a ni a, amaherawhchu, Governor Address-ah hian a rawn tel a, hei hi a lawmawm ka ti a. Kan rama lui lian ber leh lawng zawh thui thei berna hetiana '*National Waterway 10.2*' khawmual *National Highway* angah ka ngai mai a. Hei hi transport atan pawh Mizoram-in kan hlawkpui tur niin ka ngai a. Tin, Khawthlang Tuipui pawh '*E-tender* chhuah mek a ni' tih te a han tarlang te hi thil lawmawm tak niin ka hria.

Thil naran te hi a awm a. 36-naah hian "pension case 2436 a lut a, chutah chuan 1112 chinfel a ni" tih te hi chu, sorkarin a tih tur hi a ti zo lo zawk a, chinfel vat vat a, a chanve chang ni lovin, a vai hian chinfel mai awm hi a ni a; *Achievement*-ah an tarlang si a, 'achievement' pawh niin ka hre vak lova.

Tin, para tawp berah khan *Lok Ayukta* a rawn lang a. Lok Ayukta chu kan nei ve ngei mai a, corruption do tur leh corruption tite hrem tura tih a ni a. Chutih lai chuan, awareness host-tu ang deuh hlekah hian a rawn tar lang a. Member zahawm tak Pu Lalchhuanthanga'n a rawn sawi ang deuh khan, Lok Ayukta kan nei a, kan chhuang duh anih chuan hna thawk theiin i siam ang u. Hna thawk rawh se, corruption tih hmangte pawh hrem se, chhui rawh se, tih kha ka ngaih dan a ni a. A rawn tarlan dan hian duh thu a sam lo deuh hlek a ni.

Tichuan, point hmasa berah hian thiante ang bawka ka rawn react ve duha chu, *ramri-buai* kan han nei a, Assam nen. Chutah chuan Mizoram police leh Assam police te an inep a ni. Assam police chuan an rawn rah chin apiangah tent tha takin an rawn kaih a, syntex tuizem nen, generator te nen, solar lamp nen mumal takin an inbun thei zel a ni. Kan police-te lam erawh chu ruah sur hnuaiyah silpauline pahnih vel nen khan an han inep ta a ni a, an inthlau deuh a ni. Chuti chung chuan kan police te huai zia a lang a ni. Chu chu hriain Mizoram sorkar chuan nasa takin hma a han la ve a, tuna kan han hmuh ang hian, "Construction of proper accommodation for Police" atan cheng nuai 327.56 hman a ni a, 'various buildings at inter-state border' a tan cheng nuai 495.41 dah a ni a; "Water Supply Scheme for Mizoram-Assam Border" tih a ni leh a, chutah chuan cheng nuai 96.50 dah a ni ta a, a lawmawm khawp mai a. Amaherawhchu, report ka dawn danin, pawisa heti zozai sennaah hian building thenkhat hi Assam-type building te an ni a, engzat nge an sak te kan zu hre chiah lova, amaherawhchu enfiah

deuh a thain ka hria a. Tin, building sak thenkhatte phe chu Assam police ten an luah ni awma sawi te a ni leh zel a, chungte chu hriat chian a chakawm hle mai a.

Tin, Water Supply Scheme atana cheng nuai 96 senna ah te pawh hian, ‘engmah chutiang senna tur hnuhma a awm lo’, tih te a ni leh zel a. Chuvangin, hengte hi enfiah a tha ka ti a.

Hemi dawt chiah *para*-ah hian “mi 286 chu December, 2022 khan police atan lak thar an ni a, chungho chuan PTS Thenzawl-ah training an nei mek a ni” tih a ni a. Police hna ruak a tam em em tih kan hria a, mi 286 aia tam te pawh hi lak ni se ka ti, an indaihlohna hi kei pawhin ka hriatpuiin ka hria. Law & Order keng kawhtute an ni a, an tlem hi a dik lo a ni. Chutih rual chuan heng, mi 286 te hi ‘eng anga lak nge an nih’ tih erawh chu hriat a chakawm hlein ka hria a. Mi 286 lakte hian ‘political qualification neia lak an ni em’ tih te, ‘physical qualification an nei em’ tih te kha ngaihtuahnaah a lo awm a ni.

Tichuan Pu Speaker, ka han sawi leh duha chu, ‘SEDP’ tih hi MNF party *flagship programme* a ni a, MNF party pawhin an chhuang a, a chhuanawm bawk a, a duangtute pawh mithiam leh experience nei thlan khawm anni a, member 16 anni. Vawi 22 an thukhawm a, core committee te, PAC te, GS te leh National Executive in an pass hnuah tlangzarh a ni a. SEDP ah chuan, “chhungtinin eizawna ngelnghet an neih theih nan cheng nuai 3 pek a ni ang,” tih hi mipui hnena an hrilh dan leh min zirtir dan a ni. Training te an pe a, ‘SEDP Training’ an ti a, chuta kal, thusawi ngaithlate chu certificate te pein SEDP training kal tawh angin an inziak a ni. Amaherawhchu, a nihna takah chuan SEDP hi *inbumna, mipuite bumna leh tihderna* a ni. Engnge a nihna chhan kan tih chuan, an insawi ang leh an ziah ang hian an ti lo a ni. Cheng nuai 3 pe tura an intiam laiin cheng 25,000/- a ni. Ngun takin MNF te hian ngaihtuah se, mipui pawhin i ngaihtuah ang u. Nuai 3 chuan pa fel pangngai chu a intodelh thei mai thei, amaherawhchu cheng 25,000/- in a intodelh theih ang em? Nuai 3 chu min pe ta se thingtlang pa pangngai chu eng emaw chen a intodelh thei ang, eizawna ngelnghet pawh a nei thei mai thei a ni. Amaherawhchu cheng 25,000/- kha chuan a intodelh theih loh reng reng a ni. Chuvangin he thil hi chu *mipui bumna* a ni.

Chuvangin mipuite hi kan harh a hun a. Heti laiah covid kan chhuanlam a, chhuanlam-awm pawh a ni. Amaherawhchu natna hri leng rau rauah, *MNF bansanna hrileng* chhim lama mite saw an sawi thleng leh duh law law mang si lova. Chuvangin, sawti lamah sawn hri a leng a, MNF bansanna hri a leng a. Chungte chu ka han tar lan sak a nih chu, an sawi duh lo em a. Ka lawm e. Pu Speaker.

SPEAKER : Minute hnih khatin a pel a, wawi khat pelh vena a ni e. Awle, Member zahawm tak Pu C. Ngunlianbunga ka sawm e.

PU C. NGUNLIANCHUNGA: Pu Speaker, kan Governor speech-a ka luh hmian lawmthu han sawi ka duh a.

Vawiinah hian he House kal tlangin, in hriat angin Lawngtlai District-ah hian keini Lai fate'n MLA bial hnih, Lawngtlai East leh West kan nei a. He Sorkar a lo pian khan office holder kan han nih ve te pawh kan mipuite'n an beisei em em a. Amaherawhchu kan chang ve ta lova. Hun a lo kal zel a, eng emaw thil avangin kan Minister te ban/chawlh a lo tul a. Tichuan, vawiinah Dy. Speaker hmun, he sorkarah office Lai fate'n kan nei ve hi Lai ram leh Lai hnam aiawh pawhin he sorkar chungah pawh hian lawmthu ka sawi a ni. Tichuan, a kal zelna turah pawh tluang takin kan ram leh kan hnam tan mi tangkai tak anih pawh ka duhsak hle a ni. Chu chu ka lawmthu sawina ni sela.

Pu Speaker, ka han sawi duh hmasak bera chu, *pathumna*-ah khan “Mizoram Super-Speciality Cancer Hospital & Research Centre” tih hi sorkar hmasa ina hma a lo lak, vawiin niah a hlawhtlinna agreement (MoU) te sign a lo ni a. Mizoram-ah Super-Speciality Cancer Hospital & Research Centre kan nei tur hi a lawmawm ka ti a; kei pawh hi i hriat angin cancer patient ka ni a. Super-Speciality Cancer Hospital & Research Centre kan neih chuan rethei zawk leh harsa zawk cancer tuarten phai pan ngai lova helaia keimahni khawtuala kan han inenkawl theihna tura sorkar hmasaa hma lo lak tawh, tun sorkarin a han umzui a, hna thawh tan thei tur ani hi lawmawm ka ti a.

Chutih rual chuan Health Department-ah hian, kha Dampa Bialtu MLA zahawm tak khan, ‘thlei bik nei lo sorkar’ a han ti a, mahse *thlei bik* chu a nei a ni. Health Department hian bial thenkhatah chuan clinic centre hi khaw tinah a nei a, keini bialah khian khaw 71-ah kan nei a. Pu Speaker, i hunlai khan clinic centre eng emaw zat min saksak a, vawiinah hian thawktu dah a ni lova. Healthcare chungchangah hian kan dinhmun te, kan bial kan lo retheiin kan harsa a, kan awmna a kilkhawr a, lirtheia kal zung zung tur pawhin fur khuaah phei chuan a lo harsa em em a. Chuti chung chuan kan mamawh em em laiin ruling bial lo kha chu hmuh anni tlat hi kan sorkar hi a fel lo a ni. “Engtinngge Mizoram hian hriselnaah hma kan sawn tlan ang a, kan dam tlan ang” tih lam ngaihtuah lova, ruling bial ringawt maia kal ang hi chu a fel lo ka ti a. Helai hi Governor hian a rawn sawi a, a lawmawm viau laiin leh Cancer Hospital chungchangah lawmthu ka sawi rualin, a ram puma kan inenkawl naah hian he kalphung hi chu ... Kum tawpawh kan inthlang dawn a, keini pawh rawn sorkar tur chuan kan inbeisei viau a, hetiang hi chuan kan ti dawn miah lova. Tu pawh lo sorkar se, Zoram hi i thlir ang u. Mizoram Legislative Assembly: Golden Jubilee kan thupui pawh “*Dikna, Inpumkhatna, Hmasawanna*” a ni a, chuti lain vawiinah ruling chauhin hma a sawn hi a dik lo a ni.

Pu Speaker, a *pahnihna*-a ka sawi leh duh chu, Education Department-ah hian. Dampa bialtu kha a vannei bawh a, Dy. Chief Whip a ni a, a lal deuh bawh a ni ang, a bialah te khan an sa pawp pawp mai a. Keini bialah khian Higher Secondary te hi a awm

ve reng reng lo, Bungtlang South-ah khuan MLA ka nih tan tirh khan, “private-in din ula, MLA ka nih chhung chuan thla tin nuai 2 ka pe ang che u” ka ti a, nuai 2 ka pe thin a, tunah pheichuan a kal thei tawh lo. Kan Education Minister zahawm tak hnenah hian ‘*Samagra* atangin min tih sak ve teh u’ ka ti a, mahse opposition tawng hi chu lehlamah a tlang niin ka hria a, thenkhat bialah building thar an sak pawp pawp laiin. Chuta kan ngaihtuah tel ngai chu, Mizoram hi hmasawn tura kan duh anih chuan, kan kai rual tir a ngai. Health-ah emaw, education-ah a ni emaw hmasawna kan kalpui a ngai. Kan Governor zahawm tak thusawi, education-ah pawh hma kan sawn viau laiin keini bialah chuan hmasawna a awm lo a ni. Tin, District Council hnuaiyah Elementary a awm a, Mizoram sorkar hnuaiyah tunah *dual function*-in a awm a, Middle School-ah chuan District Council staff leh State Govt. staff an kal kawp a, control tu tur pawh an awm lo a ni. DEO ah a thenin hlawh an la a, thenkhatin District Council-ah. Hengte pawh hi vawi tam tak kan sawi tawh a, sorkar hmasaah pawh khan kan buaipui tawh. Sawlai pawh saw enchiana, Mizoram hian hma kan sawn tlana, kan kal tlan loh chuan hmelta tak, kawr bal tak ha, pheikhawk chhe tak bun he Zoram hi a ni ang tih a hlauhawmin ka hria a. Chuvang chuan, hemi kawngah pawh hian tan kan lak tlana, kan inhriat tlan a pawimawh ka ti khawp mai.

Tin, Pu Speaker, JJM chungchang hi a rawn sawi a. JJM hi he sorkarin a tih a ni lova, central scheme a ni a, amaherawhchu Mizoram sorkar hian a tichhia a ni (tawng mawilo a ni em, ka hre lo). He House-ah ngei pawh hian kei pawhin ka sawi tawh a, JJM tui connection an peknaah hian GI pipe hmang lovin plastic pipe an hmang a, chu plastic pipe chu reiloteah thingin a delh emaw, motorin a nek deuh emawin a lo tliak mai a, vawikhat an fit tawh chuan department in an ngaihsak zui tawh lo. JJM scheme, central atanga pawisa lo kal hi theih ang tawkin keipawhin ka umzui ve a, a thawktute pawh ka zawt a. He scheme-ah hian an estimate aia pawisa kan hmuh tlem avangin khawi lai lai emaw hi tihhniam, tihntem a ngai a, chuvang chuan ‘a pipe-ah hian kan tuar tir mai a ni’ tih lam hawi deuh te pawhin an sawi a. A pawimawh ber a pipe in a tuar kha a paw ber a ni. Chuvang chuan, kan PHE Minister zahawm tak, kan Dy. Chief Minister hnenah pawh zawhna Session hmasaah pawh ka zawh nghe nghe tawh kha. Vawinah hian thingtlang khua JJM cover area, in tina tui connection pek khaw 224 laiah hian, khaw tam tak chu an mangang a ni. Chuvangin, hei hi kan pawisa neihin a lo daihlo deuh anih pawhin a reservoir lamte pawh ti te deuh mai ila, tui kha a awm tlem deuh a lo nih pawhin a zia tak a awm tur a ni a. Reservoir lian pui kan siam a, a tui pek chhuahna a chhiat leh si kha chuan a tangkaina a awm lo. Chuvangin, he JJM scheme tha em em mai hi kan sorkar hian tuna a kalpui dan ang hi chuan a ti hlawhtling dawn lo. A beneficiary te, India sorkarin “in tin tui in tur pek tur a ni” tih ruahmanna a siam kha, helaiah reservoir kha awm mahse, a pipe line a chhiat si chuan an inah a lut dawn lo.

Tin, chutih rual chuan, kawng lehlamah lawmawmna chin lai pawh a awm a, a lawmawm kimlohna kha chu kha kha ni se. Kan bial thingtlangah te pawh gravity

hmangin tui lak hleihtheih loh mahse water pumping anga han pump chhoh te a han awm chho ve dawn a, a lawmawm khawp mai. Chutih rual chuan kan mipuite'n he JJM scheme hi a taka tihhlawhtlin a alo nih theihna tur atan kan sorkar hi insang mar leh hram hram se la.

Tin, kan hotute pawhin an sawi teuh tawh mai a, ramri chungchang te pawh han sawi ve a chakawm viau a. Ramri te pawh a nihna takah chuan kan sorkar hi min hnehsawh deuh nge ni (kan tawng takin), Assam hian min rawn ti lutuk a, inven a ngai a, ramriah kawng laih a ngai a, camp sak a ngai ta te hi, hei leh chen kum 50, Golden Jubilee kan hman tawhnaah hian kan la tawng lova, tun sorkarah hian kan tawng ta hi a vanduaithlak hle a ni.

Pu Speaker, ka sawi leh duh chu, point 2-na, SEDP chungchang hi a ni a. Kan han sawi a, 'sorkar hmasa pawhin an sorkar tirhah an pe lo' an han ti a, a dik a ni. Amaherawhchu tun sorkar lo piang tur hian mipui hnena an inzawrhnaah chuan, "kan lo sorkar thei anih chuan bawngpa insi tur ang phatin inpeih sa kan ni; kan che nghal dawn" tih anih kha. Tichuan, 2018 Election-ah an rawn sorkar a, 2019 budget an han pharh ta a, chutah chuan crore 700 dah a ni nghal a ni, SEDP atan. Khatah khan mipuia kan inzawrhna leh mipui kan va thlemna (kan offer) kha kan duh anih chuan khatah khan bul kan tan thei a ni. Nichinah khan Aizawl South-III bialtu zahawmtak khan a rawn sawi chhuak a, "2019 atangin kan tan tawh a, pilot project-ah chhungkaw 1000 kan thlang" a ti; a dik ang. Mahse, khata pilot project inthlante kha vawiin thleng hian pawisa a full-a la dawng lo vek anni; an sawi tam khawp mai kan hnenah pawh hian. "Pilot project-ah min thlang a, mahse pawisa hi nuai 2 bak kan la hmu lo" tih te, thenkhat chuan "nuai hnih singthum kan hmu tawh, a bak kan la hmu lo, engtik nge min pek leh dawn" tite pawh an awm a ni. Khatih lai khan Covid a la awm lo, Covid awm chu 2020, March thla tawp lam atang chauhin a ni a, 2019 budget kha chu a full-in hman zawh theih a ni. Chuvang chuan, Pu Speaker, "Congress-in kan sem lai khan installment-in an sem a, keini Pathian leh mipui zara kan sorkar chuan installment-in kan sem dawn lo" an ti a; engpawh nise kan thusawi ang hian Zoram hi i kaihruai ang u; 'mipui i bum tawh lo ang u' tih lai kha, he Governor Speech ka sawi rual hian ka han sawi a ni e. Ka lawm e.

SPEAKER : Kan National e-Vidhan Application hian a lo record ve a, a dik miah lova; ka record hi a dik a ni, kan hriat tur chu. Hei hi anmahni pawhin hre rawh se, khi sana khi ka en a, ngun deuha ka ziak hi a dik a, anni tih hi a dik miah lo. Kha kha lo hre rawh u; khi khi ring suh u.

Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e.

Hei, sorkar tla mai tur budget session hnunung berah kan Governor sorkar hmalakna an sawi tir hi, a tawpna tur a ni bawk a, an duh chipchiar angreng khawp a. Phek 17 an rawn ziak a, chung a an rawn sawi chu, ‘Assam-Mizoram border-ah security camp atan cheng nuai 96.5’ tih te, ‘police hospital building sak nan cheng nuai 70’ tih te a ni a. Thil ropui tak sawrkar rianguangin Governor speech-a han telh atan chuan *a va te deuh em* ka ti a ni. An tang bawk a, an chhawpchuak te hle mai kan ti a. Nichina member ten an sawi ang khan, Governor-in a sawi let deuhthawa thua sawifiah chawp a ngaih atang khan, kan Governor thusawiah hian han lawmna tur vak hi a awm lovin ka hria.

Tin, Pu Speaker, a mak ka tih leh em em mai chu, sorkar a lo pian hma leh sorkar a lo din hnua sorkarin a tuipui ber, sorkar flagship programme anga Zoram mipuite pawhina kan ngaih, *mau* chungchang hi a rawn sawi duh miah lo hian, kan sorkar hian he policy, Chief Minister-in a tuipui em em mai, amah ngeiin ‘tissue culture’ tia a chingtute pawh a zu hrilh kha, ‘an hlawhchham a ni’ tih hi a chiangin ka hria a.

Kar hmasa mai khan Congress party thalaite’n mau an chinna hmunpui an zu tlawh a, mau tiak hmuh tur a awm mang lova, a tam zawk chuan kuhva hmunah an lo let vek tawh a ni. Chutiang anih lai chuan, mau chi supply-na atan cheng vaibelchhe 6,48, 16,750 senral a ni tawh a ni. He *mau* chi tui taka an sawi hi, intodelhna tur lam aiin sum siamna tur lam ... (**Speaker:** *Vaibelchhia* ni lovin *Nuai* zaruk leh tih zawk a ni a, kha kha nakinah House-in a correct loh chuan...) Chutiang chu anih lain, sum siamna tur atan ringawta an ruahman a ni tih hi a chiang em em a ni.

Tin, tukinah kan Commerce & Industries Minister-in *mau* chungchang a rawn sawia foreign mau ‘*brandisii*’ leh ‘*latiflorus*’ lam aiin kan ram mau that zia a rawn sawi leh ta daih khan kan Chief Minister-in a tuipui hi a lo tha lo hle a ni tih kha a tichiangan ka hria.

Tin, sawi-awm ngawih ngawiha ka ngaih kan Dy. Chief Minister subject, *Aizawl Smart City*, Congress sawrkar hmasain competition tam tak kaltlang a kan zuk tlin vena, vaibelchhe tam tak central-in min rawn sanction te sawilan a ni miah lo hian, ‘kan sorkar hian he Aizawl khawpui cheibawlna tur atana sum dah, a tam zawk Sports Department-a a kal te hi an *zahpui em maw ni aw, a rawn sawilan ngam miah loh’ tih te ngaihtuahnaah a rawn awm a ni.

Pu Speaker, hei kan Governor (**Speaker:** Ngaw rawh aw; nichinah kan lo sawi zo chiah a; ‘zak’ tih kha kan awihlo a ni. Kha pawh kha kan nawtreh ang.)

*(*Expunged as order by the Chair.*)

Kan Governor in a sawi point khatnaah hian khulai ramri chungchanga hmasawna tam tak a rawn sawi a. Hemi a sawi laia pawimawh ka tih em em a rawn

sawiloh chu - Aitlanga huan neitute'n an huan tlawh thei loa an awm te, tun hnaiah Assam police-in kal an phal lova, Vairengte SDO-ina ID a siamsak an han ngai te hi a tlawmthlak a ni, Pu Speaker. Kan ram chhungah kha leh chen hun kal tawhah ID card kenga kan Mizo fate an huana an kal a ngai hi a *zahthlak tak tak a. (**Speaker:** Kha pawh kha nawhreh tur.) Pu Speaker, min lo hrethiam dawn nia; a serious em a, kan tawngsual palh a. *(Expunged as order by the Chair) Assam Chief Minister-in acre 1800 zet "Mizoram atangin kan la let" a tih hi a rawn nemnghet hlein ka hria a ni. Chuvang chuan, he kan ramchhung ngeia ID ngai lova Mizo fate'n an huan thlai an enkawl theihna tur atana hma la turin sawrkar hi ka ngen tel bawk a ni.

Tin, point 32-na - Lengpui Airport cheithatna atana cheng nuai 1,958/- lai dah a ni hi a lawmawm a. Chutih laiin hetiang pawisa tam sorkar mualphona atana a lo thleng hi a pawi ka ti a. Tender an inpek dan te, hna an thawh dan te, an hnathawh lai a chim te hi a pawi ka ti tak zet a. Tunah phei chuan a contractor-te khu *an inluling a ni* tih chu vawiin nia zin vei vak thinte hian nitin an hmu a ni. Mipui awlsam zawkna tur atana sorkar hmasaa trolley tam tak an lo dah te pawh cement bag leh cement phurh nan an hmang chhe zo a. Vawiin niah hian Congress party chuan a replace (thlak) turin nasa takin an ngen nghe nghe anih kha. Hetiang khawpa pawisa tam si, *induhsakna uchuak* avanga sorkar a mualpho leh, Airport tha tak, India rama cute ber nei thei mai tur mualpho taka a awm hi pawi ka ti hle a ni.

Tin, point No. 2-na - SEDP hi kan rawn sawi ve ang a, Pu Speaker. SEDP hi vawiina sorkar lo awm theihna chhan; Zoram mipuiin chhungkaw tinin cheng nuai 3 an dawn beisei vanga vote tling an ni a, chu chu an tlinna chhan a ni. Amaherawhchu, vawiin niah 1st installment-ah mi tlem te hnenah cheng 25,000/- pek a ni a, 2nd installment pawh an pe dawn tih thawm kan hre bawk a. He SEDP hi an sorkar a tlak lehna tur 'hmahruaitu' a ni dawn tih hi a chiang em em mai a ni. Kan bialah chuan SEDP an han sem a, an account-ah ₹25,000/- chu a lut meuh mai. Amaherawhchu, kha pawisa hmanna tur kha training pek anni lova, engtia hma lak tur nge, engti zawngin nge kha pawisa kha hmang se tih sorkar atangin hriattirna a awm lo reng reng. Kan Chief Minister berin he House-ah ngei "SEDP kan sem hunah chuan *scheme base*-in kan sem dawn a ni" a ti a ni. Amaherawhchu, vawiin niah chuan public money, Zoram mipui tena biscuit emaw leh thil kan lei reng renga chhiah tlingkhawm *public money* hi *an thei-sem* mai mai a ni. Hlawhtlinna tura pek ni lovin, party induhsakna tura sum sem mai maiah a rawn chhuak ta a. Hei, nichinah pawh kan sawi tawh a; sangha dil siamna tur atana ₹25,000/- an han pe te hi chu sangha dil siamtute inhmuhsitnaah a ngaih theih a ni. Vawiin niah SEDP an han sem a, ka bial Laisawral-ah chuan, 'SEDP in dawng dawn' a an han ti a, phur takin an kal a, vaimim bag 3 an hawn nawlh mai a, vaimim chi an dawn hun kha a chin hun pawh a ni tawh lova. Hmanni-ah, 'hei session te kan nei dawn a, vaimim kha an thar tha em' ka ti a, min chhanna chu, "ka pu, chin a hun tawh bawk si lova, ar chaw-ah te a then chuan an hmang a, vawk chaw-ah te kan hmang mai

mai” an ti a ni. Khatiang mai mai kha kan sorkar-ina mipui pawisa a tihchingpen dan a ni a, hengte hi sorkar tla turin a hrinchhuah niin a lang a ni.

Tin, point 4-na - Excise & Narcotics-ah khan zu avanga mi 4,348 a man an nih thu te a rawn ziaq a. Pu Speaker, vawiin nia hetiang drugs tawlh ru te, drugs te, zu zuar te man hi *intihtheihna, inchhuanna* tur niin ka hre lova. Kan sorkarin *Mizoram Liquor Prohibition Act, 2019* a hmang a, a hman hnu hian Congress sorkar-in *legally*-a zu a zawrh lai ai khan Mizoram-ah hian zu hi a zalen zawk daih; veng tinah engtik lai pawhin lei tur a awm a ni. Restaurant zawng zawngah hian hmuh tur a awm emaw tih mai tur khawpin vawiin niah hian zu hi a zalen zawk a ni. Chutih lain sorkarin chhiah tam tak kan hloh lawi si a, Assam khu kan ti Hausa a ni ringawt mai a ni. Chutiang anih lai chuan thlalak te kan lo hmu a, Police bus khat tlatin zu a awm a, a thlalak nen a lang a. Chungte chu a mantu han chhuichhuaha han man hi a awm lo reng reng a ni. Chuvang chuan, *Mizoram Liquor Prohibition Act, 2019* hi chu ‘a lem mai, a hming maia hman a ni’ tih hi a Chiang em em a ni.

Tin, a point 3-na - Health & Family Welfare hi Covid avanga han fak vak turah ka ngai lova, pawisa hman dikloh avanga emergency taka audit ngai kha anni a. USA siam RTPCR Lunglei-a thleng mai tur hi hei kum tam a vei tawh a, Lunglei chuan kan la hmu lo phawt mai chu a ni a, vawiin ni thlengin. Khatiang khan a thu mai maiin kan ram hi min kaihuai a ni.

Tin, point 56-na hi tawi te rawn sawi ve leh ka duh a. Pu Speaker, LPG chungchang hi, LPG hi tupawh sorkar sela insawisel emaw, infak emawna turah hian ka ngai lo a ni. Congress sorkar a ni emaw, MNF a ni emaw LPG hi chu company thil a ni a, company leh an distributor te inkar a ni. Sorkar hian a that leh a chiatah hian mawhphurna tak tak a nei lo, company lamah gas harsat chang te, an bottling plant-ah harsatna an neih chang chuan Mizoram-ah pawh harsatna a awm a ni. Anmahni leh an distributor leh mipui inkar kha a ni a, hengah hi chuan sorkar indem vak te, sawrkar infak vakna tur hi a awm lo in ka hria.

Tin, point 8-na, helai piggery scheme-a sum tam tak an hman thu te a rawn sawi a. Helaiah hian Pu Speaker, sawi ve ka duh chu, vawk hri a len khan ka bial Lungsen atanga intan a ni a, hei kan Minister zahawm tak thin Dr. K. Beichhua pawhin a hmunah min rawn ensak a, kan lawm ve em em a ni. Amaherawhchu central leh state sorkar intum sem tanpuina a lo thlen khan an ni ho kha tanpuina pek an ni ve tlat ta lova. Khutah vawk hri a leng a, officer te an zuk kal a, talh an tumin sorkarin talh a phal bawk si lo, an mangang em em a ni. A hnu ah an han thi ve leh a, khang thi te kha report an ni lova, tunah Lungsen-a chhungkaw tam tak vawk avanga harsatna tawkte khu sorkar hian tanpuina pakhat mah a la pe lo a ni. Chutih laiin Pu Speaker mak em em chu, kha tanpuina rawn kal kha Lungpuizawl Vety farm, sorkar farm-ah chuan ₹4,82,800 lakhs (nuai li, sing riat leh sanghnih zariat) ngawt mai sorkar department-in tanpuina a dawng

a nih chu! “Keini chu sorkar kan ni e, thingtlang mi leh vawk vulh tute, vawk thi te chu chhinchiah ve vek tho anni; official-a an chhinchiah loh pawhin kan hria, heng atan hian i pe zawk teh ang u” tihna chang hre lovin MNF sorkar-ah chuan, mipui te chan tur, mipui mi harsa zawkte an chan ai kha department-ah khati zat sum a han lut te kha hriatthiam a har kan ti a ni. Congress sorkar laia vawk thi te, bawng thi te, hripui a len khan Congress sawrkar kha chuan a thia te kha *tanpuina* a pe vek a ni.

Point 10-na ah hian amendment siam a ngai em aw ka ti a, Pu Speaker - “Mizoram PWD has completed 351 kilometers of formation cutting, 280.5 kilometers of flexible pavement and 202.5 kilometers of rigid pavement during ‘22-’23” a in ti a ni. Hei hi kan sorkar chhunga an ti anih chuan a awm ka ti a, mahse, one financial year (2022-23) chhunga formation cutting 351 kilometers tih hi chu thil theih a ni lovin ka hria a; kilometer 280 chuang flexible pavement tih te, kilometer 212 rigid pavement tih te financial year khata siam anga inziak, he House record-a awm tur hi chu Pu Speaker, I kaihruainaa siamthat ni thei se ka duh khawp mai.

Pu Speaker, sawi tur tam tak a awm a, amaherawhchu keini party hi chuan i thu hi kan awih a, kan tilui vak ngai lo che a, hun i tihah ka han ti tawp ang e. Ka lawm e.

SPEAKER : Member zahawmtak Pu Lalduhoma ka sawm e. Anni kha minute 15 ve ve kan pe a ni.

PU LALDUHOMA : Pu Speaker, a hmasain vawiin niah Dy. Speaker thar kan nei a, mimal takin *lawmpuina* kan hlan a. Amaherawhchu he hmun ruak a lo awm theihna tura tuartu Mara mipuute erawh chu ka *tuarpuina* ka hlan bawk a ni.

Awle, kan Governor hian ngaihpaawimawh bera a neih No.1-a rawn sawi chu, *ramri chungchang* a ni a. Hetah hian ramri-ah buaina te chinfel angin a rawn sawi a, information diklo pek anih ka ring a. Joint statement kan sorkar leh Assam sorkarin an siam hnu khan ‘ramri-ah tumah intihbuai tawh loh ni se,’ tih a ni a, amaherawhchu nikum September thla khan Pu Ch.Chhunga leilet-ah Assam Police in camp rawn sak an tum a, ka hriat veleh kan Home Minister kan phone nghal a, ka hrilh nghal nghe nghe a ni. October-ah Vanlalhruaii Aitlang a feh tur an lo tir haw leh a, December-ah Zophai-ah thing an lo kit leh a, thla kal ta January-ah khan Aitlang-ah hmunphiah a neitute’n an lak an phal lo leh bawk a.

Kan ngaihthlak tak ang khan, kan ram chhung ngeiah ID siam sak an ngai a, *anta-chei* tawh a ni a. Tunah hian khu laia hmunphiah neitu thenkhat chuan vai hnenah an ram an hralh tih thawm te a awm a ni. *Rengkhawpui News* nichin maia ka hmuhah chuan, “kan Police te camp 3-a awm thin kha tunah chuan camp pakhatat chauh an awm tawh a, mi 30 pawh an tling mang lova, an chhuahsan tawh hmun velah khan Assam Police hian hmunphiah te an kek a, Mizote keh ve an phal lo” an ti a ni. Chutiang

te chu thil awm dan anih avangin ramri hrulah pawh buaina hi a la reh fel lova, min *cho hle a*, ‘thlatinin *provocation* eng emaw hi an rawn ti reng a ni’ tih hi thudik a ni a.

Tin, tunlaih hian kan political issue-ah “kan ram tan engnge pawimawh ber ang” ti ta ila, *kan ramri issue hi a ni* kan ti theiin ka ring a. Chumi chungchang a *issue tak tak* kan Governor-in pakhatmah a rawn sawi lang lo hi a paw ka ti hle a. Kan Minister pakhatin Republic veng Community Hall-a “ramria buaina awm thin chu Mizo mipuite duhdan ang ngeiin chin fel a ni ta e” a tih kha kan sorkar hian a pawm ta mai nge, sawi ngai a ti lo nge ni?

Kan hriat angin 2018 November Ni 18-ah All Party leh All NGOs-in Prime Minister hnenah memorandum kan theh lut a nih kha. An ngai pawimawh khawp mai, Ni 26 December, 2018 khan Home Ministry-in kan Chief Secretary hnenah “hetiang memorandum hi kan dawng a, sorkarin engnge in sawi ve dawn, report rawn theh lut vat rawh u” a rawn ti nghal a ni. Mahse, he kan sorkar hian report theh lut tur a nei lo. December, 2018, Ni 26-ah report pelut tura tih kha anni leh a, May, Ni 19-ah reminder dang an rawn thawn leh a, August, Ni 16-ah an rawn remind leh a, September, Ni 24-ah an rawn remind leh a ni. Home Ministry-in tuna kan sorkar hi “ramri chungchangah sawi tur in neih chuan sawi teh u” tiin vawi 4 lai reminder an rawn thawn a, an chhang theilo a ni. Chuti khawp chuan kan sorkar hian ‘kan ramri hi a ngai pawimawh lo’ a tih loh theihloh a, engvangin nge an chhan loh tih hi ngaihtuah a ngaiin ka hria.

Member zahawm tak Pu Vanlalhlana leh Pu Zaithanzama te *Unstarred Question* No. 82 – 2019 March Ni 20-a kan Home Minister-in a chhannaah chuan, “Mizoram sorkarin ramri pawm lai chiang fak a la nei thei lo,” tih a ni. He sorkar hian rei tak ‘kan ramri chin khawi lai hi nge’ tih pawm nei lovin a awm a. Anih leh independent kan soal lai te khan khawi chin atan hian nge kan soal? Kan ram chin pawh hre lovin em ni kan lo soal? Hei hi document-a awm a ni; kan House rorelna sang bera kan in chhan dan a ni. Chumi hnu-ah 2019 June Ni 26-ah ka *Unstarred Question* No. 123-na kan Home Minister-in min chhang leh a, chutah chuan, “Mizoram sorkarin ramria pawm tur chin hi zir chian mek a ni,” tih a la ni chauh a ni. He sorkar hi kan ramri chin hre lovin rei tak a awm a, Home Ministry-ah chhanna a pe thei lo a ni.

Cabinet meeting-ina 1875 ami, party dang zawng zawngin ‘hemi chen hi kan ram a ni’ kan tih an rawn pawm vena hi chu 2019 July Ni 8-ah chauh khan a ni. Heta tang chauh hian tuna kan sorkar hian ‘kan ramri chin chu hei hi a ni e’ an ti ve thei ta a ni. A mak hle a ni.

Hmanni lawkah khan Guwahati-ah November Ni 17-ah meeting a awm a, chutah chuan ‘1875 ami hi kan ramri chin a ni’ an zuk ti ve ta a, official-a Assam hnena an sawi vawi khatna a ni awm e. Assam chuan, ‘1875 ami hi kan ram chin in ti anih chuan thil pathum, pali vel rawn ti ta che u’ an ti ta a, chungte chu -

- 1) Kan ram chin in tihah hian khua engzat nge awm;

- 2) *Geospatial extention*, a area zau zawng engnge ni;
- 3) *Ethnicity*, eng hnam te nge an nih, tute thlahte nge an nih;
- 4) Information tul dang apiang.

“Hei hi hetu chin hi kan ram a ni’ in ti dawn anih chuan in rawn sawi chiang ang a, in rawn verify ang a, Assam sorkarin *full cooperation* kan lo pe ang che u, kan lo tihpui vek ang che u. Chumi hnuah chuan regional committee kan din ang a, kan sawi zui dawn nia” an ti a. Chumi tihna atan chuan thla 3 hun pek kan ni. Thla 3 hun chauh pek kan nih lai chuan, thla 2 ral hnuah chumi ngaihtuahna tur committee he sorkar hian a ko chauh a ni. Thla 2 chhung khan ramri chungchangah kan sorkarin engnge a tih? Tun February Ni 17-ah hian Pu Speaker, *thla-3* chu a ral dawn a, vawiinah hian kha report 4 pe tur khan ni 9 chiah hun kan nei tawh. Meeting hi January Ni 20-ah an ko chauh a ni; thla 2 ral hnuah.

Tichuan, tunah hian study team siam a ni ta a, chu chuan eng chen nge an tih tawh pawh kan hre lova. Engpawhnise, hun hi an dil belh thei turah ngai ila, he study team hi theihtawpa puih kan duh, keini chuan. Tha takin kan claim chin hi report pe se kan duh a. Chutah chuan suggestion han pek duh ka nei a.

News Bharati, August Ni 10, 2012 kha in en chuan, Fact-Finding Committee-in khulai area-a dan lo a lo lutte chungchang a report kan hmu ang a, hei hi Bodo-ho Bangladesh atanga a ruka lo pem lutte intihbuaina avanga din a ni a, member 15 an awm a, chu chu Jaleswar Brahma, General Secretary, *Jainti Dharam Sanskriti Suraksha Manch*-in a ho a ni. He mite hian report an rawn pe tha khawp mai; khung lai vela mi khu foreigners, Bangladesh atanga dan loa lo lut an nih deuh vek thu an ziaa a ni. Hengte hi kan tanchhan atan a tha em em dawn a. Camp 300 vel an tlawh a ni, Fact Finding Committee hian.

Tin, *India Bharti Jain*, Ni 17 November, 2016 kan en leh chuan, Union Minister of State Kiran Rijju chuan Rajya Sabha MP Jharna Das Baidya zawhna a chhang a. Chu a chhannaah chuan, “India ramah hian Bangladeshi dan lova lo lut 2 crore an awm a, India ram state 17 leh UT-ah an awm a, Assam-ah ringawt hian 50 lakhs an awm a ni” tih kha Union Home Minister chhanna a ni.

Kan study team ten khulai khu an zuk endik dawn; an ethnicity-te an report dawn. Heng mite hi ‘India khua leh tui dik an ni lo’ tih hi kan sawi ve tur anih avangin thahnemngai takin study team-te pawhin heng hi an lo neilo palh anih pawhin kan pe duh a ni, kan tanpui duh a ni.

Tin, *Barak Bulletin*, March Ni 22, 2018 kan en chuan, IAS officer pakhat Sameer Kumar Khare, Joint Secretary, Deptt. of Economics, Ministry of Finance-a mi a ni a, Prime Minister vision report petu tur a an tih a ni a, hei hian Hailakandi bialah research a rawn bei a, chutah chuan Prime Minister hnenah chuan engnge a thehluk kan tih

chuan, “Hailakandi-a mihring cheng 98% hi Bangladesh atanga dan lova lo lut an ni” a ti hmiah mai a ni. “Chung zingah chuan 60% chu Muslim an ni a, 38% Hindu-anni” a ti a. Heng report-te hi kan study group khan an tangkaipui ang tih ka ring khawp mai a, ka han sawi a ni.

Dr. Namrata Goswami, Associate Fellow at the Institute for Defence Studies and Analysis, New Delhi hian thil a ziaak leh a. ‘Bangladeshi illegal migration into Assam issues and concerns from the field’ tih a ni. Hetah hian a ziah leh chu, Assam Agitation (1979-1985) AASU-ho in an kalpui, Assam Accord 1985-a tihtawp tak chungchang zawng zawng kha tha takin a ziaak a. Hei hi Bangladesh-in *ngawi renga India a runna*, ‘Silent Invasion’ a ni a ti.

Heng zawng zawng ka sawichhuahna chhan chu, kan report petu tur te khan tanfungah kan hman thiam chuan, he area, *1985 chin* kan claim-naah hian tih tak zeta kan kal a thain ka ring a. Amaherawhchu a lan danah hi chuan kan sorkar hian an term chhunga tih fel loh tumin an tikhawtlai lui emaw ni aw, tih mai tur a ni a. Thla thum chhunga tih fel tur pawh thla hnih hnuah an ngaihtuah chauh a ni. Hei hian mizo mipuite rilru a ti mangang a, *puh loh loh in kan inpuh ang* tih te pawh a hlauhawmin ka hria.

A dang leh chu Pu Speaker, Lengpui Airport chungchang hi kan Governor-in vawi hnih ngawt a speech-ah hian a sawi lang a. Tunah hian arrival leh departure inkar khu 15 - 35 minutes te a ni a. Tin, arrival rau rau ah pawh Alenia ATR leh Airbus te an rawn tum inkar hlat zawng hi 20 minutes te a ni a, passengers kan tawt nghal a. Passenger capacity hi kan thlawhnaah hian mi 70 te, mi 152 te, mi 186 te a ni a. Chung zawng zawng enkawl tur chuan conveyor belt pahnih kan nei a ni. Chu conveyor belt pahnih chawm tur chuan tunah khuan luggage trolley serviceable 22 chiah a awm; ka zuk endik tir vek tawh. Chu 22 pawh chu Kamrula’n a hman khawloh avanga cement kai nial-nual, khem neng-nung vek a ni. A chhe ho chu pindan pakhatah an dahkhawm ruih a ni.

Chuvang chuan, he contractor hian mizo mipuite hi min zah lo lutuk a ni. Tin, a tawp em em a, hmannah Savation Army General-a lo kal dawn avangin Salvation Army ho an zuk hnatlang tawp a. G-20 Summit thlalehah kan thleng dawn bawk a, zun in te pawh a la mumal lo a ni a, chutianga tawp lutuk chuan kan airport khu tunah a awm a. Tin, tar leh naupang tan luggage trolley-a awmlah avangin harsatna an tawk bawk a. Tin, parking area-a han innawr chho tur khuan a bum-boh lutuk a, trolley-a kal thei lo. Chutiang te chu kan airport dinhmun anih avangin, Patricia Mukhim, North East-a free-lance journalist lar tak chuan Union Civil Aviation Minister hnenah a *tweet* hial a ni. A pawh khawp mai. Hengte hi kan mualphona a ni. Tichuan, *Centre for Environment & Social Justice* hian kan Chief Secretary hnenah ziaakin complaint an theh lut tawh bawk a ni.

Tin, workmanship chhe lutuk hi - first floor-ah kan kal chuan, (Pu Speaker, zuk endik ni se tha ka ti) departure floor-ah khuan floor tiles size inang lo hli remkhawm a ni a, a mawi lo lutuk; mimal ina kan sitting room ni se kan duh miah lo ang. (Ka han zo lawk ang e, Pu Speaker.) Inzawn lo pui-puiin, size inang lo na na na chu an remkhawm a ni. Tin, AC vent chunglam ceiling a mite pawh khu engmah kawngmang awm lovin, inkawkalh neih-nuaihin an dah a, a mawi lo lutuk a ni. Heng zawng zawng hi vawikhatmah hetiang building la sa ngai lo, experience nei lo kan sorkar hian a sak tir a, a chim a, a chim leh tur pawh ‘a chim leh dawn’ tih avangin an pawt chim chawp a ni. A hmunah ka zuk kal a ka zu k en vek a.

Hetieng hian sum siam nan min hmang a, mizo mipui hi min zah lo a ni. Chuvang chuan kan rilru a na a, hengte hi tha taka enfiaha, action lak a ngai a ni. A chim avang khan kan lawm zawk nge, Class-I ah te kan promote ta deuh-deuh kha a ni a. Hetiang hi kan rorelna anih chuan ‘kan kal fuhlo nasa ngawt ang’ tih hi a chiangin ka hria a. Chung chu ka han sawi ve duh a ni e. Ka lawm e.

SPEAKER : Aw le, kan House Leader-in sawi duhte a nei em? A neih chuan lo sawm ila.

PU ZORAMTHANGA, CHIEF MINISTER: Pu Speaker, ka lawm e.

Sei lutuk loa sawi ka tum ang a. Keipawh kan Governor speech hi a lehlama han en chuan duhaiin a tawi a ni tihna lai turte a awm a, a thenah chuan, ‘a sei hle mai, pheh 17 lai a ni’ tih te, ‘38 tha zet a ni e, a hlawm lianah pawh,’ han tih turte pawh a awm a. ‘Heng hi a sawi a; heng hi a dik ang em; a nih loh leh hei hi a va sawi si lo ve’ tihte pawh a awm a. A dik a, sawi kim sen pawh a ni lova. Khati chung khan a han chhiar zawh meuh chuan, hun pawh a lo rei khawp mai a. A tlangpuiin darkar chanve, minute 45 vel hi Governor Speech kan tihdan a ni a, khami target khan department te pawhin an ti a. A thenin ‘an titawi lutuk a,’ tih te, a thenin “an tisei mah mah a ni” tih te pawh a awm a. Chuvangin, Member zahawm tak ten, “a sawi hi a va kim lo ve, hei hi engatinge sawi awm tak a ni si a” in tih te pawh kha, a dik a. Amaherawh chu, a inkarah khan sawi tur chin leh chinloh, kan tihtawi leh kan tihsei deuha kha kan duhthusam kim lohna a awm a, kha kha thahnemngaihna vek a ni a, a lawmawm a.

Member zahawm tak ten, “hei hi engatinge sorkarin tih a tum a, a tih leh tak siloh” tih te in sawi a, a dik e. Amaherawh chu chung zingah chuan heng kan harstana neih zawng zawng, hripui leng leh thil dangte kha kan hria a. Tichuan, khang zinga kan han sawi SEDP kha; ni e, inthlan hmaa kan target chu cheng nuai 3 emaw, a ai tam emaw kha a ni a, tih pawh kan tum. A kum hmasa ber 2019 ah khan Covid a la thleng lova, kan sum dinhmun a la ziaawm avangin a dah pawh kan dah tam a. Amaherawh chu Covid in min han man ta a, kan sum dinhmun harsat dan chu sawi lova lum a ni a. Kha vang khan development a ni emaw, thil dang emaw pawh kha a ding ta thup mai a, engmah kan ti hleithei lova. A tira departmental-a eng emaw chen hma kan han lak, a

then chu cheng nuai chuanga hma lo lak hman, a then chu tlem deuh te pawh; khang kha a tawp thawkhat lo thei lova, kan control theihna piah lam a ni a.

Tichuan, tunah Covid a han tlahniam (die-down) ta deuh a. ‘khawng, tan i han la teh ang’ kan han ti a, kan sum dinhmun en erawh chuan a tihngaihna a awm lova, mahse ‘eng emaw zat kan tih theih takin’ tiin kan han tan a. Tichuan, chhungkaw singruk vel han target ila, chu mite hnenah chuan kumin, a vawikhatnaah chuan Rs. 50,000/- theuh i han target teh ang’ kan ti a. Tichuan, installment khatnaah Rs.25,000/- kan pe a, installment hnihna tunah sanction tawh a ni a, chu chu kan la sem hman lo deuh hlek a, kan cash adjustment avangin. Chu chu sem tura dah a ni a, chhungkaw singruk hnenah Rs. 50,000/- theuh, tunah tan chhoh kan tum chauh a ni a. chuvangin, ‘engahng, cheng nuai 3 in pek loh, in term a tawp dawn a ni tawh si a,’ an han tiha kha a dik chiah a. Amaherawh chu kan hriat tlan vek angin, ka rilru takah phei chuan hei pawh hi kan sem thei lo turah ka ngai a, mahsela, eng emaw tih tihin thei tawpin tan kan han la a, chhungkaw singruk hnenah Rs. 50,000/- theuhin a bul kan tan thei a, lawmawm ka ti a. Duhtu phei zawng a sam lo teh meuh mai.

Tichuan, financial year thar a lo thlen chuan, hetah pawh hian kan pek tawh sa chhungkaw singruk hi a chhunzawm nan eng emaw zat pek chhunzawm kan tum a. Tin, hemi chhungkaw singruk bakah hian chhungkua eng emaw zat, (a zat chu kan sum dinhmun azirin kan en ang a) chhungkaw sing tel chu a thara pek belh leh kan la tum bawk a ni. Eng pawh ni sela, Pathian-in rem atih chuan, Pathian leh mipuite zarah sorkarna te kan siam leh thei turah pawh kan inngai ve a. Chutiang te a lo thlen chuan tha zawkin kan chhunzawm theih zel pawh kan beisei a ni.

Tin, kan kalkawngte pawh theihtawpin tan kan han la a, amaherawh chu kan duhtu a sam lo em em a, hautak pui pui a tam a. A tha pui pui tur chuan tithei lo mah ila, tun thal lo kal chhovah pawh fur tuar theihna dawr-dawr tur chuan hma lak chhoh kan tum a. Khawchhung kawng a ni emaw, khaw inkar kawng a ni emaw tha puiin, a tharlam chuan siamna hman kan nei tawh lova. Chuti chung chuan *patching* emaw, *resurfacing* a ni emaw a siam theih dan-danin, tun thalah pawh a repair te leh a siamthatna chu tih hram-hram kan tum a, hma kan sawn pawh kan ring bawk a ni.

Tin, chu lovah chuan, hei, Governor ina a sawi ang khan, hetiang harsatna namenlo karah pawh hian kan buhfai te, oil te, gas te mipuite harsa lutuk lovin kan kal tluan chhuahpui thei a. State sorkar ina theihtawp kan chhuah chu thu khat ni sela, sorkar laipui pawhin nasa takin tan an rawn la a, chung kal kawpawh chuan hma kan sawnah pawh kan inngai a. Gas te pawh, ni e, kan Opposition group leader Pu Zodintluanga sawi ang khan, a company te leh agency te inkar anihna pawh thui tak a awm a. Amaherawh chu, hemi karah hian sorkar atanga a company zu nawr nat te, agency ten harsatna an neihte zuk enpui hi a ngai khawp a. Chuti lo chuan khulam atangin a company te pawh an lo inthlahdul ve a. Kha kha kan theih tawpin kan nawr a, beihpuiin kan bei ve bawk a, a rah pawh a lo chhuak a.

Sorkar hian engkimah hian, central atanga thil lokal pawh hi nawr a ngai hle a ni tih a hriatna chu, tunhmaa gas kan harsat zia kan hria a, tunah chuan kan duh ang-anga kan lak theih kan hmu ta emaw tih turin supply a tha a. Chu chauh ni lovin, anmahni inah ngei pek (home-delivery) kan han sawiri thei te hi a mak ta em mai a. Chuvangin, heng hi ‘a lawmawm a ni’ tih kha Governor thusawi chhonzawmin ka sawi belh a ni.

Tin, hei kan Governor thusawiah pawh a rawn tel a, harsatna tam tak karah RD Block pahnih chu kan han hawng ta tawp a, member zahawmtak ten in han sawi ang khan ‘han chhonzawm thuai-thuai teh u, duhaiin in chhonzawm har e’ in ti a, a dik chiah mai a. Kan theih ang tawkin tan kan han la ang a, a in ruakte kan han chei tha ang a, khata tang khan office han siamna turte kan han ti naw-naw a. Engpawh nise, a lo pian tawh chuan MNF chuan thil pakhat kan bat nia kan ngaih ve chu, vawikhat kan hawn tawh chuan kan theih ang tawkin tihchangtlun tumin kan bei ve tang tang thin a.

Tichuan, district pawh kan han hawng a, kum 10 zet mai a thing vang-vang a, kan rawn sorkar leh a, kan tlin lo kan tlin lovin kan han chhonzawm a. Tichuan, changtlung takin hma kan lo lak tawh hi tihpuitlin te pawh kan ching a ni tih kha Zoram mipuiin an hriat kha. Chuvangin, tunah pawh block thar kan hawn te hi kan theih ang tawkin tihzui leh hram hram pawh, district kan lo enkawla kan lo tihpuitlin ang khan kan han tum zel ang e tih kha ka sawi tel baw k a ni.

Amaherawhchu, eng emaw demand sawia zuk clear-na lam a ni lova, kha kha chu kan Governor thusawia ‘a lawmawm e, hei lawmna tur a tam e, chuvangin lawmthu i sawi ang u’ tia motion pawh rawn move a ni baw k a. Khang kha tawifel deuha han sawi ka tum chu a ni.

Tin, kan ramri chungchang thuah pawh duhthu a sam lo teh meuh mai a. Kan opposition group leader Pu Duha’n a sawi, khang information zawng zawngte pawh kan member-te, tin, a Home Ministry lam Home Deptt. lama a incharge te pawhin khangte kha hlawk nan an hman ngei pawh kan ring a. Tin, ramri chinfel hi chu kan hriat theuh angin a buaithlak khawp mai a, kan duh tak maichu, a awm a. Amaherawhchu, hmana kan duh nia kan hriatte pawh khatunah hian han sawifel chiah ila, kan ramri duh hmasa kha anih kan pe ang che u ti sela, a then khu chu vai, a nuai tel awm nena seng tel a nih dawn chuan, Ngaizawl VCP hnena an Major pa-in tuibur a dil a, “a spare kan nei si lova, a zutu pitar nen hian i lak a ngai ang,” a ti a, ‘E khai, chu ai chuan ka la lo mai ang’ ti ang deuh khan, a chhunga chengte nena han lak tel dawn tak tak chuan kan duh loh lai hi a tam khawp mai a, *a zutu tel lova a tuibur chauh* hi kan duh chang te pawh a awm ve thin a.

Engpawh ni se, kan party aiawh te pawh a ni ang a, sorkar lamin a committee member ten zei taka chhawp chhuah a ngai si a, *ready made formula*, vawikhata han lak mai hi a har em mai a. Chuvangin, Assam Chief Minister hmasa zawk nen kan sorkar

hmasaka kan inbiaka a tih ang deuh a ni a, “Mr. Zoramthang, ramri thu hi chu chingfel a va har tak em! Nang leh kei hian eng ang pawhin sawi ila kan chingfel nghal mai ang emaw chu” a tia a nui hawk hawk a; a ni lah tak a. Amaherawhchu zawi-zawiin, a theih ang chin-chin, a tahtawlin chingfel kan tum chho zel ang a, vawikhatah khan a chingfel thut theih bik lova.

Tin, hei Assam atang piang kan ni a, Arunachal a ni emaw, Nagaland a ni emaw, Meghalaya a ni emaw ramri buai nei vek, chingfel tuma bei vek, a tahtawla chingfel tum te, *rawn pawm leh loh* khang karah khan anni pawh an harsa tlang vek mai a, keini pawh kan harsa a. Amaherawhchu, kan theihtawpin kan tangtlang ang a, he thilah hi chuan party angin tumah indem kan tum lo tlang viau niin kan hria a, kan tang tlang khawp a, lawmawm kan ti.

Engpawh ni sela, Pu Speaker, kan dinhmun erawh chu hriatsa vek mah ni sela, lehlamah chuan ramri buai nasat ber tum niin ka hria. Inkapa khati khawpa beihpui kan han ti a, kan ramria kan achievement pawh hi dik tak chuan keini a chhuangtu tur pawh hian ziakin emaw, record-a awm turin emaw han dah pawh hian a fel chiah mang lova. Nakinah eng emaw, remchan lohna a awm dah ang e, ‘inpuhmawhna a awm dah ang e’ tih avang hian khang kha kan achievement, ramria kan tihthat nia kan hriat pawh kha a record-in emaw, ziakin emaw dah kan duh lo rih chu a ni a, kha kha kan hre vek a.

Engpawhni sela, MNF hi chu hun harsa, hun khirh khan, hun thalo atana sorkar tura dah anni” tih tawngkam te pawh mipuiaha a awm a, a dik bawh lah tak a. Khatia han lakkhawm chuan kan sorkar hi ramri buai ber kumin kan han sorkar a, vawh hri leng nasat ber kumin kan han sorkar bawh a; ram kang nasat ber tumin kan han sorkar a. Tin, refugee sing tel buaipuiawm ber ram pakhat mai pawh ni lo, ram hnih tanga refugee sing tel buaipuiawm ber India ina ‘nawr kir rawh u, nawr kir rawh u’ a tih, Manipur leh hmun dangte chu an ngawi deuh thuap mai a; a awm a. Central lama BJP sorkarin ‘nam kir rawh u, nawr kir rawh u’, a tih chuan, ‘kan ti lovang’ tih kha a har bawh a; ka thiam bawh a. Manipur sorkar leh a dang te pawh refugee an lo luh khan, keini chu House meuha leader pawhin, ‘kan nawr kir dawn lo, humanitarian ground pawhin kan pui dawn’ kan ti tlat mai a.

Chu chang a ni lova, Prime Minister hnenah pawh, “Nawr kir thei kan ni lo, inchiang lo a ni ang. Ka nu te unau hi pali an ni a, mipa pahnih leh hmeichhe pahnih an ni a. Hmeichhe pahnih hetah India ramah an awm a, an thi a; mipa pahnih (an nuta) te chu Burma-ah an awm a, chutah chuan an thi a. Chutiang anga inzawm chu kan ni a, engtinngge nge kan namkir theih ang” ka ti a. Prime Minister chuan, “A lo ni maw” a ti a. Chuvangin, “Nawr kir rawh u” tih kha chu an sawi ngai tawh lo reng reng; tanpui dan tur khan min rawn tanpui zawk hlauh tawh a. Amaherawhchu kan duh angin min pui tam thei lo erawhchu, ‘rawn ti tam teh u’, kan ti a, open takin foreign ministry ah te, external affairs ah te, prime minister ah te, home ministry ah te, chu chu kan la nawr zel

zawk a ni. A nawr kir chu sawi loh, kan dil belh zel zawk a. Khatah khan keini chu kan danglam reng a.

Chutiang chuan refugee buaithlak ber, a lirnging tam ber kum, a buaithlak leh zel dan chu, hei chief minister kum 10 ka ni a, a 15-na a kal mek a, finance pawh ka chang zel a, ka buai ber term a han thleng a. Chutah khawvel huapin India nen, Mizoram nen, hripui len nasat ber kum a ni bawk a. Khawchhak lama kan sawi ang deuhin, ‘hriat zawng zawng kan vai hrawm; hmelchhiat nen’ a tih ang deuhin, a chhia zawng zawng kan phur zo vek mai tih tur a ni. Heti chungin ei leh barah harsa lovin kan dam khawchhuak a, kan la tichho thei hi chu *Pathian hnenah lawmthu* mimal tak pawhin ka sawi a ni.

Chuvangin, member ten in beisei ang, kan duh ang kan pha lo tih kan hria a, amaherawhchu, ‘a har em a ni’ tih kha chu ka han sawi ve duh a ni. Ka sawi ang khan, kum 15 dawn ka han chief minister a, amaherawhchu, tun ang em-ema buaithlak, rilru hahna leh financial crisis hi kan la tawng ngai lo. Chuvangin, ‘hlawh lak tlai’ tih te, ‘bill pek theih loh’ tih te, tin, ‘healthcare kan bill pek theihloh’ tih te kha a dik lutuk a. Kha kha theihtawpin Asian Development Bank-ah pawh kan han ti a, chi tinrengin tan kan han la a, *Phung A-Aw chhiar* ang main, “tan pawh, thuama tan pawh, tan pawh mi awm” kan ti a, finance minister-in ka han chhiep kual ka han chhiep kual mai a, a buaithlak khawp mai a. Amaherawhchu, vawiin ni thlengin kan la kal thei dawr dawr a, kan term pawh hei, a zo dawn a ni a. Chuvangin, a harsa leh chhia zawng zawng vawikhata kan han phurh khawm laia tun dinhmun kan han thleng thei te, SEDP duh thusam ni lo mahse, a sing tel, chhungkaw sing tel ah kan han sem chur-chur mai thei te leh, heng harsatna tam takte kan han su chho mek zel thei te hi a lawmawm kan ti a.

A dawt lehah chuan Covid te lo reh deuhin hma han la chho ila. Kum 2019 Covid lo kal hma kan pawisa dinhmun that lai kum khat ka han finance minister, ka han chief minister kha chu, ‘E, khai-khai-khai, kum 2000 chho atanga 2008 thlenga ka han finance minister, (Planning Commission awm lai) ‘hei hi chu earmark sector; chuti-khati’ min tih lai nen ngaihtuah chuan, ‘a va nuam dawn em’ ka ti hman a, kum khat (2019) kha. Amaherawhchu, Covid a lo thlen tak avangin tun dinhmun hi kan thleng ta a. Khati kara tun dinhmun kan kal chhuak chho thei hi ‘a lawmawm a ni e’ tiin, kum that kuma kan thiltih chhuanga lawmthu sawi nilovin, ‘kum chhiat ber kuma hetiang kan thleng thei hi a lawm awm e’ tiin kan Governor-in thu a sawi hi ‘a dik a ni’ tiin, vawiinah hian kan member ina “Lawmthu i sawi ang u” a tih hi ‘support-in pass tlang ila’ tiin Pu Speaker, ka han rawt a ni e. Pu Speaker, ka lawm e.

SPEAKER : Awle, tunah chuan Motion neitu MLA zahawm tak Dr. ZR Thiamsanga kan sawm ang a, sawi tul a tih leh a hriat ang angte rawn sawi se, tin, adopt rawn dil nghal se, ilo sawm ang u.

Dr. ZR. THIAM SANGA : Pu Speaker, ka lawm e. I phalna leh remtihain thuhma tawite ka han nei lawk ang e.

Dy. Speaker thar kan nei a, mimal takin lawmpuina ka hlan a. Mahse, ka dinglamah thuin, kum 4 deuhthaw kan lo thu tlang a, a bula ka thu lo hi chu ka khua a har khawp mai tih kha ka han sawi duh a ni.

Assembly session hmasaa kan la hmuh ngailoh - tablet, a holder nen kan han hmu a, ka lut phei kha, kei phei chu ka phu zawk mai a. Helaia nang leh i staff-te hnathawh nasat zia kan han hmu thar zel a, chu pawh chu lawmthu ka han sawi a, remchang ka han la a ni.

Tin, kan member, a hming bula 'doctor' tih awm ngai lo 'Dr. L. Thangmawia' tih kan han nei thar te hi, mathematics subject-ah Ph. D Degree MLA anih laia a han hmu te hi mimal takin ka lawmpui a, thil danglam tak khawvelah hian a la thleng ngai em maw le tih hial tur a ni a, ka lawmpui thu ka han sawi ve a ni.

Pu Speaker, 8th Mizoram State Legislative Assembly, 11th Session, Ni 7.2.2023-a kan Governor zahawm tak thu sawi move tura min han ti kha ka lawm khawp a. Kan han move a, la ti thang lo, vawikhat tihna te a ni a, ka lo move thui lutuk te a nih pawhin min lo hrethiam ula, tawng sual te pawh ka nei nawk nawkin ka hria a, tan a na si a. A tam si a, sawi tam ka duh bawk si a, helaia point 38 lian tak tak a rawn tih bakah sorkarin a lo thawhte leh hmachhawp tam tak sawi tur kha a awm bawk si a. Chuvangin, hun kha ka la rei a, min lo ngaithiam hram hram turin kan member-puite pawh, kha ka sawi sualte pawh kha min lo ngaidam turin ka dil che u a ni e.

Pu Speaker, a lawmawm khawpin ka hria a, kan House leader nen khan member 23 khan kan sawi a, kan sawi tha hlawm khawp khan ka hria a a lawmawm hle a. A tlangpuiin *tha* chu kan ti tlang vekin ka hria a, *tha-lo* kan tih pawh kha duhthawhna lampang niin ka hria a, kan rilru tak chuan tha kha kan ti vekin kan lawmin ka hria a ni. Chuvang chuan, lawmthu ka han sawi a ni.

A hmasa berah chuan - SEDP kha kan khel nasa khawp mai a, sawi lo pawh kha kan tlem khawpin ka hria a, a tha a nih ka ring a, SEDP hi. Pawisa a tlem thu te kha kan han sawi a, 'eng tham a ni lo, awmzia a nei lo' kan han ti tak na a, *dawn* kan chak emin, a *dawng-lo* nih hi kan hlau khawp mai a, tun ang sum harsat lai hi chuan a lo lawmawm viau ni tur a ni, mizo mipui tan pawh. Chuvang chuan, kan house leader leh midang pawhin an han sawi, hun harsa leh khirhkan tak mai kan tawh laia SEDP - kan flagship programme kan tum ang project base-in kal thei lo mah ila hetiang anga kan han kalpui thei hi a lawmawm khawpin ka hria a. Kan Governor-in a rawn sawi pawh hi sawi awm tak niin ka hria.

Amaherawhchu, SEDP hi ‘midang, lo party dangin an dawng ve lo’ tih te pawh kha, an la dawng zel turah ngai ila, kan sorkar leh chuan kan dawng vek theiin ka ring a. Sorkar hmasaah pawh khan a then kha chuan kan dawng loin ka hria a ni; a *dawng-lo* kha tam tak an awmin ka hria. Chuvang chuan, sorkar lehah khang kha chu dawng vek turah inngai ila a tha ang e.

Ramri chungchang kha kan sawi tam khawp mai a, a lawmawm khawp mai a. Member ten kan vaiin kan vei tlangin ka hria a. Amamherawhchu, kan ngaihtlak tak ang khan, ramri chungchangah hi chuan *MNF-sorkar tluka hma tak taka la hi an awm lo em maw ni chu* tih tur niin ka hria; zep rual niin ka hre lo. Theihtawp chu kan chhuah a, mahse ramri buai hi vawi-leh-khata chin fel mai theih a ni lova. Member thenkhatin an rawn sawi ang khan, ramri chungchang hi chu *political issue*-a lak chi a ni lova, hei hi kan hriat a tha khawpin ka hria. Ruling kanni emaw, ruling lo emaw, NGO, Kohhran leh Mizo mipui zawng zawngte nena kan tanrualna tur a nih avang hian, he issue hi kan vei tlang a, a lawmawm khawp hian ka hria a ni.

Tin, Zirna chungchangah ‘a tha lo’ te kha kan han ti a. Mahse, tun hma hunte han ngaihtuah kha chuan, tunhma School tam takte kha defunct ngai khawp khan a han awm a. Kan han sorkar a, school tam tak tha tawh lo te kan han din thar a, repair tam tak kan nei baw a, Zirtirtu tam tak kan han la a, SEDP-ah kan han la baw a. Chutiang chuan sorkar hi education lamah hian theihtawp a han chhuah thar a. Nichina kan ngaihtlak tak, member ten an rawn sawi - Mathematics leh Science subject bilingual (English leh Mizo) kan han introduce tur te hi a lawmawm a ni. Chuvang chuan, education department-ah pawh hian nasa takin hma kan sawn a ni tih kha a chiang a ni.

Tin, Sport Infrastructure chungchangah kan thalai te hmakhua ngaiin nasa takin kan sorkarin hma a lakna thu an han sawite kha a ropui khawp mai a, khang kha chhinchhiah tlak a ni. Tun sorkar hian thalaite hmakhua ngaiin sports leh thildang dangah te pawh thalaite hamthatna tura sorkarin theihtawp a chhuah hi a lawmawm hle a ni.

Tin, kan han ngaihtak tak ang khan Supply Department hian hun khirh tak karah pawh ei-leh-bara kan hnianghnara, member zahawm tak khan gas te kha ‘company leh a dealer-te inkar a ni’ a ti a, a dik khawp mai. Hengte pawh hi sorkar hmasaah kha chuan gas ah hian kan buai khawp mai a, tun sorkarah kan hnianghnar em em hi eng emaw chenah chuan a dealer te leh company inkar mai ni lovin, sorkar pawh hian theihtawp a chhuah a ni; a changtu minister leh a department ten theihtawp an chhuaha zarah hetiang hian kan hnianghnar a ni tih kha kan hriat a thain ka ring.

Rural Department hnuai RD Block thar opposition bial ve ve-ah kan han nei te hi (ka duh aiin an rawn phar nasa lo, a bial neitute kha), khang kha keini pawhin kan

chan loh a ni. Chuvang chuan he sorkar hian ‘opposition leh opposition-lo, tumah a thliar lo a ni’ tih a lan chianna, hleih nei sorkar anih loh zia ti langtu a niin ka hria.

Kan hriat angin PHE hi tunah chuan JJM hnuaiiah central project chu a ni naa project hi engang pawhin central chuanrawn siam se a bawh zuituten theihtawp an chhuah loh chuan a tak ram a thleng ngailo a ni. Chuvangin, tun sorkar kan PHE Minister-te leh official ten theihtawp an chhuahna a zarah tunah hian khaw tam takah mahni inchnung ngeiah tui te kan han herh hawnga, member thenkhat khan a tap ringawt a ni e, te an ti a, amaherawhchu herh haw tak tak hi kan tam hle tawh a ni tih kha, ka bialahrawn kal tase kha kharawn hmu se a tak ramah hei hi a pipe te pawh a tha lo chi han tih kha heng hi chu kan mithiamten a tha an tih hi chu tha turah lo ngai phawt ila a tha ang e.

Kan sawi leh duh chu Governor thusawi hi point lian tak tak 38 ni mahse tam tak la sawi hmaih leh sorkar hmalak tawhna leh hmalak mekte sawi loh a tam khawp mai a. Pakhat kan sawi duh chu ZMC chungchang saw a ni a, tunah sawn final inspection a ni deuhthaw tawh mai a, hmanni khan anrawn kal a inspectionanrawn nei thut a, tuna tlema kan la tlin lohna chu faculty lamah hian mizo hian professor tur ang chite leh eng engemaw hi han hmuh mai hi a har thin a chungte pawh chu tunah hian theihtawpin a awlsam zawka lak theih turin kan Health Minister-te, kan Chief Minister sawlaia governing council-a chairman te leh kan official pawimawh ten tunah hian theihtawp an chhuah a.

Hmannia Inspector lokalte chuan an hmuh danah chuan India ram chhunga government hospital zawng zawng kan hmuh tawhah in O.T hi ala tha ber a ni an ti tawp mai a ni. Chuvang chuan, kan member zahawm tak takte pawh kha va kal ve teh u, mak tak a ni hmanni ka va kalte pawh ka hmu khat deuh bawka ka phu zawk mai a ni, in zai kha a chakawm hliah hliah tawng khawlo ni suh se, in zaina hmunah khan in zai a iai awm loh a ni, kan doctor-te, kan nurse-te pawh saw va hmu ula hetiang khawpa civil hospital thianghlim leh fai leh a thawktute pawh fel saw an vang khawpin ka ring. Chuvang chuan kan Inspector-te remark pawh hi a tha a Pathian khawngaihna a zarah tunah hian final hi April thla hian an nei dawn a, an chhuah meuh chuan permanent registration Pathian khawngaihna a zarah kan Health Minister-te leh kan staff ten theihtawp an chhuahna a zarah kan neih ngei ka beisei a ni.

Tin, oxygen chungchang kha tlem han sawi ka duh a - Mizoramah oxygen generating plant hmanah khan kan nei tha lova, oxygen-ah hian kan buai kan buai a, hun harsa covid in hetiang khawpa min chimbuaia karah vanneihna kan dawng nasaa. Civil Hospital-ah tunhma in oxygen generating plant kha 200 litres per minute kan neih chauh lain tunah chuan 1000 chuang kan nei ta a, ZMC-ah 200 litres per minute kan neih lain tunah chuan 150 chuang litres per minute ti chhuak thei kan nei ta a. Chutiang bawh chuan district civil hospital hrang hrangah la nei ngai lote, a neite pawhin Champhai ngeiah te pawh 80 litres per minute tichhuak thei chauh nei khanin 500 litres

per minute ti chhuak thei kan nei tawh a ni hmun tinah, hei hi hmasawna ropui tak a ni tih kan hriat tlan tha in ka hria a.

Tin, ICU chungchangah hian tunhma kum sawm, Governor khan sawi awm tak a rawn telh lova kha kha kan sawi lawk a ni e. A pawimawh si amipui hian kha kha kan hriatchian a ngai tlat. Helam pang pawh khan Pu Speaker, tunah hian ICU kan mamawh em em pawh hi tunhma kum sawm ah khan civil hospital lian berah pawh hianin khum panga chiah kan nei. ZMC ah tunhma khan 13 chiah kan nei. Tunah hian Civil Hospital ah hian khum 15 kan nei a, tunah hian khum 10 pawh luah theih mai turin kan in ready vek tawh a ni. Kan Minister te leh Department te, kan Chief Minister te hmalakna in tiang khanin ropui tak a ni. ZMC ah pawh 13 kha tunah chuan 40 chuang kan nei tawh a ni, heng hi achievement ropui tak ani a.

Tichuan, ICU la awm lohna Champhai ah te Lunglei ah te tunah kan nei tan tawh bawk a, Dialysis tihna khawl te pawh kan nei tan tawh bawk a. A bak ah tunah Kolasib ah pawh hian in HDU hi kan tan tawh a ni. Chutiang chuan Health Department ah pawh hian hmasawna tam tak a awm a ni.

Tin, sawi loh theih loh pakhat Pu Speaker, Governor khan rawn sawi se ka tih a tel lo hlauh mai a, ka bial chhunga thil pawimawh tak mai Kuthnathawktuten theihtawp an lo chhuahna ‘Grape-wine Rules’ tih kha tunah sorkarin min lo passed sak ta rup mai hi khawchhak mipuite chu kan lawm a nih kha. Chuvangin hei hi Pu Speaker, sawi lo thei ka ni lova, ka sawi loh chuan ka bial mipui ten ngatinge i sawi loh min rawn ti dawn si a, chuvangin i phalna leh remtihna in ka rawn sawi a ni. Le Pu Speaker, kan ti tawp ang e. Tuntum Eighth Mizoram State Legislative Assembly Eleventh Session ni 7 February, 2023 a Governor zahawm takin a sawi lawmthu sawina Motion vof Thanks ka rawn putlul hi House in min lo pawmpuia, min lo Adopt turin ka rawn ngen a ni e, ka lawm e.

SPEAKER : Governor thusawi chungchanga lawmthu sawina Motion “that the members of Mizoram Legislative Assembly assembled in this Session are deeply grateful to the Governor for the Address which he has been pleased to deliver to the Assembly on the 7th February, 2023” tih chu kan sawiho ta a, Adopt rem tiin, “remti” ti rawh ule. Remti lo kan awm em? Remti lo kan awm chuan “remti lo” ti ula.

Awle, Governor thusawi chungchanga Motion of Thanks chu House-in lungrual takin a adopt ta a ni. (**Dr. ZR Thiamsanga:** Pu Speaker, ka lawm e.)

Awle, wawiina kan tih tur chu kan zo ta a, kan chawl rih ang a, naktuk, ni 9, February (Ningani) 2023, zing dar 10:30 ah kan thukhawm leh dawn nia.

Sitting is adjourned. (6:37 PM)